

ሉቃስ ፃፊዳ ሚሺራቸው ቃላ ጌሉዋ

ሉቃስ ፃፊዳ ሚሺራቸው፡ ዩሱሳ ኮይሮ ያናዋ ያጌቲ ናባቱዋን አባይ ኦዴቲዳዋ፡ ዳሮ ዋዲያፕ ናጌቲዳ ሂደታው ሁጹ ጊዳዳዋ፡ ኢስራዔሊያ አሳይ ናጊዳ ዳዒያ ያሳኒ ኦኩቲዳዋ፡ አሳ ዘሬላ ኡባ አሺያዋ ጊዲያዋ ቆንጨሴ። ዩሱሲ ያሳ አወዋፕ ሂደሳቶ ሚሺራቸው ቃላ ኦዳናው ኪቲቲዳዋ ጊዲያዋን ሃ ሚሺራቸው ቃላይ አሳሲ ዳዒያ ዳማ ዳማ ሜቱዋ ቃሪያ ዋልቃ ኦይቄዳዋ ጊዲያዋ ሉቃስ ኦዴ። ሉቃሳ ሚሺራቸው ቃላ ጊደን፡ ዩሱሳ ዩሳባ ኦዲያ ኮይሮ ሽምፓቱዋን ቃሲካ ዩሱሲ ሳሉዋ ፑዴ ኬሴዳዋ ኦዲያ ወርሴላ ሽምፓቱዋን ሎይሊዴ፡ ኦዴቲዳዋ ናሽቻባ። ዩሱሲ ሳሉዋ ኬሴዳዋፕ ጉዩያን አማኑዋባይ ዋኒ ዲጨፍዳንቶኔ ዋኒ አኬዳንቶ ኦዲያ ታሪኪያ ሃ ማፃፋ ፃፊዳ ቢታኒ ዩሱሲ ኪቲዳዋንቲ ኦሱዋ ማፃፋን ኦዴዳ።

ኪታንቻቱዋ ዩሳባይ፡ ዩሱሲ ዩሌቲዳ ዋዴ ወዲያ ሄሚያዋንቲ ቢዴ ቤዔዳዋ ኦዲያ ታሪኪ፡ ዩሱሲ ናዓቲላን ዳዒዴ ጌሻ ጎሊያ ቤዳባይ፡ ቃሪታንቻ ሳሚራዊያን ባዩዴ ቤቲዳ ናዓ ታሪኪ ሉቃሳ ሚሺራቸው ፃላላን ቤቲያዋንታ። ሃ ሚሺራቸው ቃላ ጊደን ሃ ጋፃፕ ሂኒ ጋፃ ጋካናው ሁጹ ጊዲዴ ያሌቲዳባይ ዋሳባ፡ ጌሻ አያናባ፡ ዩሱሳ ኦሱዋ ጊደን ማጫ አሳው ዳዒያ ሳባኔ ያሳይ ናጋራ አቶ ያጊያባ።

ሽምፓቱዋ ኡባቱዋሲ አሜቲዳ ቃንሳ ቆፋቱዋ

- ጌሉዋ (1:1-4)
- ፃማቂያ ዮሃንሳኔ ዩሱሳ ዩሌታ (1:5-2:52)
- ፃማቂያ ዮሃንሳ ኦሱዋ (3:1-20)
- ዩሱሳ ዪንቃታኔ ፓጨያ (3:21-4:13)
- ዩሱሲ ኦሱዋ ጋሊላን ደሞዋ (4:14-9:50)
- ዩሱሲ ጋሊላፕ ዩሩሳላሜ ቦዋ (9:51-19:27)
- ዩሩሳላሜኒኔ ኢዚ ዩሹዋን ዩሱሳ ወርሴላ ሳሚንታ (19:28-23:56)
- ጎዳ ዩሱሳ ዳንዲዋ፡ ቆንጨፍላኔ ሳሉዋ ቡሳ (24:1-53)

1-4 ቦንቸቱዳ ቶሬሎሳ፣ ኮይሮ ባሬንቱ አይፊያን ቤዔዳዋንቱኔ ባሬንቱ ቃላን ማርካቲዳዋንቱ ኑሲ ኦዴዲኖ። ፃፊቱዳ ዩወዋ ታ ባገን ኡባ ፃጹዋፔ ቢዳ ፃሎዋፔ ጉዬ፣ ታሪኪያ ማራ ናጌዳ ኦጊያን ኔው ፃፋናው ሎዓ ጊዴዳዌ ታው ቤቴዳ።

ፃማቂያ የሃኒሳ ዩሌታይ ኮይሮ ኦዴቲዳ

5 ዪሁዳ ጋዲያ ካቲያ ሄሮዲሳ ዋዲያን፣ * አቢያ ቄሳቲላ አሱዋ ባጋፔ ጊዴዳ ዛካራሳ ጌቴቲያ ኢቲ ቄሳይ ዳዔ። ማቻታካ ኤልሳቤፆ ጌቴቲያ አሮኔ ያራፔ ዩሌቴዳዉኖ።

6 ላዓቲካ ጎዳ አዛዙዋኔ ሴራ ዳሪሲዴ ናጊያዋንታኔ ካዴ ባንታን ያሳ ሲንላን ዳዒያ ጻላቲዋ።

7 ጊደፔ አቲን ኤልሳቤፆ ማንላ ጊደ ዲራው፣ ዩሉ ኡንቲንቶ ባዋ። ላዓቲካ ላይላ ሱጌዳዋንታ።

8 ኢቲ ጋላሲ ዛካራሲ ባሬ ባጋ ካላን ያሳ ሲንላን ቄሳቲላን ኦሊያ ዋዴ።

9 ባሬ ቄሳቲላ ዋጋ ደያዳን ጌሻ ጎሊያ ጌሊዴ ኢፃና ጨዊሱዋ † ሳማይ አ ጋኬዳ።

10 ኢፃናይ ጨዊያ ዋዴ አሳይ ኡባይ ካሬን ኤቂዴ ዋሲ ዳዔ።

11 ጎዳ ኪታንቻይ ኢፃና ያርሹዋሳፔ ኡሼቻና ኤቂዴ አው ቤቴዳ።

12 ዛካራሲካ ቤዔዳ ዋዴ ዳጋሚዴ ያሻን ሚቴቴዳ።

13 ኪታንቻይካ ቃሲ ያጌዳ፣ «ዛካራሳ፣ ያዮፓ፤ ኔ ዋሳይ ሲሴቴዳ፣ ኔ ማቻታ ኤልሳቤፆ አቲማ ናዓ ዩላናዉኑ።

14 አ ዩሌታን ናሼታይኔ ኢሻሉ ኔው ሃናናዋ፤ ጮራቲካ ኢ ዩሌቶ ዲራው ሃሹ ጋናዋንታ፤

15 ኢካ ጎዳ ሲንላን ዳራ ጊዳናዋ። ማሉዪያ ዋዪኒያ ኡሻ ጊደ ሃራ ማሉዪያ ኡሻ አይኔ ኡሼና፤ ባሬ ዳይ ኡሉዋን ዳዒሺን አያና ጌሻይ አኒ ኩማናዋ።

16 «ኢሰራዔሊያ አሳቲዋፔካ ጮራቲዋ ኡንቲንቲ ጎዳ ያሳኮ፣ ኢ ዛራናዋ።

* 1:5 ዪሁዳ፡ ሃዋኒ ዪሁዳ ጋዲያ ጌቴቲዳዌ ፊልስጼሜ ጋዲያ ኡባ ቤሲያዋ።
1:5 1ኦድ 24:10 † 1:9 ኢፃና ጨዊሱዋ፡ ሃዋ ጉሳይ ጨዋይ ዋሳ ኮታ ያሳኮ ጋኬ ጊዴ ዋንታኔ ኦማርሲ ዋዴ ጨዊሲያ ዋጋ። 1:15 ፓይ 6:3

17 እካ ጊጌና አሳ ጎዳው ጊጊሳናው፡ አዋቱዋ ዋዛና ናናቱዋኮ፡ አዛዜቴናዋንታካ ዲሎቴላ ኤራኮ ዛራናው፡ ኤላሳ † አያናኒኔ ዋልቃን ጎዳፔ ሲንላና ቤ።»

18 ዛካራሲካ ኪታንቻ፡ «ታኒ ጨማዲ፡ ታማቻታካ ባሬ ላይላን ሱጌዳውና፡ ሃዋ ታኒ እያን ኤራኒታ?» ጌዳ።

19 ኪታንቻይካ ዛሪዳ፡ «ታኒ የሳ ሲንላን ኤቂያ ጋብሬላ፤ ሃዋ ሚሽራቹዋ ኔው ኦዳናው ኔኮ ኪቱታዲ፤

20 ሄኮ ሄ ዋዲያን ሃናና ታ ቃላ ኔ አማና ቤና ዲራው፡ ሃ ዩዉ ሃናና ጋላሳይ ጋካናው ኔኒ ዱዳ ጊዳናሳ፤ ሃሳያናዉካ ዳንዲያካ» ጌዳ።

21 ሄ ዋዳ አሳይ፡ ዛካራሲ ጌሻ ጎሊያፔ ኬሴናን አያው ጋሚዔዴንቶ ማላሉቲዳ ናጊና።

22 ኬሴዳ ዋዲያንካ ሃሳያናው ዳንዳይቤና፤ ጌሻ ጎሊያን ሳፃ ኢ ቤዔዳዋ አኬኬዲና፤ እካ ሃሳያናው ዳንዳዪቤናዋ ያርሲ ቤሲዳ፡ ዱዳ ጊዲዳ ዳዔዳ።

23 ዛካራሲካ ባሬ ኦሱዋ ዋዲያ ዉርሶ ዋዳ፡ ባሬ ጎሌ ሲሜዳ።

24 ሄዋፔ ጉዱያን አ ማቻታ ኤልሳቤፃ ሻሃራዳ ኢቼሹ አጌና ባሬና ጌንላዲ።

25 ኤልሳቤፃካ፡ «ታ ቶሺያ አሳ ጊደፔ ዲጋናው § ጎዳይ ባሬ ማርቴላን ታና ፃሎ ዋዳ፡ ሃዋዳን ታው ኦሌዳ» ጋዲ።

ዩሱሳ ዩሌታይ ካሴቴዳ ኦዳቴዳ

26 ኡሱፑንላ አጌናን የሳ ኪታንቻ ጋብሬል ጋሊላ ጋዲያን ናዚሬቴ ካታማ

27 ዳዊታ ያራፔ ጊዳዳ ዮሴፋ ጌቴቴያ ቢታኔው ኦሽታ ቃሽቴዳ ዋደራቴኮ የሳ ማታፔ ኪቴቴዳ፤ ዋደራቴ ሱንላይካ ማይራዋ ጌቴቴ።

28 ኪታንቻይካ ማይራሚኮ ዪዳ፡ «ዳሪሳዳ ደሴታዉኔ፡ ሳርቴላይ ኔው ጊደ፤ ጎዳይካ ኔናና ጋላ ዳዔ፤ ኔኒካ ማጫዋንቴ ጊደን አንጃቴዳዉና» * ያጌዳ።

† 1:17 ኤላሳ፡ ሃዋ ጌቴቴዳዋ፡ ካሴ ኤጫ ጫቁዋ ማፃፋን ናቢያ ኤላሳ ኦራላባ ኦሌያ ዋልቃኒ ኤራቴዳዋ ዲራሳ። 1:17 ሚል 4:5፣ 6 1:19 ዳን 8:16፤ 9:21
§ 1:25 ታ ቶሺያ አሳ ጊደፔ ዲጋናው፡ አሲና ጌሌዳ ሚሽራታ ናና ዩሌናን አቶፔ፡ ኢሲራዔሊያ አሳ ቆፋን፡ «ዎሳይ ኢዞ ሙሪ ዳዔ» ያጌታው። 1:27 ማጉ 1:18
* 1:28 ኔኒካ ማጫዋንቴ ጊደን አንጃቴዳዉና፡ ሃ ቆፋይ ቤኒ ጨሚዳ ግሪኪያ ማፃፋን ባይናዋ ጊዲያ ዲራው፡ አቲ አቲ ኢንጊሊዜሉዋኒኔ አማራሉዋ ማፃፋኒካ ባዋ።

29 ማይራማካ አ ሃሳያፔ ዳንደዋን ዳሪሳ ዳጋማዴ፥ «ሃዌ አያ ማላ ሳርታ ገዳኔ» ጋዴ ዩወዋ ቆጋዲ።

30 ኪታንቻይ ኢዞ፥ «ሃኔ ማይራማ፥ ያሳ ማታን ሳባ ዳማዳ ያዮጋ።

31 ኔኒ ሻሃራዴ፥ አቱማ ናዓ ዩላናሳ፤ አ ሱንላካ ዩሱሳ ጋናሳ።

32 እካ ዳራ ገዳናዋ፤ ኡባፔ ቶቃ ያሳ ናዓ ጌቱታና፤ ጎዳ ያሳይ አ አቡ ዳዊታ ካወቱላ ኦይዲያ አው አማናዋ።

33 እካ ያዩቆባ ጎሌን ሜጲናው ካወታናዋ፤ አ ካወቱላወካ ወርሴላይ ባዋ» ያጌዳ።

34 ማይራማካ ኪታንቻ፥ «ታኒ ዋድራቶ ገደ ዲራው፥ ሃዌ ዋቲ ሃናናዌ?» ያጋዲ።

35 ኪታንቻይካ ዛሪዴ ኢዚው፥ «አያና ጌሻይ ኔ ቦላ ያናዋ፤ ቶቃ ያሳ ዋልቃይ ኔናን ሸምጋናዋ። ሃዋ ዲራው፥ ኔፔ ዩሌቲያዌ ጌሻ ያሳ ናዓ ጌቱታና።

36 ኔ ዳባታ ኤልሳቤፃ ባሬ ጨማቱላ ዋዲያን አቱማ ናዓ ሻሃራዲ። ማንላ ጌቱቱዳወና ኤልሳቤፃ ሻሃራዴፔ ኡሱፑንላ አጌና ኦይቃዲ።

37 ያሳ ያኒያ ዩወ ባዋ» ያጌዳ።

38 ማይራማካ፥ «ታኒ ጎዳ አይላቶ፤ ኔኒ ጎዋዳን ሃና» ጋዲ። ሃዋፔ ጉዩያን ኪታንቻይ ኢዚ ማታፔ ቤዳ።

ማይራማካ ኤልሳቤፃ አቻናው ባዲ

39 ማይራማካ ሄ አጌና ገደን ዳንደዴ ኪሊ ዘዘቲያ ዩሁዳ ጋዴን ዳዒያ ኢቲ ካታማ ኤሌላ ኬሳዲ።

40 ዘካራሳ ጎሌ ጌላዴ ኤልሳቤፃ ሳርታዲ።

41 ኤልሳቤፃካ ማይራማ ሳርታ ሲሴዳ ዋዴ፥ ኢዚ ኡሉዋን ዳዒያ ሻሃራይ ጉፔዳ፤ ኤልሳቤፃካ አያና ጌሻን ኩማዲ።

42 ባሬ ኮሻካ ቶቁ ኦላዴ፥ «ኔኒ ማጫዋንቱ ገደፔ አንጃቲዳወና። ኔፔ ዩሌቲያዌካ አንጃቶዋ።

43 ኔኒ ታ ጎዳ ዳያ ታኮ ያናው ታኒ ኦኔ?

44 ሄኮ ኔ ሳርታ ኮሻይ ታ ሃይላን ሲሴቲዳ ዋዴ፥ ታ ኡሉዋን ዳዒያ ሻሃራይ ናሽቻን ጉፔዳ።

45 ጎዳይ ፖሌፔ ገዴ ኢዚው ኡዴዳዋ አማኔዳወና ኢዛ አንጃቲዳወና» ያጋዲ።

ማይራሚ ጋላታ ዬሳ
(1:46-53)

46 ማይራሚካ፡

«ታ ሸምጋታ ታ ጎዳ ቦንቻው፡

47 ታ ኣያናይካ ታ ያሳ፡ ታ ዳሊያን
ሎይሳ ናሹታው።

48 ኢካ ባሬ ኣይላቲ ቶሺያ
ዳሌዳ።

ሃቼፔ ዶሚዳ ዩሌታይ ኡባይ
ኣንጄቴዳዉኔ ገኖ።

49 ዋልቃማ ጊዳዳ ኢ ዳር
ዬወዋ ታው ኦሴዳ፤

ኣ ሱንሳይካ ጌሻ።

50 ኣ ማርታይ ያዪያዋንቲሲ ዩሌታፔ ዩሌታይ
ጋካናው ዴዔ።

51 ባሬ ዋልቃን ሚኖ ኪታ ኪቴቴዳ፤
ባሬንቲ ዋዛና ቆፋን ኦቶሬቲያዋንታ

ላሌዳ።

52 ዋዲያዋንታ ካዉቲሳ ማታ ኦይዲያፔ ዋሴዳ፤
ኣሽካቲዋካ ቃሲ ቶቁ ቶቁ ኦሴዳ።

53 ኮሻቴዳዋንታ ሎያ ዩወዋን ካሊሴዳ፤
ዲራቲዋ ቃሲ ማላ ዩዳርሴዳ

54 ባሬ ማርቲሳ ቆፒዳ
ባሬ ኣይሊያ ኢሰራዔሊያ ማዳዳ።

55 ኦ ኣዋቶ ኢ ኦዳዳዋዳን
ኣብራሃሜዉኔ ኣ ያራው ጌዳዋ

ማዲናው ናጋና ዲራሳ»
ያጋዲ።

56 ማይራሚካ ሄዙ ኣጌና ከና ኤልሳቤዲ ማታን ጋሚያዋፔ
ጉዪያን ባሬ ጎሌ ሲማዲ።

ፃማቂያ ዮሃንሳ ዩሌታ

57 ኤልሳቤዲካ ዩሊያ ዋዲ ጋኪና፡ ኣቲማ ናዓ ዩላዳ።

58 ኢዚ ሾራቲኔ ኢዚ ዳቦ ጊዳዳዋንቲ፡ ጎዳይ ማርቲሳ ኢዚው
ኦሴዳዋ ሲሲዳ ኢዚና ኢቲፔ ናሹቴዳዲኖ።

59 ሆሰቸንሳ ጋላሳን ናዓ ቃፃራናው ዩዲኖ፤ ኣ፡ ኣወዋ ሱንሳን
ዛካራሳ ጊዳ ሱንሳናው ኮዩዲኖ።

- 60 አ ዲያ ቃሲ፡ «ሃኔና፡ የሃኒሳ ጌታታናው ኮሼ» ያጋዲ።
- 61 ኡንቱንቱካ ኢዞ፡ «ኔ ዳባቱዋፔ ሃቼ ጋካናው ኢቱካ ሃ ሱንላን ያሰቱቤና» ያጌዲኖ።
- 62 አ አባ፡ ኦና ጊያ ሱንላን ያጌታናው ኮዪንቶ ያርሲ ኦቼዲኖ።
- 63 አ አቡካ ዓፊያባ ኦቼ አኪዳ፡ «ናባ ሱንላይ የሃኒሳ» ጊዴ ዓፊና፡ ኡባቱካ ዬወዋን ማለሌቲዲኖ።
- 64 ሄዋንካ ዛካራሳ ዶናይ ዶዬቲዳ፡ አ ኢንፃርሳይካ ቢሌቲና ሃሳያ ዶሜዳ፡ ያሳካ ጋላቲዳ።
- 65 አ ሸራቱካ ዴዒያሳ ኡባን ያሻን ኩሜዲኖ። ሃ ዬወካ ዘዘቲያ ዪሁዳ ጋዲያ ኡባን ዳሪ ሃሳዬቲዳ።
- 66 ሃዋካ ሲሴዳዋንቱ ኡባቱ፡ «ሃ ናባይ አያ ጊዳኔሻ?» ያጊዴ ዬወዋ ባሬንቱ ዎዛናን ኦይቄዲኖ፤ ያሳይካ አናና ዴዒያዎ ኤሬዲኖ።

ዛካራሳ ጋላታኔ ቲምቢቲያ ኦዲዎ

- 67 የሃኒሳ አቡ ዛካራሲ አያና ጌሻን ኩሚዴ ቲምቢቲያ ያጊ ኦዴዳ፡
- 68 «ኢሰራዔሊያ ጎዳይ ያሳይ አንጄቶ፤ ዪዴ ባሬ አሳ ያሞሴዳኔ ዎዜዳ።
- 69 ባሬ አይሊያ ዳዊቱ ጎሊያን፤ ዎልቃማ አሺያዎ ኮሲ ገገሴዳ።
- 70 ሃዌካ ቤኒ ጎዳ ጌሻ ናባቱዋ ዶናን ኦዴቶዎዳን፡
- 71 ኢ ኦና፡ ኦ ሞርኬቱዋፔኔ ኦናና ኤቄቲያዋንቱ ኩሺያፔ አሻናሳ።
- 72 ሃዋካ ኢ ኦፊዳዌ፡ ኦ አዋቶ ማሮቲሳ ቤሳናሳኔ፡ ባሬ ጌሻ ጫቁዋ ዎዛና አላናሳ።
- 73 ኦ አወዋ አብራሃሞሲ ጫቁዳ ጫቁዋ ቆፓናው፡
- 74 ኦ ሞርኬቱዋ ኩሺያፔ ኬሲዴ ያሻይ ባንታን አው ኦላናዳን ማታ ኮሲ አሜዳ።
- 75 ሃዌኔካ፡ ኦና ኦ ዎዲያ ኡባን ጌሻቲላኒኔ ዒሎቲላን ባሬ ሲንላን ኤሳና ዲራሳ።
- 76 ዛሪዴካ፡ ኔኖ፡ ታ ናባው፡ ቶቃ ያሳ ናቢያ ጌቲታናሳ፤

ኦጊያ ገገሳናው ጎዳፔ ሲንሳና
ባናሳ።

77 አሳ ናጋራ ማሪያ አቶቴላ ኤራ
ኡንቱንቶ አማናሳ።

78 ሄዌካ ከሊፔ ዬዳ ፖዑ።
ኑና ያሞሴዳዌ ኑ ያሳ ማርቴላኔ
ቃሬታ ጋሱዋና።

79 አ ፖዑካ ቋማኒኔ ሃይቁዋ ኩዋን
ኡቴዳዋንቶ ፖሲሴ፤
ኑ ጌዲያካ ሳርቴላ ኦጊያን ሱሪሴ።»

80 ናዳይካ ዲጪዳ፣ አያናን ሚኔዳ፤ ኢሰራዔሊያ አሳው ቤቴዳ
ጋላሳይ ጋካናው ማላ ቢታን ዴዔዳ።

2

ዬሱሳ ዬሌታባ (ማጥ 1:18-25)

1 ሄ ዋዳ * ርማ ካዉቴላ ጋርሳን ዴዒያ አሳይ ኡባይ ሱንሳ
ፃፊታናዳኒኔ ፓይዳታናዳን አዉጊሰፃሴ ቁሳሬፔ † አዛዙ ኬሴዳ።

2 ሄዌኔካ፣ ቁሬኔዮሴ ‡ ሶሪያ ጋዲያ ሞዲያ ዋዳ ሃኔዳ ኮይሮ
አሳ ፓይዲዋ።

3 ሃዋ ዲራው ኢቲ ኢቲ አሳይ ፃፊታናው ባሬ ካታማ ባሬ
ካታማ ቤዳ።

4 ዮሴፎካ ዳዊታ ጎሊያፔኔ ያራፔ ጊዲያ ዲራው ጋለላ
አዉራጃን ዴዒያ ናዚራቴ ካታማፔ ዴንዲዴ ዳዊታ ካታማ
ጊዴዳዉኒኮ ዪሁዳን ዴዒያ ቤቴሊሄሜ ጌቴቲያ ካታማ ኬሴዳ።

5 ሄ ዋዳ ዬሊያ ዋዲ ማቴዳ አው ኦሼታ ኡቴዳ ማይራማካ
አናና ኢቲፔ ባዲ።

6 ኡንቱንቱ ሄዋን ዴዒሺን ኢዚው ዬሊያ ዋዲ ጋኪ አጌዳ።

* 2:1 ሄዋዳ፣ ጌቴቶዌ ፃማቂያ ዮሃንሲ ዬሌቲ ሰሚዴ ቢሮ ጉላቴላን ዴዒሺን ዬሱሲ
ዬሎቶ ዋዲያና። † 2:1 ቁሳራ፣ ጊያ ሱንሳይ ካቲያ ጉሳ። ሄዌኔካ ጮራ ጋዲያ
ሞዲያ ዋልቃይ ዴዒያ ጮራ ካታቱዋ ካቲያ ጉሳ። ‡ 2:2 ቁሬኔዮሳ፣ ጌቴቲያዌ
ርማ ካቲ አዉጊሰፃሴ፣ ሶሪያ ጌቴቲያ ዪሁዳኔ ጋለላ አዉራጃቱዋ ኦይቄዳ ጋዲያን
ሱንሳዬዳዋ።

7 ኢዛካ ባይራ ናዓ § ጊዳዳ አቱማ ናዓ ዩላዲ፤ አማላይ ሽምፒያሳ ዴማ ቤና ዲራው፣ ናዓ ማዩዋን ፃፃዴ ጋጳቲያን * ቈራዲ።

ዉዲያ ህሚያዋንታኔ ኪታንቻቱዋ

8 ህ ጋዲያን ቃማ ባሬንቱ ዉዲያ ህሚዴ ዴምባን አቂያዋንቱ ዴዒኖ።

9 ያሳ ኪታንቻይ ቆፔናን ዪዴ አንቱንቱ ሚዪያን ኤቄዳ፤ ጎዳ ቦንቹ አንቱንቱ ዩሹዋን ፖዔዳ ዋዴ፣ ዋልቃማ ያሻይ አንቱንታ ኦይቄዳ።

10 ኪታንቻይ አንቱንታ፡ «ያዮፒቴ፣ አሳው ኡባው ሃኒያ ዳር ናሹቹያ ሚሺራቹዋ ታኒ ሂንቱንቶ አሃዲ።

11 ሃቹ ደዊታ ካታማን አሺያዌ ዩሌቴዳ። አካ ጎዳ ኪሪሰቶሳ።

12 ሃዌ ሂንቱንቶ ማላ ጊዶ፡ ጋጪኖ ናዓይ ማዩዋን ፃፃቲዴ ጋጳቲያ ጊዶን ጊሴዳዋ ዴማኒታ» ያጌዳ።

13 ቆፔናን ጮራ ያሳ ኪታንቻቱ ኮይሮ ኪታንቻና አቲፔ ቆንጨዲኖ።

14 ያሳካ ጋላቲዴ፣ ሃዋዳን ጌዲኖ፡

«ቦንቹ ያሳው

ቦላ ሳሉዋን ጊዶ።

ሳዓን ኢ ዶሲያ አሳው

ሳሮቴላይ ጊዶ»

ያጌዲኖ።

15 ኪታንቻቱ አንቱንቱፔ ሻኬቲዴ ሳሉዋ ኬሶዋፔ ጉዬ፣ ዉዲያ ህሚያዋንቱ፡ «ጎዳይ ኑሲ ቆንጨሴዳዋ፣ ሃዋ ሃኔዳ ዩዉዋ ቤዓናው ቤቴሊህሜ ቦይቱ» ጌቲቴዲኖ።

16 አንቱንቱካ ኤሌሊዴ ቤዲኖ። ማይራሞኔ ዮሴፋ ዴሚዴ፣ ጋጪኖ ናዓይካ ጋጳቲያን ጊሴዳዋ ቤዔዲኖ።

17 ሃዋፔ ጉዪያን ጉላ ናዓ ዲራው ኦዴቴዳዋ ቆንጨሴዴ ኦዴዲኖ።

18 ሃዋ ሲሴዳ ኡባይ አንቱንቱ ኦዴዳ ዩዉዋን ማላሌቴዲኖ።

19 ማይራማ ቃይ ሃዋ ኡባ ባሬ ዋዛናን ኦይቃዴ ቆፓዴ ጋሚዳዲ።

§ 2:7 ባይራ ናዓ፡ አሲራዔሊያ አሳይ ዩሌቴዳ ናዓ ኡባ ጎሊያንካ ያሳው ቤሲያዋ ጊኖ። * 2:7 ጋጳቲያ፡ ሃ ሚሻይ ሚያይ ሚያባይ ሳዓን ላሌቴናን ማና ማላ ዩጊዴ አሚያባ።

20 ወዲያ ህመምቸካ ኡባ ዩዉ ኡንቱንቶ ኦዴቲዋዲን ሃኒና ዴሞ ዲራው፡ ሲሴዳዎኔ ቤዔዳዎ ኡባው ያሳ ቦንቹዲኔ ጋላቲዴ ሲሜዲኖ።

21 ናዓው ሆሰቱን ጋላሳ ጊዲና ቃፃሬቲያ ዎዲ ጋኮ ዎዴ፡ ኢ ኣቲ ኡሉዋን ኣታናፔ ካሴ፡ ኪታንቻይ ኬሶ ሱንፋን፡ ዩሱሳ ጌቲቲዳ።

ዩሱሲ ጌሻ ጎሊያን ያሳው ሽጴቴዳ

22 ሙሴ ዎጋ ማራዲን ጌዪያ ዎዲ † ፖሌቲዳ ዎዴ ዮሴፎኔ ማይራማ ጋጨኖ ናዓ ያሳው ሽጴናው ዩሩሳላሚ ኣኪ ቤዲኖ።

23 ሄዌኔካ ጎዳ ዎጋን፡ «ኣቲማ ናዓ ጊዴዳ ባይራ ናዓይ ‡ ኡባይ ያሳው ዲማቲዳዎ ጊዳናዎ» ጌቲቲ ፃፌቲዳዎዲኔ።

24 ቃሲካ ጎዳ ዎጋን፡ «ላዑ ደጎማቲዎ ዎይ ላዑ ሃራጶ ማራቲዎ» ጌቲቶዎዲን፡ ጎዳው ያርሹዎ ያርሻናው ኣፌዲኖ።

25 ሄ ዎዴ ፃሎኔ ጌንጫ ጊዴዳ ሲሞና ጌቲቲያ ኢቲ ቢታኒ ዩሩሳላሚን ዴዔ። ኢካ፡ ኢሰራዔሊያ ኣሳው ኣቶቲላ ሂዶታ ናጊያዎኔ ኣያና ጌሻይ ኣ ቦላን ሹምፔዳ ኣሳ።

26 ጎዳን ኦኬቲዳ ኪሪሰቶሳ ቤዔናን ሃይቄናዎ ኣያና ጌሻን ኣው ቆንጨሴዳ።

27 ኢካ ሄ ዎዴ ኣያና ጌሻይ ካሌሊና፡ ጌሻ ጎሊያ ጌሌዳ። ናዓ ዩላዎንቲ ኤሪያ ዎጋ ማራዲን፡ ኮሺያዎ ኣው ፖላናው ጉላ ናዓ ዩሱሳ ኦይቄዴ ጌሎ ዎዴ፡

28 ሲሞኔ ሞኪ ኣኪ ናዓ ኢዲሚዴ ያሳ ጋላቲዴ ሃዎ ያጌዳ፡

29 «ጎዳው፡ ኔኒ ቃላ ጌሎ ማራዲን ሃዒ ታና ኔ ኣይሊያ ሳሩዎን ኔኮ ኣፋ።

30-31 ጋሱካ፡ ታ ኣይፋቲ ኣሳ ኡባ ሲንፋን ኔኒ ገጊሴዳ፡ ኣሺያ ሂዶታ ቤዔዲኖ።

32 ሄዌካ ኢሰራዔሊያ ጊዴና ኣሳው ቆንጨፋ ኢሚያ ፖዑዎ።

ቃሲ ኔ ኣሳው ኢሰራዔሊው ቦንቹዎ።»

33 ዮሴፎኔ ኣ ዲያ ኣ ዲራው ሃሳዬቲዳ ዩዉዎሲ ማላሌቲዲኖ።

2:21 ዎግ 12:3፤ ሉቅ 1:31 † 2:22 ጌዪያ ዎዲ፡ ኣዪሁዳቲዎ ማጫ ኣሳይ ኣቲማ ናዓ ዩሎዎፔ ጉዪያን፡ «ጌሻ ጊዲኩ» ያጊ ቆፐኖ። ቃይካ ሄ ናዓይ ቃፃሬታና ጋካናው ኢካ ሶዪፔ ኬሴናዲን ኡዴታው። ሃ ዎዲ፡ ጌዪያ ዎዲያ ጌቲቲ። ‡ 2:23 ባይራ ናዓይ፡ 2:7 ጻሊቲ። 2:23 ኬሰ 13:2፣ 12

34 ሲሞኒካ እንጂዳ ማይራሞ፡ «ሃዌ ናዓይ ኢስራዔሊያን ጩራቱዋሲ ዴንዲዋሲኔ ኩንዳፋው ጋሶ ጊዳናው፡ ቃሲካ ኢታ ሃሳዪያዋንቱሲ ማላ ጊዳናው ደራቲዳ።

35 ጩራቶካ ዋዛና ቆፋይ ቆንጮዋ ጊዳናው፡ ኔ ሸምጥካ ማሻን ቃንጾዋዳን ሴሌታናዋ » ያጌዳ።

36 ቃሲካ ኣሴራ ያራፔ ጊዳዳ ፓኲዔላ ናታ ሃኖ ጌቲቲያ ናባታ ዴዓው፤ ኢዛካ ሎይላ ጨማዱ። ባሬ ዋደሮቲላን ጌሌዳ ኣሲናና ላፑ ላይላ ዴዔዳዉኖ።

37 ኢዚ ላይላይካ ሆሰፑን ታማኔ ኦይዲዋ ጊዳና ጋካናው ጋላሳኔ ቃማ ጌሻ ጎሊያፔ ሻኬቲናን ጾማኒኔ ዋሳን ከቲታዳ ኣምዔ ስ ጊዳዳ ጋሚዳድ።

38 ሄ ዋዴካ ሸቃዴ ጾሳ ጋላታዲ፤ ቃሲካ ዬሩሳላሚ ኣሳይ ዋዜታናው ናጊያዋንቶ ኡባቶ ጋጨኖ ናዓ ዬሱሳባ ኦዳዲ።

ዮሴፎን ማይራማ ናዚሬቲ ሲሜዲኖ

39 ዮሴፎን ማይራማ ጎዳ ሂጊያን ኣዛዜቲዳዋ ኡባ ፖሎዋፔ ጉዬ ጋለላ ኣዉራጃን ዴዒያ ባሬንቲ ካታማ ናዚሬቲ ሲሜዲኖ።

40 ጉላ ናዓይካ ዲጨዴኔ ሚኒዴ ቤዳ፤ ኣጵ ኤራኒካ ኩሜዳ፤ ጾሳ ኣጵ ከካቲላይ ኣቦላን ሸምፔዳ።

ጉላ ናዓ ዬሱሲ ጌሻ ጎሊያን

41 ዮሴፎን ማይራማ ላይላን ላይላን ፓሲጋ ባላ ቦንቻናው ዬሩሳላሚ ካታማ ቢኖ።

42 ናዓዉካ ታማኔ ላዑ ላይላ ጊዶ ዋዴ ደያዳን ባላው ሂኒ ዬሩሳላሚ ከሴዲኖ።

43 ባላ ፖሎዋፔ ካላ ባሬንቲ ጎሌ ኡንቲንቲ ሲሞዴ ጉላ ናዓ ዮሱሲ ዮሴፎን ማይራማ ኤሬናን ዬሩሳላሚን ኣቲ ኣጌዳ።

44 ኡንቲንቲና ኢቲፔ ዴዒያዋ ማላቲና ኢቲ ጋላሳ ኦጊያ ሃማቲዲኖ። ጉዬፔ ቃሲካ ባሬንቲ ዳባቲዋናኔ ባሬንቲ ሲቄቲያዋንቲ ማታን ኮሻ ደሜዲኖ።

45 ጳዮ ዋዴ ኮዪዴ ሂኒ ዬሩሳላሚ ሲሜዲኖ።

46 ሄዙ ጋላሳፔ ጉዬ፡ ታማሪሲያዋንቲ ጊዶን ዮሱሲ ኡቲዴ ኡንቲንቲ ጊያዋ ሲሲዴኔ ኡንቲንታ ኦቺዴ ጌሻ ጎሊያ ጋርሳን ዴዒያዋ ቤዒዲኖ።

§ 2:37 ኣምዔ፡ ኣምዔ ጉሳይ ኣሲናይ ሃይቄና ጌሌናን ጋሚዔዳ ማጫዉኖ። ሃ ፓይዲዋን ፃፊቲዳ ሚሺራታ ላፑ ላይላ ፃላላ ኣሲናና ጋሚዎዋፔ ጉዬ 84 ላይላ ኡባ ኣምዔ ጊዳዴ ጋሚዳድ። 2:39 ማኮ 2:23 2:41 ከሰ 12:1-27፤ ዛር 16:1-8

47 ሲሲያዎንቱ ኡባቱካ፡ አ አከካኒኔ አ ዛሩዋን ማላሌቲዲኖ።
 48 ዮሴፎኔ አ ዲያ አ ቤዖ ዎዴ ማላሌቲዲኖ። አ ዲያካ፡ «ታ ናዓው፡ አያው ኑና ሃዋዳን ኦሳይ? ኔ አቡኔ ታኔ ኔና ኮዪዴ፡ ዳር ሜቶቲዶ» ያጋዱ።

49 ዬሱሲካ ኡንቱንቶ፡ «አያው ታና ኮዪቲ? ታ አቡ ጎሌን * ዴዓናው ታው ኮሺያዎ ኤሪቤይኪቲ?» ያገ ዛሬዳ።

50 ሄዎ ያገ ኦዶፔ አቲን፡ ኡንቱንቶ ኢ ኦዴዳ ዬዉ አያ ገንቶ ጌሊቤና።

51 ሄዎፔ ሲሚዴ፡ ኡንቱንቱና አቲፔ ሂኒ ናዚሬቲ ቤዳ፤ ሄዎንካ ኡንቱንቶ አዛዜቲ። አ ዲያካ ሄዎ ኡባ ባሬ ዎዛናን ዎላዲ።

52 ዬሱሲካ ኤራኒኔ ጌሳን፡ ሳባኒካ ያሳኔ አሳ ሲንሳን ዲጩዳ።

3

ፃማቂያ ዮሃንሲ ዬሱሳው ኦጊያ ገገሴ
 (ማት 3:1-12፤ ማር 1:1-8)

1 ዲባሪዮሳ ጌቲቲያ ካቲ ካዉቲዳ ታማኔ ኢቼሽሌያ ላይላን ጳጉጻናዎያ ጳላዎሲ ዪሁዳ ሞዲያ ዎዴ፡ ሄሮዲሴ ጋሊላን ኦይዴንሌያ ሻኩዎ ሞዲያ ዎዴ፡ አ አሻይ ፒሊጳሲካ ኢፀሪያኒኔ ዪርኮንዶሳን ኦይዴንሌያ ሻኩዎ ሞዲያ ዎዴ፡ ሊሳኒዮሲካ አቢሌኔን ኦይዴንሌያ ሻኩዎ ሞዲያዎ ገዲዴ ሞዲ ዴዒሺን።

2 ሃኒኔ ቄያፋይ ቄሳቱዎ ካፓቱዎ * ገዲዴ ዴዒሺን፡ ያሳ ቃላይ ዛካራሳ ናዓ ዮሃንሳኮ ሜላ ቢታን ዬዳ።

3 ዮሃንሲ ዮርዳኖሳ ሻፋ ሄራ ኡባ ቢዴ፡ «ሃንቲ ናጋራይ አቶ ጌቲታና ማላ ናጋራ ፓዲዴ ፃማቂቲቲ» ያገ ታማሪሴዳ።

4 ናቢያ ኢሲያሳ ማፃፋን ፃፊቲዳ ቃላዳን፡
 «ሜላ ቢታን ዋሲያ ቢታኒያ ኮሻይ፡

ሳዳው ኦጊያ ገገሲቲ፤
 አ ኦጊያካ ሱሪሲቲ።

5 « ኦላይ ኡባይ ኩዎ፤
 ዴሪኔ ዞዚ ዴንባ ገዶ፡
 ገጌና ኦጊ ኡባይ ገሳ።

* 2:49 ታ አቡ ጎሌን፡ ጉሳይ፡ ታ አቡ ኪቲዳ ኦሱዎ ፖላናው ቤሴ ጉሳ። 2:52
 1ሳዎ 2:26፤ ለዎ 3:4 * 3:2 ቄሳቱዎ ካፓቲ ሃኒኔ ቄያፋይ፡ ሃና ካፖቲላ ዎዲ ዬሱሲ ዬሌታናፔ ካሴ 6-15 ላይላ ጋካና። ቄያፋ ጌቲቲያ ሃና ቦሉ 18-37 ላይላ ካፖ ገዲዴ ዬሱሳ ዬሌታፔ ካሴ ጋሚዳዳ። 3:4 አሳ 40:3-5

ሃንቺር ኦጊ ኡባይ ሊቆ።

6 « ሄዋ ጊደፔ አሳይ ኡባይ ያሳይ አሺያዎ ቤዓና » ያጌዳ።

7 ሃዋ ዲራው ዮሃንሲ አ ኩሺያን ፃማቄታናው ኬሴዳ አሳው ሃዋዳን ኦዲዎ ደሜዳ፤ «ሄንቴኖ፣ ሾሻ ናቶ፤ ዪያ ሃንቁዋፔ አታና ማላ ሂንቴንታ ኦኒ ማቄዳ?»

8 ሲሚ ሂንቴንቱ ናጋራፔ ሲሜዳዋንቶ ቤሲያ አይፊያ አይፊቴ። ሂንቴንቱ ዋዛናን አብራሃሞ ኑ አቡ ዴዔ ጎፒቴ። ያሳይ አብራሃሞሲ † ናና ሃ ሹቻቱዋፔ ዴንላናው ዳንዳዬ ያጋዴ ታኒ ሂንቴንቶ ኦዲይ።

9 ሃዒ ኡባ ቤዒ ሚላ ፃጵዋን ቃንፃናው ገጊ ኡቴዳ፤ ሲሚ ሎዖ አይፊያ አይፊና ሚላይ ኡባይ ቃንፃቲዴ ታማን ኦሌታናዋ።»

10 «ያቲና ሃዒ ኑ አያ ኡዳኔ?» ያጊዴ አ ጮራ አሳይ ኦቼዳ።

11 ዮሃንሲካ፣ «ላቡ ማዩ ዴዒያዌ ባይናዎ አዎ፤ ቁማይ ዴዒያዌካ ባይናዎ ጊሾ» ያጊ ዛሬዳ።

12 ቃራፃ ሺሺያዋንቱካ ፃማቄታናው ዪዴ፣ «ታማርሲያዎ፣ ኑ አያ ኡዳኔ?» ያጊ ኦቼዲኖ።

13 ኢ ኡንቴንቶ፣ «ጌቴቶዋፔ አጼ ቃራፃ አሊ ሺሾፒቴ» ያጊ ኦዴዳ።

14 ሄዋፔ ካላ ዎታዳራቴ፣ «ኦኒሺ፣ አያ ኡዳኔ?» ያጊ አ ኦቼዲኖ።

ዮሃንሲካ፣ «አሳ ሻሉዋ ናቁዋን ቦንቂ አኮፒቴ፣ አናኔ ዎርዲዋን ዎቶፒቴ፣ ሂንቴንቱ ዲርጉ ሂንቴንቶ ጊዳና» ያጊ ዛሬዳ።

15 ሄ ዎዴ አሳይ ኡባይ ኪሪሰቶሳ ዩሳ ናጊዴ ዴዒያ ዲራው ዮሃንሳ፣ «ሃዌካ ኪሪሰቶሳ ጊዴናን አቴና» ያጊዴ ባሬንቱ ዎዛናን ማሌዲኖ።

16 ዮሃንሲ ኡባቱዋካ፣ «ታኒ ሃላን ፃማቃይ፤ ጊደፔ አቲን ታፔ ዎልቃማይኔ ታኒካ አ ጫማ ቃሹዋ ቢላና ዳንዳዬናዌ † ቢር ናናዎ፤ ኢካ አያና ጌሻኒኔ ታማን ፃማቃናዎ፤

17 አ ኩሺያን ካላ ዳላፔ ሻኪ ጌሺያ ላይዳይ ዴዒ። ካላ ኡዲማን ቡኮዋ ጌሺ ፑኒዴ አይፊያ ዲዪያን ቆሌ፤ ሺን ዳላ ቶዔና ታማን ጉዴ።»

3:7 ማት 12:34፤ 23:33 † 3:8 አብራሃሞሲ ናና፣ አዪሁዳ አሳቱ ባሬንታ ያሳይ ደሬዳ አሳ ያጊ ቆፒኖ። ጋሱኔካ፣ ቤኒ ሂደታ ቃላይ ያሳፔ ኑ አቡ አብራሃሞሲ አሜቴዳ ያጊዴ ቆፒያ ዲራሳ። 3:9 ማት 7:19 3:12 ለቅ 7:29 ‡ 3:16 አ ጫማ ቃሹዋ ቢላና ዳንዳዬናዌ፣ ሃዌ ቆማ ዎይ ዳንጋዲራቲ ኦሱዋ።

18 የሃኒሲካ ሃራ ጮራ ቃላን ጮራ አሳ ማቂዳ ሚሺራቸዋ ቃላ ኦዳዳ።

ሄሮዲሴ ፃማቂያ የሃኒሳ ቃቹዳ

19 ጋሊላ ሞዲያ ሄሮዲሳ ቃሲ ባሬ ኢሻ ፒሊጶሳ ማቻቶ ሄሮዲያዶ ኢ አኩዳ ዲራዉኔ ሃራካ ጮራ ኢታ ኪታ ኪቲቶ ዲራው፣ የሃኒሲ ሴሬዳ።

20 ሃዋ ዲራው ሃ ኡባ ጉጂዳ ሄሮዲሴ የሃኒሳ ቃሾ ጎሌ ጌልሴዳ።

**የሃኒሲ ዬሱሳ ፃማቂዳ
(ማት 3:13-17፤ ማር 1:9-11)**

21 አሳይ ኡባይ ፃማቂቲ ሲሞዋፔ ጉዬያን ዬሱሲ ፃማቂቲዳ። ኢ ዋሲ ዳዲሺንካ ሳሉ ዶዬቲ አጌዳ።

22 ጌሻ አያናይካ ሃራጲያ ማላቲዳ አ ቦላን ዋዴዳ። ሳሉዋፔካ፣ «ታ ዶሲያ ናባይ ኔና፤ ኔናን ታኒ ናሹታይ» ያገያ ቃላይ ዬዳ።

**ዬሱሳ ዬሌታይ ካሴ ጉዬ ማዪዛፔ ዳዲያ ፓይዱዋ
(ማት 1:1-17)**

23 ዬሱሲ ታማርሱዋ ዶሞዳ አው ሃታሙ ላይላ ጊዳዳ፤ ጮራ አሳይካ ባሬንቶ ማላቶዋዳን አ የሴፎ ናባ ያገና፤ የሴፎ ኤሌ ናባ፤

24 ኤሌ ማቲ ናባ፤ ማቲ ሌዊያ ናባ፤ ሌዊ ሚልኬ ናባ፤ ሚልኬ ዮና ናባ፤ ዮኒ ዮሴፎ ናባ፤

25 ዮሴፎ ማታቲያ ናባ፤ ማታቲ አሞፃ ናባ፤ አሞፃ ናሆሜ ናባ፤ ናሆሜ ኤሲሊሜ ናባ፤ ኤሲሊሜ ናጌ ናባ፤

26 ናጌ ማዓቲ ናባ፤ ማዓቲ ማታቲዩ ናባ፤ ማታቲዩ ሴሜዬ ናባ፤ ሴሜዬ ዮሴቆ ናባ፤ ዮሴቆ ዮዳ ናባ፤

27 ዮዳ ዮናና ናባ፤ ዮናኒ ሬሴ ናባ፤ ሬሴ ዜሩባቤላ ናባ፤ ዜሩባቤላ ሳላቲያላ ናባ፤ ሳላቲያሌ ኔሌ ናባ፤

28 ኔሊ ሚልኬ ናባ፤ ሚልኬ ሃዴ ናባ፤ ሃዴ ዮሳሴ ናባ፤ ዮሳሴ ቆሳማ ናባ፤ ቆሳሚ ኤልማዶሜ ናባ፤ ኤልማዶሜ ኤሬ ናባ፤

29 ኤሬ ዮሴዔ ናባ፤ ዮሴዔ፣ ኤሊዔዜራ ናባ፤ ኤሊዔዜሬ፣ ዮራሜ ናባ፤ ዮራሚ ማፃቲ ናባ፤ ማፃቲ ሌዊያ ናባ፤

30 ሌዊ ሲሞና ናባ፤ ሲሞኔ ዪሁዳ ናባ፤ ዪሁዳይ ዮሴፎ ናባ፤ ዮሴፎ ዮናና ናባ፤ ዮናኒ ኤሊያቂማ ናባ፤

3:20 ማት 14:3-4፤ ማር 6:17-18 3:22 ዶሞ 22:2፤ ማዝ 2:7፤ ኢሳ 42:1፤ ማት 1:17፤ ማር 1:11፤ ሉቅ 9:35

- 31 ኤሊያቄሚ ሜሊያ ናዓ፤ ሜሊዬ ማዪናና ናዓ፤ ማዪናኒ ማፃቱ ናዓ፤ ማፃቱ ናታኔ ናዓ፤ ናታኔ ዳዊቱ ናዓ፤
- 32 ዳዊቱ ኢሴይ ናዓ፤ ኢሴይ ኢዮቤዳ ናዓ፤ ኢዮቤዳ ቦዔዛ ናዓ፤ ቦዔዛ ሳልሞና ናዓ፤ ሳልሞኒ ናሂሾና ናዓ፤
- 33 ናሂሾኒ አሚናዳባ ናዓ፤ አሚናዳቢ ራማ ናዓ፤ ራሚ አሪና ናዓ፤ አሪናይ ሄዝሮና ናዓ፤ ሄዝሮኒ ፔሬዛ ናዓ፤ ፔሬዚ ዪሁዳ ናዓ፤
- 34 ዪሁዳይ ያዩቆባ ናዓ፤ ያዩቆቢ ዪሳቃ ናዓ፤ ዪሳቄ አብራሃሞ ናዓ፤ አብራሃሞ ታራ ናዓ፤ ታሪ ናኮራ ናዓ፤
- 35 ናኮሪ ሴሮሄ ናዓ፤ ሴሮሄ ራጋዎ ናዓ፤ ራጋዎ ፔሌጋ ናዓ፤ ፔሌጊ አቤራ ናዓ፤ አቤሪ ሳላ ናዓ፤
- 36 ሳሊ ቃይናና ናዓ፤ ቃይናኒ አርፋኪሲዬ ናዓ፤ አርፋኪሲዬ ሴሜ ናዓ፤ ሴሚ ሮሄ ናዓ፤ ሮሄ ላሜሄ ናዓ፤
- 37 ላሜሄ ማቱሳላ ናዓ፤ ማቱሳሊ ሄናኬ ናዓ፤ ሄናኪ ያሬዳ ናዓ፤ ያሬዲ ማላሊዔል ናዓ፤ ማላሊዔሊ ቃይናና ናዓ፤
- 38 ቃይናኒ ሄናሳ ናዓ፤ ሄናሲ ሴቴ ናዓ፤ ሴቴ አዳማ ናዓ፤ አዳሚ ያሳ ናዓ።

4

ዩሱሳው ሺቄዳ ፃላሂያ ፓጩያ

(4:1-13፤ ማጉ 4:1-11፤ ማር 1:12፤ 13)

- 1 ዩሱሲ ጌሻ አያናን ኩሚዳ ዮርዳኖሳ ሻፋፔ ሲሜዳ፤ አያናን ሚላ ሳዓ ካሌሴቲዳ ቤዳ።
- 2 ሄዋን ኦይታሙ ጋላሳ ዳቢሎሳን ፓጩቱዳ። ሄ ጋላሳቱዋን አያኔ ሚቤና ዲራው ወርሴላ ፖሎዋ ሄራን ኢ ኮሻቱዳ።
- 3 ዳቢሎሲካ፡ «ኔኒ ያሳ ናዓ ገደፔ ሃ ሹቻ፡ (ኡኪላ ገዳ) ጋዴ አዛዛ» ያጌዳ።
- 4 ዩሱሲካ፡ « (አሳይ ያሳ ቃላ ኡባፔ አቲን ኡኪላ ፃላላን ዴዔና) ጌቴቲ ያሳ ቃላን ፃፊቱዳ» ያገ ዛሬዳ።
- 5 ዳቢሎሲካ ቋቃ ገዴዳ ዴሪያ ዩሱሳ ኬሲዴ አላሚያ ካወቱላ ኡባ ሊጶ አይፊ ሲማናው ቤሴዳ።
- 6 ዳቢሎሲካ፡ «ሃ ካወቱላ ማታይኔ ቦንቹ ኡባይ ታው አሜቱዳ። ታኒ ታ ደሲያ ኦሲኔ አማና፤ ኔወካ አማና።
- 7 ሄዋ ገዲያ ዲራው፡ ኔ ታ ሲንላን ታው ጎዪኖፔ ሃ ኡባይ ኔሳ ገዳናዋ» ያጌዳ።

8 ዩሱሲካ ዛሬዳ፡ « ሳዳ ያሳው ጎዪና፡ ኣ ፃላላ ጎዳያን ጌቲቲ ያሳ ቃላን ፃፊቲዳ» ያጌዳ።

9-11 ዳቢሎሲካ ዩሱሳ ዩሩሳላሜ ኣፊዴ ጌሻ ጎሊያ ሁጲያ ኬሲዳ፡

« ሳሳይ ኔና ናጋና ማላ

ኪታንቻቱዋ ኪታናዋ፡

ኡንቱንቱካ ኔ ጌዲ ሹቻን ቆቤቲና ማላ

ባሬንቱ ኩሺያን ኔና ዴንፋናዋንታ

ያጌቲዳ ጌሻ ማፃፋን ፃፊቲዳ፤

ኣኔ ኔኒ ያሳ ናዓ ጊደፔ

ሃዋፔ ዱጌ ኔና ኦላ»

ያጌዳ።

12 ዩሱሲካ ዛሬዳ፡ « ኔ ጎዳ ያሳ ፓጮፓን ጌቲቲዳ» ያጌዳ።

13 ዳቢሎሲካ ፓጪያ ኡባ ዉርሶዋፔ ጉዬ ጉፋ ዋዴው ዩሱሳፔ ሻኬቲዳ።

ዩሱሲ ጋሊላን ኦሱዋ ዶሜዳ

(ማት 4:12-17፤ ማር 1:14፤ 15)

14 ዩሱሲካ ኣያና ዋልቃን ጋሊላ ጋዲያ ሲሜዳ። ኣ ዋሪካ ዩሹዋን ዴዒያ ኡባ ጋኬዳ።

15 ዩሱሲካ ኣዪሁዳቱዋ ዋሳ ጎሊያን ታማሪሲዳ ኣሳን ኡባን ጋላቲቲዳ።

ናዚሬቲን ዩሱሳ ኣጸዲኖ

(ማት 13:53-58፤ ማር 6:1-6)

16 ኢ ባሬ ዲጮ ካታማ ናዚሬቲ ዩዳ፤ ካሴ ኦሲያዋዳንካ ሳምባታ ጋላሲ ኣዪሁዳቱዋ ዋሳ ጎሌ ጌሊዴ ናባባናው ዴንዲዴ ኤቄዳ።

17-19 ናቢያ ኢሲያሳን ፃፊቲዳ ፃፃቲዳ ማፃፋ ኣው ኢሜዲኖ። ሄ ማፃፋ ቢሊዳ፡

«ታኒ ሂዩሳቱዋሲ ሚሺራቹዋ ኦዳናው

ኦኬቲዳ ዲራው ጎዳ ኣያናይ ታ ቦላን ዴዔ።

ቃሹቲዳዋንቲሲ ቢሌፋ፡

ቆቃቱዋሲ ጂላና ማላ ኦዳናው፡

ቃይካ ናቄቲዳዋንታ ናቄዋፔ

ኬሳና ማላ ዶሴቲዳ ጎዳ ላይፋ

ኦዳና ማላ፡ ታና ኪቲዳ»

ጌቲቲ ፃፊቴዳሳ ዳሜዳ።

20 ማፃፋካ ፃፂዳ ኣዲሁዳቲዋ ዋሳ ጎሊያን ኦሊያዎ ኢሚዳ ኡቲዳ። ኣዲሁዳቲዋ ዋሳ ጎሊያን ዳዒያ ኣሳይ ኡባይ ኣ ጫዲ ፃሌዳ።

21 ዬሱሲካ፣ «ሃቼ ሂንቴው ናባቤቲና ሂንቴንቲ ሲሴዳ ቃላይ ፖሌቴዳ» ያጌዳ።

22 ኡባይ ኣው ማርካቴዲኖ። ኣ ዶናፔ ኬሲያ ኣጵ ኬካቴላ ቃላፕ ዳንዴዳዋን ማላሌቲዳ፣ «ሃዌ ዮሴፎ ናባ ጊዳይ?» ጌዲኖ።

23 ዬሱሲካ ሲጼ ባንታን ሃ ለሚሱዋን፣ «ሂንቴንቲ ታው ሓሊያ ጎዳው፣ ኔ ሁጲያ ፓላ፣ ኔኒ ቂፊሪናሆማን ኦሊና ኦ ሲሶዋ ኡባ ሃ ኔ ካታማኒካ ቃሲ ኦላ) ያጊዳ ኦዲታ» ያጌዳ።

24 ቃሲካ፣ «ቱሙዋ ያጋይ፣ ናቢ ባሬ ዬሌቶ ጋዲያን ጋማካ ባንቼቴና።

25 «ዬወዋን ቃሲ ቱሙዋ ኦዳይ፣ ኤላሳ ዋዲያን ሄዙ ላይላይ ኡሱቱን ኣገና ኢራይ ቡኬናን ኢፂና ሳባ ኡባን ዋልቃማ ኮሻይ ጌሌዳ ዋዴ፣ ኢሰራዔሌን ጮራ ኣምዓቱ ዳዒኖ።

26 ኤላሲካ ሲዶና ጋዲያን ዳዒያ ሰራፍታ ሄራ ኢቲ ኣምዓቲኮ ከቲቴዳፔ ኣቲን ኦኮኔ ከቲቲ ቤና።

27 ናቢያ ኤልሳባ ዋዲያንካ ኢሰራዔሊያን ጮራ ኦሉዋ ሃርጊያን * ኦይቄቴዳዋንቲ ዳዒኖ፤ ሶሪያ ቢታን ዳዒያ ኒዒማኔፔ ኣቲን ኡንቲንቲፔ ኦኒኔ ፓፂ ቤና» ያጌዳ።

28 ኣዲሁዳቲዋ ዋሳ ጎሊያን ዳዒያዋንቲ ኡባቲ ሃዋ ሲሲዳ ዳሪሲዳ ሃንቄቴዲኖ።

29 ኡንቲንቲ ዳንዲዳ ዬሱሳ ካታማፔ ጋፃ ኬሲዳ ዳጌ ኦላናው ካታማይ ኬፃቴዳ ዳሪያ ሁጲያ ኣፊዲኖ።

30 ሺን ዬሱሲ ኡንቲንቲ ጊዲዋና ኣጲዳ ቤዳ።

ኢታ ኣያናይ ኦይቄዳ ቢታኒያ
(4:31-37፤ ማር 1:21-28)

31 ሄዋፔ ጉዩያን ዬሱሲ ጋሊላ ጋዲያን ዳዒያ ቂፊሪናሆማ ካታማ ቤዳ። ሳምባታ ጋላሳንካ ኣሳ ታማሪሴዳ።

32 ኢ ታማሪሴያ ቲሚርቲ ማታን ጊዲያ ዲራው ሲሴዳ ኣሳይ ኡባይ ማላሌቴዲኖ።

4:17-19 ኣሳ 61:1-2 4:24 ዮህ 4:44 4:25 1ካት 17:1 4:26 1ካት 17:8-16 * 4:27 ኦሉዋ ሃርጊያ፡ ያሳ ቃላይ ታማሪሴቲያ ዋዲያ ኡባን፣ «ኦሉዋ» ጊያ ቃላይ ጋልባ ቦላን ሳኪያ ሳኩዋ ኡባሲ ኣኬቲያዋ። 4:27 2ካት 5:1-14
4:32 ማት 7:28፣ 29

33 አዩሁዳቱዋ ዋሳ ጎሊያን ኢታ አያናይ ኮይቄዳ ቢታኒ ዳዔ፤ ባሬ ኮሻ ጾቄ ኡዲ ዋሲዳ፤

34 «ሃያ ጎዶ አጋሪኪ ናዚሬቲያ ዩሱሳ፤ ኮሲ ኔናና አይ ኢቲፔቲሳይ ዳዔ? ኑና ባዩዛናው ያዲ? ኔኒ ኦኔንቶ ኤራዲ፤ ኔኒ ያሳ አዉ ኪቲዳ ጌሻ ጊዲኪ!» ያጌዳ።

35 ዩሱሲካ፣ «ጮቡ ጋ፣ አፔካ ኬሳ» ያጌ ሴሬዳ። ኢታ አያናይ ቢታኒያ ኡንቱንቱ ጊዲዋን ኩንዲሲዳ አይኔ ቆሄናን አፔ ኬሴዳ።

36 አሳይ ኡባይ ማላሌቲዳ ኢቱ ኢቶ፣ «ሃዌ አያ ቃሌ? ባሬው ዳዔያ ማታኒኔ ዋልቃን ኢታ አያናቱዋ ሴሬ፤ ቃሲ ኢታ አያናይካ ኬሴ» ያጌዳ ሃሳዬዲና።

37 አ ዋሪካ ሄ ዩሹዋን ዳዔያ ጋዲያ ኡባ ጋኬዳ።

ዩሱሲ ጮራ ሃርጋንቻ አሳ ፓሌዳ
(ማጥ 8:14-17፤ ማር 1:29-34)

38 ዩሱሲ አዩሁዳቱዋ ዋሳ ጎሊያፔ ዳንዲዳ ሲሞና ጎሊያ ጌሌዳ፣ ሲሞና ቦሎታታ ዋልቃማ ቆጱዋ ሃርጊያን ሃርጌታዳ ጌሴዳዉኒው ዩሱሲ ኢዘ ፓሳናዳን አሳይ አ ዋሴዳ።

39 ኢ ማታን ኤቄዳ ቆጱዋ ሃርጊያ ሴሪና፣ ሃርጌ ዩዲሼዳ፤ ሄዋዲያንካ ዳንዳዳ ኡንቱንቶ ኪቲታዲ።

40 አዋይ ዉሎ ዋዲያን ዲማ ዲማ ሃርጊያን ኮይቄቲዳ ሃርጋንቻቱዋ ኡባ አኮ አሄዲና፤ ኢካ ኢቱዋ ኢቱዋ ቦላ ባሬ ኩሺያ ዋሴዳ ፓሌዳ።

41 ኢታ አያናቱካ፣ «ኔኒ ኪሪሰቶሳ ያሳ ናዳ» ያጌ ዋሲዳ ጮራ አሳፔ ኬሴዲና። ኢ ኪሪሰቶሳ ጊደዋ ኡንቱንቱ ኤሬዳ ዲራው ሃሳዬና ማላ ዲጌዳ።

ዩሱሲ ጋሊላን ታማሪሴዳ
(ማጥ 4:23-25፤ ማር 1:35-39)

42 ሳዓይ ዋንቶ ዋዳ አሳይ ባይናሳ ቤዳ፤ አሳይ ኡባይ አ ኮዩዳ ኢ ዳዔያሳ ዩዲና። ባሬንቱፔ ሻኬቲ ቤናዳን ዲጋናው ኮዩዲና።

43 ኢ ቃይ፣ «ሂኒ ሃራ ካታማቱዋሲ ባዳ ያሳ ካዉቲሳ ሚሽራቹዋ ቃላ ኦዳናው ኮሼ፤ ታኒ ኪቲቲዳዌ ሃዋ ዲራሳ» ያጌዳ።

44 ጋሊላን ዳዔያ አዩሁዳቱዋ ዋሳ ጎሊን ቃላ ታማሪሴዳ ጋሚዳ።

5

ዩሱሲ ኮይሮ ባሬና ካሊያዋንታ ዶሬዳ
(ማጥ 4:18-22፤ ማር 1:16-20)

1 እቲ ጋላሲ ዩሱሲ ገንጎሬጌ አባ * ጋፃን ኤቂዳ ዳዒሺን ጮራ አሳይ አኮ ሸቂዳ ፆሳ ቃላ ሲሳናው ሱጌቲ ዳዒኖ።

2 ሄ ዎዴ ላዑ ዎንጊራቱ † አባ ጋፃን ኤቆዎ ኢ ቤዔዳ፤ ሞሊያ ጲሪያዋንቱ ቃሲ ዎንጊራቱዎፕ ዎጲዳ ባሬንቱ ዳባ ሜጪ ዳዒኖ።

3 ዩሱሲ ዎንጊራቱዎ ጊደፔ ሲሞናዊኖ ጊዴዳወኒኒ ጌሊዴ ሳዓፔ ያ አባኮ ጉላ ሺሻናዳን ኦቼዳ። ሄዎፔ ጉዩ ዎንጊሪያ ቦላን ኡቲዳ አሳ ታማሪሱዎ ደሚዳ።

4 ታማሪሱዎ ቤሶዋፔ ጉዩያን ሲሞና፡ «ዎንጊሪያ ያ አባ ጪሙዋኮ ሺሺቲ፤ ሂንቲንቲ ዳባካ ሞሊያ ጲራናው ኦሊቲ» ያጌዳ።

5 ሲሞኒካ፡ «ጎዳው፡ ቃማ ኩሜንላ ዳቡሪ አቂዳ አዩኔካ አዩቂቤይኮ፤ ሺን ሃዒ ኔኒ ጎዋዳን ዳባ ኦሌቶ» ያጌ ዛሬዳ።

6 ሄዎዳንካ አሌዳ ዎዴ፡ ዳሮ ጮራ ሞሊያ አይቄዲኖ። ኡንቲንቲ ዳባቱካ ዲጃሬታናው ሃኔዲኖ።

7 ሃራ ዎንጊሪያን ዳዒያ ላጌላቱ ዪዴ ማዳናዳን ወቲዲኖ፤ ኡንቲንቲ ላዑ ዎንጊራቱዎንካ ሞሊያ ኩንሲና ዎንጊራቱ ሚቲቱሳ ደሚዲኖ።

8 ሲሞኒ ጲፃርሲካ ሃዎ ቤዔዳ ዎዴ ዩሱሳ ጉልባታን ኩንዲዳ፡ «ጎዳው፡ ታኒ ናጋራንቻ አሳ ጊደ ዲራው ታፔ ሻኩታ» ያጌዳ።

9 ሃዎ ጌዳዌ ኢኔ አናና ኢቲፔ ዳዒያዎንቲ ኡባይ ባሬንቲ አይቄዳ ሞሊያ ጮራቲላን ማላሌቲዲኖ።

10 ሄዎዳንካ ቃይ ሲሞና ላጌላ ጊዴዳዎንቲ ዛቢዲዮሳ ናናቲ ያዩቆቤኔ ዮሃኒሲ ማላሌቲዲኖ።

ዩሱሲካ ሲሞና፡ «ያዮፓ ሃዎፔ ጉዩያን አሳ ጲሪያዎ ጊዳናሳ» ጌዳ።

11 ኡንቲንቲካ ዎንጊራቱዎ ሃላፔ ጋፃ ኬሲዴ፡ ኡባባ አጊዴ ዩሱሳ ካሌዲኖ።

ዩሱሲ ኦሉ አይቄዳ ቢታኒያ ፓሌዳ
(ማጥ 8:1-4፤ ማር 1:40-45)

* 5:1 ገንጎሬጌ አባ፡ ጋሊላ አባሲ አሜቲዳ ዳማ ሱንላ። 5:1 ማጥ 13:1፣ 2፤ ማር 3:9፣ 10፤ 4:1 † 5:2 ዎንጊሪያ፡ ዎንጊሪያ ጌቲቶዌ፡ ዎጋ ሃላ ዎይ አባ ቦላን አሳይ ሄፊንላ ባጋ ፐናናው ጎዔቲያ ሚሻ። ሃይቆ አሳይ ሞጌቲያዎ ጊዴናዎ ኤራናው ኮሺ። 5:5 ዮሀ 21:3 5:6 ዮሀ 21:6

12 ዩሱሲ ካታማቱዋ፤ ኢቱዋን ዳዒሺን ኦሎ ተ፣ ቦላ ኡባ ሜዳ ቢታኒ ዳዒያዊ ዩሱሳ ቤዒዳ ኦ ሲንሳንካ ኩንዲዳ፣ «ጎዳው፣ ኔኒ ኮዮ፤ ታና ፓሳናው ዳንዳያ» ያገደ ዋሴዳ።

13 ዩሱሲካ ባሬ ኩሺያ ዩዲ ቦቹዳ፣ «ደሳይ ጌያ!» ጌዳ። ሄማንዲያንካ ኦሎ ኦ ዩዳዳ።

14 ዩሱሲ ኦ፣ «ሃዋ ኦሲኔ ኦደፓ። ሺን ቄሳኮ ባዳ ኔና ቤሳ። ሄዋ፤ ጉዬ ኦሎዋ ሃርጊያ፤ ፓፄዳዋሲ ማርካ ጊዳናዳን ሙሴ ሂጊያን ኦዛዜቱዳ ያርሹዋ ሺሻ» ጌዳ።

15 ጊደሺን ኦ ዋሪ ሎይሌ ኦኪዳ ቤዳ፤ ዳር ጮራ ኦሳይካ ዩሱሲ ኦዲያዋ ሲሳናዉኔ ባሬንቱ ሃርጊያ፤ ፓፃናው ሺቄዲኖ።

16 ዩሱሲ ጮራ ዋዳ ጌማሳ ቢዳ ዋሴ።

ዩሱሲ ቦላይ ሲሌዳ ቢታኒያ ፓሌዳ
(5:18-26፤ ማጉ 9:2-8፤ ማር 2:3-12)

17 ኢቲ ጋለሲ ዩሱሲ ታማሪሲዳ ዳዒሺን ጋለላ፤ ዩሁዳ ሄራ ኡባ፤ ዩሩሳላሜ ዩዳ ፓሪሳዋቱኔ ሂጊያ ታማሪሲያዋንቱ ኡቲ ዳዒሺን ሃርጋንቻቱዋ ፓሳና ማላ ያሳ ኦዉዋ ዋልቃይ ኦው ኢሜቲዳ።

18 ሄ ዋዳ ቦላይ ሲሌዳ § ኢቲ ቢታኒያ ኦማሬዳ ኦሳይ ሻንቻማን ቶኪ ኦሂ ጎሌ ጌልሲዳ ዩሱሳ ሲንሳን ዋሳናው ኮዩዲኖ።

19 ኦሳ ጮራቱላ፤ ዳንዳዳዋን ዩሱሳኮ ሺቃናው ዳንዳዩ ቤይኪኖ። ሄዋ ዲራው ቦላው ጊዒ ጎሊያ ካራ * ቃሪዳ ኦ፣ ሻንቻማና ኦሳ ጊደን ዩሱሳ ሲንሳን ዋሌዲኖ።

20 ዩሱሲካ ኡንቱንቱ ኦማኑዋ ቤዒዳ፣ «ሃ ቢታኔው፣ ኔ ናጋራይ ኦቶ ጌቲቲዳ» ያጌዳ።

21 ሙሴ ሂጊያ ታማሪሲያዋንቱኔ ፓሪሳዋቱ፣ «ሃዋ ያሳ ቦሪያዊ ኦኔ? ኢቲ ያሳ፤ ኦቲን ናጋራ ኦቶ ጋናው ኦኒ ዳንዳዩ?» ያገ ጭፋ ደሜዲኖ።

‡ 5:12 ኦሎዋ: 4:27 ያለቲ። § 5:18 ቦላይ ሲሌዳ: ሃዋ ጉሳይ ግሪኬ ቃላን «ፓራሎዋዳይ» ጌቲቲያዋ። ሃ ቃላ ቢሌላይ ኢንጊሊዘሉዋን «ፓራላዩዚኖ» ጉሳ። ሃ ላዓቱዋካ ዳወርሉዋን ቢሌላ ኢዋዳ፣ ከቹዳዋ ዋይ ቃፃና ማላ ዳቡሬዳዋ ጉሳ።

* 5:19 ካራ: ሃ ፓይዲዋን ጌቲቲዳ ጎሊያ ካራይ ዳወርዋ ማላ ጊደናዳን፣ ፓሌሰቲኔ ጋዳን ጎሊያ ቦላን ዳዒያ ካራይ ጌዳ ቄሪቲዳ ከፃቲ። ሄዋ ያቲዳ ቃይ ዳፊቲዳ ጋፃን ጋፃን ሃራ ሚላይ ቲጩቲና ሎይሌ ከፃቲ። ሄዋ ማላ ከፃይ ኦራላ ቃላ ጫቁዋ ዋዲያን ኤሬቲዳዋ።

22 ዩሱሲካ እንቱንቱ ቆፋ ኤሮ ዲራው ሃዋዳን ጌዳ፡ «አዩሲ ሂንቱንቱ ዎዛናን ሃዋዳን ቆፒቱ?»

23 ሔ ናጋራይ አቶ ጌቱቲዳ፤ ጋናዎፔኔ ሳንዳዳ ባ፤ ጋናዎፔ ሃቃዌ ማቲ?»

24 ዩዉዋን ቃሲ ሃዋ ታኒ ጌዳዌ፡ አሳ ናዓይ ቢታ ቦላን ናጋራ ማራናው ማታይ ዳዒያዎ ሂንቱንቱ ኤራናዳና።» ሃዎፔካ ጉንዳዳ ቢታኒያ፡ «ዳንዳ ኔ ሻንቻማ ቶካዳ ኔ ጎሌ ባ ጋይ» ያጌዳ።

25 ጉንዳይካ አሳ ሲንላን ዳንደዎሺን ባሬ ሻንቻማ ቶኪዳ ያሳ ጋላቲዳ ባሬ ሶይ ቤዳ።

26 ሃ ዎዳ ኡባቲካ ዳሪ ማላሌቲዳኖ፤ ያሳካ ጋላቲዳ፡ «ሃቼ ማላባ ቤዔዳ» ያጌዳ ያሻን ኩሜዳኖ።

ዩሱሲ ለዊያ ደሬዳ

(5:27-32፤ ማት 9:9-13፤ ማር 2:13-17)

27 ሃዎፔ ጉዩያን ዩሱሲ ከሲዳ ቤዳ፤ ለዊያ ጌቱቲያ ቃራፃ ሺሺያዌ፡ ቃራፃ ሺሺያሳን ኡቶዎ ቤዒዳ፡ «ታና ካላ» ጌዳ።

28 እካ ዳንዲዳ ኡባባ አጌዳ አ ካሌዳ።

29 ሃዎፔ ሰሚዳ ለዊ ባሬ ጎሌን ዳሮ ሸቢያ ገጊሴዳ፤ ጮራ ቃራፃ ሺሺያዎንቱኔ ሃራ ጮራ አሳይካ እንቱንቱና ኡቲዳ ሚዳዒኖ።

30 ፓሪሳዎቱኔ ሂጊያ ታማሪሲያ፡ እንቱንቱና ኦሊያዎንቱ፡ ዩሱሳ ካሊያዎንቱ ቦላን፡ «አዩሲ ቃራፃ ቃንዲያዎንቱና ናጋራንቻቱዎና ሚቱኔ ኡሺቱ?» ያጌዳ ዙዙሜዳኖ።

31 ዩሱሲካ፡ «ሃርጋንቻ አሳፔ አቲን ፓፃ አሳሲ አኪሚያ ኮሼና።

32 ታኒ ዩዳዌ፡ ናጋራንቻቱ ባሬንቱ ናጋራ ፓዲዳ ሲማናዳናፔ አቲን፡ ዲላቱዎ ያሳናው ያቤይኬ» ያጌ ዛሬዳ።

ዩሱሲ ያማባ ኦሼቲዳ

(5:33-39፤ ማት 9:14-17፤ ማር 2:18-22)

33 ሃዎፔ ጉዩያን ዩሱሳ፡ «ዮሃንሳ ካሊያዎንቱኔ ፓሪሳዎቱዎ ካሊያዎንቱ ኡባ ዎዳ ያሚኖኔ ዎሲኖ፤ ሺን ኔና ካሊያዎንቱ ቃሲ ኡባ ጋላሲ ሚኖኔ ኡሺኖ» ያጌዳ ኦቼዳኖ።

34 ዩሱሲካ፡ «ሚሺራይ እንቱንቱና ዳዒሺን ሚያታቱ ያማናው ዳንዳዩኖ?»

35 ዩዉዋን ቃሲ ሚሺራይ እንቱንቱፔ ሻኬቲዳ ባና ዎዲ ያናዎ፤ ሄ ዎዳ ያማናዎንታ» ያጌ ዛሬዳ።

36 ዩሱሲካ ካሊያ ለሚሱዋ ኦዳዳ፡ «ኦራላ ማዩዋፔ ፔጂ ኣኪዴ ኤጫ ማዩዋ ቦላን ጄፒያዌ ባዋ፤ ጋሱካ ሃዋዳ ኡዶፔ ኦራላ ማዩዋ ፔጂ፤ ኦራላ ጄፊካ ኤጫ ማዩዋን ጊጌና።

37 ሃዋዳንካ ኤጩዳ ጨልጊያን † ኦራላ ዋዪኒያ ኤሳ ዋሊያዋ ባዋ፤ ዋሶፔ ቃይ ኦራላ ዋዪኒያ ኤሳይ ጨልጊያ ጹሴ፤ ኤሳይካ ጉኩ፤ ጨልጋዪካ ባዩ።

38 ኦራላ ዋዪኒያ ኤሳ፡ ኦራላ ጨልጊያን ዋላናው ቤሴ።

39 ኤጫ ዋዪኒያ ኤሳ ኡሺዳ ኦራላ ኮዩያዌ ኦኒኔ ባዋ፤ ጋሱካ ኤጫይ ማልዔ ጊያ ዲራው።»

6

ዩሱሳ ካሊያዋንቱ ሳምባታን ቲሻ ዱሴዲና (ማት 12:1-8፤ ማር 2:23-28)

1 ሳምባታ ጋላሲ ዩሱሲ ባሬና ካሊያዋንቱና ኢቲፔ ኢቲ ጎሻ ጊዲዋና ኣጲያ ዎዳ ኣ ካሊያዋንቱ ዛርጋፔ ቲሻ ዱሴዳ ባሬንቱ ኩሺያን ሺጌቺዳ ሙሳ ደሚዲና።

2 ፓሪሳዋቱዋ ጊዶፔ፡ «ሳምባታ ጋላሳን ኦላናው ዎጋ ጊዴናዋ ኣያው ኦሊቲ?» ያጌዲና።

3 ዩሱሲ፡ «ካቲያ ዳዊቲኔ ኢቲፔ ዳዒያዋንቱ ኮሻቲዳ ዎዳ ኦሌዳዋ ናባቢ ቤይኪቲ?»

4 ዳዊቲ ያሳ ጎሊያ ጌሊዳ ቁሳቱዋፔ ኣቲን ሃራ ኣሳይ ማናዳን ዲጌቲዳ፡ ያሳው ያርሼቲዳ ቁማ ማዳ። ኢቲፔ ዳዒያዋንቱካ ኢ ኢሚናዴ ማዲና» ያጊ ዛሬዳ።

5 ሃዋፔ ካሊዳ ዩሱሲ፡ «ኣሳ ናዓይ ሳምባታው ጎዳ!» ጌዳ።

ዩሱሲ ኩሺ ጉንዳዳ ቢታኒያ ፓሌዳ (ማት 12:9-14፤ ማር 3:1-6)

6 ሃራ ሳምባታ ጋላሳን ዩሱሲ ኣዪሁዳቱዋ ዎሲያ ጎሊያ ጌሊዳ ታማሪሲ ዳዒ። ሃዋንካ ኡሺቻ ኩሺ ሲሌዳ ቢታኒ ዳዒ።

7 ሂጊያ ታማርሲያዋንቱኔ ፓሪሳዋቱ ዩሱሳ ሞቲያ ጋሱዋ ዳማናው ኢ ሳምባታን ኣሳ ፓሶፔ ቤዓና ጊዴ ናጊ ዳዒና።

8 ኢካ ኡንቱንቱ ቆፋ ኤሪዳ ኩሺ ሲሌዳ ቢታኒያ፡ «ዳንዳ ኣሳ ጊዲዋን ኤቃ» ያጌዳ። ቢታኒካ ዳንዲ ኤቁዳ።

† 5:37 ጨልጊያ፡ ሃዋ ዳወርሎዋን ኢማቲያ ጉጃ ቢሌላይ ኤሳ ናዒያ ኦጎሩዋ።
6:4 ዎጋ 24:9

9 ሃዋጥ ሲሚዳ ዩሱሲ፡ «ሃኒንቶኔ ሳምባታ ጋላሳን ሎጾባ ኦፋናው ቤሲዬ ኢታባ ኦፋናው ቤሲ? ሽምቸዋ አሻናው ቤሲዬ ዋዳናው ቤሲ?» ያጌዳ።

10 ዩሱሲ ባሬ ዩሹዋን ዳዒያ አሳ ኡባ ያሎዋጥ ጉዩያን ቢታኒያ፡ «ኔ ኩሺያ ሚጫ!» ያጌዳ። ኢካ ሚጫዳ ገፃዳ።

11 ኡንቱንቱ ሎይሌ ሃንቄቲዳ ዩሱሳ ቦላ ኦፋናዋ ባሬንቱ ጊዶን ማቄቲዳ።

ዩሱሲ ታማኔ ላዑ ኪቲቲዳዋንታ ዶሬዳ
(ማት 10:1-4፤ ማር 3:13-19)

12 ሄ ዋዲያን ዩሱሲ ዳሪያ ቦላ ዋሳናው ኬሴዳ፤ ሄዋንካ ቃማ ኩሚንላ ያሳኮ ዋሲዳ አቄዳ።

13 ሳዓይ ዋንቶዋን ባሬና ካሊያዋንታ ያሴዳ። ሄዋንቱፔካ ታማኔ ላዓቱዋ ዶሬዳ፡ «ኪቲቲዳዋንታ» * ያጌዳ ሱንሌዳ።

14 ኡንቱንቱ ሱንላይካ፡ ጳዒሮሳ ጌዳ ኢ ሱንሌዳ ሲሞና፡ ኦ አሻ ኢንዲራሳ፡ ያዩቆባ፡ ዮሃኒሳ፡ ፒሊጶሳኔ ባርታላሞሳ፡

15 ማቶሳ፡ ቶማሳ፡ ኢልፒዮሳ ናዓ ያዩቆባ፡ ባሬ ጋዳው ሴሌቲያ ሲሞና፡

16 ያዩቆባ ናዓ ዩሁዳኔ ዩሱሳ አሌ ኢሜዳ አስቆርቱ ዩሁዳ።

†

ዩሱሲ ጮራ አሳ ታማሪሴዳኔ ገሌዳ
(ማት 4:23-25)

17 ዩሱሲካ ኡንቱንቱና ኢቲፔ ዳሪያፔ ዋዲዳ ዳምባሳን ኤቄዳ። ኦ ካሊያዋንቱፔካ ጮራ አሳይ ሄዋን ዳዔ። ቃይካ አፔ ሲሳናውኔ ባሬንቱ ሃርጊያፔ ገፃናው ዩሁዳ ጋዲያፔ፡ ዩሩሳላሜ ካታማፔ፡ ኦባ ማታን ዳዒያ ያረሳፔኔ ሲዶናፔ ዩዳ ጮራ አሳይ ሄዋን ዳዒ።

18 ሃ አሳይካ ኦ ሲሳናውኔ ባሬንቱ ሃርጊያፔ ገፃናው ዩዳ። ቱና አያናን ኦይቄቲዳ ሜቶቲያዋንቱካ ገፃዲ።

19 ዋልቃይ አፔ ኬሲዳ ኡባ ገሌያ ዲራው አሳይ ኡባይ ኦ ቦቻናው ኮዬ።

ኢንጂዋባኔ ሜቱዋባ
(ማት 5:1-12)

* 6:13 ኪቲቲዳዋንታ፡ ሃዋ ጉሳይ ታማኔ ላዑ ዩሱሲ ኪቲዳ ሃዋራቱዋ ጉሳ።
† 6:16 አስቆርቱ፡ ሃዋ ጉሳይ አዩሁዳ ጋዲያን ዳዒያ አስቆርቱ ጌቲያ፤ ጋዲያፔ ዩናን አቴና ጉሳ። ሃ ሱንላ ቢሌላይ፡ «ዋርዳንቻ»። ቃይካ፡ «ሃይቆ አሌ ኢሚያዋ» ጉሳ።

- 20 ባሬና ካሊያዋንታ ጃሊዴ ያጌዳ፡
 «ሂንቴንቱ ማንቃቱ እንጃቴዳዋንታ፤
 አዪሲ ጎፔ፣ ያሳ ካዉቴላይ ሂንቴንቱዋ፡፡
- 21 ሂንቴንቱ ሃዒ ከሻቲያዋንቱ እንጃቴዳዋንታ፤
 ጊዲኒ ካላኒታ፤ ሂንቴንቱ ሃዒ ዬኪያዋንቱ
 እንጃቴዳዋንታ፤
 ጊዲኒ ሚጫኒታ፡፡
- 22 «አሳ ናዓ ዲራው ሂንቴንታ አሳይ ኢዲያ ዎዴኔ ቶቲያ ዎዴ፡
 ሂንቴንቱ ሱንሳካ ኢታን ዴንሊያ ዎዴ፡ እንጃቴዲታ፡፡
- 23 ሳሉዋን ሂንቴንቱ አካና ዎይታይ ዳራ ጊዲያ ዲራው ሄ
 ጋላሲ ናቬቻን ጉፒቴ፤ ጋሱካ ካሴ ሂንቴንቱ አዎቱ ናባቱዋ ቦላን
 ሃዋዲን ኦሊዴ ዴዔዲኖ፡፡
- 24 ዬዉዋን ቃሲ ዱሬ አሳቶ
 ሂንቴንቶ አዬ፤ ሂንቴንቱ አሻሎ ዴዐዋን ዴዔዲታ፡፡
- 25 ሂንቴንቶ ሃዒ ካሌዳዋንቶ አዬ፤
 ጊዲኒ ከሻታኒታ፤
 ሂንቴንቶ ሃዒ ሚጨያዋንቶ አዬ፤
 ጊዲኒ ካዮታኒታኔ ዬካኒታ፡፡
- 26 አሳይ ኡባይ ሂንቴንቱ ሎዎቴላባ ሃሳዪያ ዎዴ፡
 ሂንቴንቶ አዬ፤
 ካሴ ሂንቴንቱ አዎቱ ዎርዶ ናባቶ
 ሃዋዲን ኦሊዲኖ፡፡

ዎርኪያ ሲቃናው ቤሴ
 (ማት 5:38-48፤ 7:12)

- 27 «ሺን ታኒ ኦዲያዋ ሲሲያዋንቶ ያጋይ፡ ሂንቴንቱ ዎርኪቱዋ
 ዶሲቴ፤ ሂንቴና ኢዲያዋንቶ፣ ሎዐዋ ኦሊቴ፤
- 28 ሂንቴና ሸቂያዋንታ እንጂቴ፣ ሂንቴና ናቂያዋንቶ፣ ዎሲቴ፡፡
- 29 ኢቲ ባጋ ሻዪያ ባቂያዎ፣ ላዔሉዋካ ቤሳ፤ ኦኒኔ ኔ ኮቲያ
 አኪያዎ፣ ኔ ሻሚጨያካ ዲሳፓ፡፡
- 30 «ኔው ዴዒያዋ ኔና ዎሲያዎ፣ ኢማ፤ ኔዎ አኬዳዎ፣ ዛራ ጋዴ
 ኦቾፓ፡፡
- 31 አሳይ ሂንቴንቶ ኦላና ማላ ሂንቴንቱ ዶሲያዋዲን፡
 ሂንቴንቱካ ሃራው ሃዋዲን ኦሊቴ፡፡
- 32 «ሂንቴንታ ዶሲያዋንታ ፃላላ ዶሶፔ አይ ጋላታይ ዴዒ?
 ሃዎ ጊዶፔ ናጋራንቻቱካ ባሬና ዶሲያዋንታ ዶሲኖ፡፡
- 33 ሂንቴንቶ ሎዎባ ኦሊያዋንቱ ፃላላው ሂንቴንቱ ሎዎባ ኦሶፔ
 ሄዎ አይ ጋላታይ ዴዒ? ናጋራንቻቱካ ሃዋዲን ኦሊኖ፡፡

34 ታልዒዳ ሂንቲው ዛራናው ዳንዳዪያዋንቱ ፃላላው ታልፆፔ አይ ጋላታይ ዴዒ? ባሬ ታልዒዳዋ ዛሪዴ አካናው ናጋራንቻቱካ ባሬንቱ ጋርሳን ታልዒቲኖ።

35 ሺን ሂንቲንቱ፣ ሂንቲንቱ ሞርኪያ ደሲቲ፤ ኡንቲንቶካ ሎፖባ ኦሲቲ፤ ሂንቲንቲፔ ታልፖዋ ዛሪዲ አካናው ቆፖፒቲ። ሃዋ ሂንቲንቱ ፖሎፔ ሂንቲንቶ ጋቲ ዳራናዋ። ቃሲ ሂንቲንቱ ኡባፔ ቦላ ያሳ ናና ጊዳኒታ። ኢ ኢታቶኔ ጋላቲናዋንቶካ ኬካ።

36 ሂንቲንቱ አቡ ማሪያዋ ጊደዋዳን ሂንቲንቲካ ማሪያዋንታ ጊዲቲ።

ሃራ አሳ ፒርዳናው ቤሴና
(ማጥ 7:1-5)

37 «ኦ ቦላንካ ፒርደፒቲ፣ ሂንቲንቲ ቦላንካ ፒርዴቲና፤ ሃራ ቦላ ኩናኒያ አላፒቲ፤ ሂንቲንቲ ቦላንካ ኩናኒ ኦሴቲና። አቶ ጊቲ፤ ያሳይ ሂንቲንቶ አቶ ጋና።

38 አሚቲ፤ ሂንቲንቶ አሚታና። ሂንቲንቲ ማኬዳ ማካን ሂንቲንቶ ማኬታና። ባቂ ናቂና ሲሊ ኩሚ ፓላህ ላሌቲያ ማካ ሂንቲንቲ ከዉዋን ኢዲንላና» ጌዳ።

39 ቃሲካ ዬሱሲ ሃዋፔ ካሊያ ሌሚሱዋ ኦዴዳ፤ «ቆቃይ ቆቃ ካሌላናው ዳንዳዪ? ቆቃይ ቆቃ ካሌላፔ ላዓቲካ አይቄቲዳ ኦላን ኩንዲኪኖ?

40 ታማሪያዌ ባሬና ታማሪሲያዋፔ አጴና፤ ታማሪያዌ ሚኒ ታማሮፔ ባሬና ታማሪሶዋ ማላ ጊዳናው ዳንዳዪ።

41 «ኔ አይፊያ ጊደን ዴዒያ ቱሳ ኬሴናን ዴዒዴ ሃራ ኔ ላጊያ አይፊያ ጊደን ዴዒያ ሱላ አያው ፃላይ?

42 ኔ አይፊያ ጋርሳን ዴዒያ ቱሳ ቤዔናን ሃራ አሳኮ ሺቃዴ፣ ነታ አሻው፣ ኔ አይፊያ ጋርሳፔ ሱላ ታ ኬሶ? ያጋናው ዋታ ዳንዳያይ? ሃ ሎፀዋ ማላቲያ ኢታው፣ ኮይርታዴ ኔ አይፊያ ጊደን ዴዒያ ቱሳ ኬሳ። ሄዋፔ ጉዪያን ኔ አሻ አይፊያ ጊደን ዴዒያ ሱላ ኬሳናው ጌሻዴ ፃላናው ዳንዳያ።

ሚላቶኔ ኢዛ አይፊዳ አይፊያ
(ማጥ 7:16-20፤ 12:33-35)

43 «ሎፖ ሚላይ ኢታ አይፊያ አይፊና፤ ሄዋዳንካ ኢታ ሚላይ ሎፖ አይፊያ አይፋናው ዳንዳዪና።

44 ሚላይ ኡባይ ባሬ አይፊያ አይፊያዋን ኤሬቴ። አጉንጥፔ ዋዳንጻ አይፊ ማጻፎቴ፤ ሃዋዳንካ፥ ፀንዲቂያፔ † ላዲያ አይፊያ ማፃናው ዳንዳይቴና።

45 ሎዖ አሳይ ባሬ ሎዖ ዋዛናፔ ሎዖ ዬወዋ ሃሳዬ። ቃይ ኢታ አሳይ ባሬ ኢታ ዋዛናፔ ኢታ ዬወዋ ሃሳዬ። አዪሲ ጎቴ፥ አሳይ ባሬ ዶናን ሃሳዪያዌ ባሬ ዋዛናን ኩሜዳዋ ዶናይ ሃሳዪያ ዲራሳ።

ላዑ ቆዋ ጎሊያ ኬጂያ አሳ
(ማጥ 7:24-27)

46 «ታኒ ኦዶዋ ኦሊኪታ፥ ሺን አያው ጎዳው፥ ጎዳው፥ ያጊዴ ታና ጃጊቴ?

47 ታኮ ዪያ ኡባይ ታ ቃላካ ሲሲዴ ኦሱዋን ፔሺያዌ ኦና ማላቴንቶ ታ ሂንቴንታ ቤሳና፤

48 ኢካ ጎሊያ ኬጂዴ ዳር ኦላ ቦኪዴ ዛላ ቦላ ጊንቢዴ ኬጂዳ አሳ ማላቴ፤ ዲዑ ዲዒዴ ሄ ጎሊያ ሱጊናካ፥ ሚኖ ዛላ ቦላ ኬጃቶ ዲራው ቃላናው ዳንዳይቤና።

49 ቃይ ታ ቃላ ሲሲዴ ኦሱዋን ፔሺና ኡራይ ባሱ ባንታሳ ሻፊያ ቦላን ጎሊያ ኬጂዳዋ ማላቴ። ዲዑ ዲዒዴ ሄ ጎሊያ ሱጎ ዋዳ ማንዒያንካ ኩንዴዳ፤ ሄ ጎሊካ ኢታ ዋዳ ዋዲዴ ባዬዳ» ያጊዳ።

7

ዬሱሲ ጃቱዋ ካፑዋ ቆማ ፓሌዳ
(ማጥ 8:5-13፤ ዮሀ 4:43-54)

1 ዬሱሲካ ሃዋ ኡባ አሳ ሲንጻን ሃሳይ ወርሶዋፔ ጉዩያን ሂኒ ቂፊሪናሆማ ቤዳ።

2 ሄዋንካ ኢቲ ጃቱዋ ካፑ ዴዔ። ኢ ዳርፔ ዶሲያ ኦ ቆማይ ሃርጊዴ ሃያናው ማቴዳ።

3 ኢካ ዬሱሳባ ሲሴዳ ዋዳ፥ ባሬ ቆማ ዋሲዴ ፓላና ማላ ዪሁዳ ጨማቱዋ ሂኒ አኮ ኪቴዳ።

4 ኡንቴንቴካ ዬሱሳኮ ዪዴ፥ «ሃ ቢታኒ፥ ኔኒ ኦ ማዳናዳን ዳርፔ ኮዬዳ፤

5 ጋሱካ ኑ አሳ ኢ ዳርፔ ዶሲዴ ኦዪሁዳቱዋ ዋሲያ ጎሊያ ኬጂሶዌካ ኦ» ያጊዴ ዳርፔ ዋሴዲኖ።

6 ዬሱሲካ ኡንቴንቴና ኢቲፔ ቤዳ። ኢካ ሂኒ ጎሊያ ሄራ ጋኬዳ ዋዳ ጃቱዋ ካፑ ባሬ ላኬላቱዋ ባሬኮ ጃሲዴ፥ «ታ ጎዳው፥

† 6:44 ፀንዲቂያ፥ ሃ ሚላይ ጎሚያሪያ ዛሪያ ጊዲዴ ኦ አዪፊ አያወኔ ማዳናዋ።
6:44 ማጥ 12:34

ዳቡርፓ፤ አዲስ ጎፎ፣ ኔና ታ ጎሊያ ካራፔ ጋርሳ ባጋና ጌልሳናው ታው ቤሴና።

7 ሃዋ ዲራው ኔ ሲንሳን ኤቃናዉካ ሃራይ አቶ ቤሲያዋ ጊዲኬ። ሺን ኔኒ ቃላ ፃላላ ኦዲ፤ ታ ቆማይካ ፓፃናዋ።

8 ታኒ ታፔ ቦላና ማታይ ዳዒያዋንቱሲ ኤኖ ጋዴ ዳዒያ አሳ። ታፔ ጋርሳናካ ታኒ ከቲሲያ ዎታዲራቱ ዳዒና። አቱዋ፣ (ባ) ያጊያ ዎዴ፣ ቤ፤ ሃራካ ቃይ፣ (ሃያ) ጎፎ ዬ። ታ ቆማይካ፣ ሃዋ (ኦላ) ጊያ ዎዴ አዛዜቲ፤ አሉ» ያጌዳ።

9 ዬሱሲካ ሃዋ ሲሲዴ አ ዬዉዋን ማላሌቲዳ፤ ጉዬ ሲሚዴ አ ካሊያ ዳር አሳ፣ «ታኒ ሂንቴንቶ ቱሙዋ ጋይ፤ ታኒ ሃዋ ማላ አማኑዋ ሃራይ አቶ፣ ኢሰራዔሊያ ጋርሳንካ ቤዓቤይኬ» ያጌዳ።

10 ካሴ ከቲቲዳ አሳቲካ ፃቱዋ ካፑዋ ጎሌ ጉዬ ሲሚያ ዎዴ፣ አ ቆማይ ፓዎዋ ቤዔዲና።

ዬሱሲ አምዓቲ ናዓ ሃይቁዋፔ ዴንሌዳ

11 ዎንቲሳ ጋላሲ ዬሱሲ ባሬና ካሊያዋንቲናኔ ጮራ አሳና ኢቲፔ ናይኖ ጌቲቲያ ካታማቶ ቤዲና።

12 ዬሱሲ ካታማ ጋካና ማቶ ዎዴ፣ አሳይ ሃይቁዳ አጋ ቶኪዴ ኬሴዲና። ሃይቆዌካ ባሬ ዳዩው ማዲ ኢቲ ናዓ፤ አታካ አሲናይ ባይና አምዓቶ። ዳር ካታማ አሳይካ ኢዘ ካሌዲና።

13 ዬሱሲካ ኢዘ ቤዔዳ ዎዴ ቃሬቲዴ፣ «ዬኮፓ!» ያጌዳ።

14 ሺቁዴ ሻንቻማ ቦቼዳ፤ ቶኮዋንቲካ ኤቁዲና። ዬሱሲ፣ «ኔኖ ያላጋው፣ ዴንዳ ጋይ!» ያጊና።

15 ቢታኒ ሱሪ ኡቲዳ። ሃሳያካ ደሜዳ። ዬሱሲካ አ፣ አ ዳዩው ኢሜዳ።

16 ኡባይካ ያሻን ኩሚዴ፣ «ዎልቃማ ናቢ ኑ ጋርሳን ዴንዴዳ፤ ያሳይካ ባሬ አሳ አሻናው ዬዳ!» ያጊዴ ያሳ ጋላቲዲና።

17 ሄዌኔካ ዬሱሳ ዋሪ ዩሁዳ ዩሹዋን ዳዒያ ጋዲያ ኡባን ሲሴቲዳ።

ፃማቂያ ዮሃንሳ (ማት 11:1-19)

18 ዮሃንሳ ካሊያዋንቲ ሃኖዋ ኡባ አው ኦዴዲና። ዮሃንሲካ ባሬና ካሊያዋንቲ ላዓቲዋ ያሲዴ።

19 «ያናዌ ኔኔዬ? ዎይ ኩኒ ሃራ ናጋኔ?» ያጊ፣ ኡንቲንቲ ኦቻና ማላ ሂኒ ዬሱሳኮ ከቲዳ።

20 አሳቲካ ዬሱሳኮ ዩዴ፣ «ፃማቂያ ዮሃንሲ፣ ያና ጌቲቲዳዌ ኔኔዬ? ዎይ ሃራ ናጋኔ? ያጊዴ ኦቻና ማላ ኔኮ ከቲዳ» ያጌዲና።

21 ሄ ዎዲያን ዩሱሲ ጮራ አሳ ዲማ ዲማ ሃርጊያፔ ፓሌዳ፤ ቱና አያናቱዋካ አሳፔ ኬሴዳ፤ ጮራ ቆቃቱዋ አይፊያ ደዬዳ።

22 ዩሱሲካ የሃኒሲ ኪቶዋንቶ፣ «ቢዳ ሂንቴንቱ በዔዳዋኔ ሲሴዳዋ የሃኒሳው አዲቴ፤ ቆቃቱ ያለናዋንታ፤ ጉንዳቱ ሃሜታናዋንታ፤ ኦሉ አይቆዋንቱ ጌያናዋንታ፤ ቱሌዳዋንቱ ሲሳናዋንታ፤ ሃይቄዳዋንቱ ዳንዳናዋንታ፤ ሂዬሳቱዋሲካ ሚሺራቹዋ ቃላይ ኦዳታናዋ።

23 ታናን ጹቤቴና አሳይ ኡባይ አንጃቲዳዋንታ» ያጌዳ።

24 የሃኒሲ ኪቲዳዋንቱ ቢዲሳዋፔ ጉዪያን ዩሱሲ አሳው የሃኒሳሳ ኦዲዋ ደሜዳ፣ «አያ በዓናው ቢታ ባዙዋ ኬሴዳቱ? ጫርኩ ቃሊያ ኡሱንሳ?

25 ዎይ አያ በዓናው ኬሴዳቱ? ሎዎ ማዩዋ ማዬዳ አሳ ዳዑዋ? ሎዎ ማዩዋ ማዬዳዋንቱኔ ባሪና ጊጊሲያዋንቱ ካቲያ ጎሊን ዳዒና።

26 ዎይ አያ በዓናው ኬሴዳቱ? ናቢያ በዓናው ኬሴዳቱ? ኤ፤ ታኒ ሂንቴንቶ ያጋይ፤ ሂንቴንቱ በዓናው ኬሶዌ ናቢያፔካ አጁዋ።

27 ያሳ ማፃፋን፣ ሩኔ ኦጊያ ኔፔ ሲንሳና ጊጊሲያ ኪታንቻ ኔፔ ሲንሳያዳ ከታና) ጌቲቲ የሃኒሳሳይ ፃፊቲዳዌ ሃዎ።

28 ማጫዋንቱፔ ዩሌቴዳዋንቱ ጋርሳን ፃማቂያ የሃኒሳፔ አጁያ ኦኒኔ ባዎ። ያሳ ካዉቲሳን ቃሲ ኡባፔ ላፋ ጌቲቲያዌካ አፔ አጃናዋ» ያጌዳ።

29 ሃራይ አቶሺን ቃራፃ ኬሲያዋንቱ አቲናን ሃዎ ዩሱሲ ሃሳዮዎ ሲሴዳ ኡባይ የሃኒሳ ኩሺያን ፃማቄቶዋንቱ ያሳው በሲያ ቦንቹዋ አሜዲና።

30 ሺን ሂጊያ ታማሪሲያዋንቱኔ ፓሪሳዋቱ የሃኒሳን ፃማቄቲቤና ዲራው፣ ያሳይ ኡንቱንቶ ቆፔዳዋ አጃዲና።

31 ዩሱሲ፣ «ሲሚ ታኒ ሃ ዎዲያ አሳ አያና ሌሚሶ? ኡንቱንቱ አያ ማላቲና?

32 ኡንቱንቱ ጌያሳን ኡቲዳ ኢቱ ኢቱዋ ያሲዳ፣ ሳሱሊያ ሂንቴንቶ ፑኒናካ ካዒቤይኪታ፤

ዩኩዋ ዩሳ ኬሴዳሺንካ

ዩኪቤይኪታ

ያጌቲያ ናና ማላቲና) ጌዳ።

33 ፃማቂያ የሃኒሲ ቁማ ሜናን ዎዪኒያ ኤሳካ ኡሼናን ዪና፣ ሩኦ ቦላን ጋሌናይ ዳዔ) ያጌዲታ።

34 ታኒ አሳ ናዓይ ማዴኔ ኡሻዴ ዪና፡ ሳሃዌ ናሬሳማ፤ ዎዩኒያ ኤሳካ ኡሺያዎ፤ ቃራዲያዎንቶኔ ናጋራንቻቶ ዳቡዎ) ያገታ።

35 ገደፔ አቲን ያሳ አጵ ኤራቴሳይ ባሬ ኦሱዎን ቱማ ገዲዴ ቤቴዳ» ያገደ።

ፓሪሳዊያ ሲሞና

36 ፓሪሳዎቹዎፔ ኢቱ ባሬናና ቁማ ማና ማላ ሸቢና፡ ዩሱሲ አ ሶይ ቢዴ ማናው ኡቴዳ።

37 ሄ ካታማን ናጋራንቻ ጌቴቴዳ ኢቲ ሚሺራታ ዴዔዔና፡ ዩሱሲ አ ሶዩን ኡቴዳዎ ሲሳዴ፡ አልባስዒሮሳ ጌቴቲያ ሹቻፔ ኦሴቴዳ ቢልቃሲያ ኩሜዳ ሺቱዎ አካ ያደ።

38 ጉዩና አ ጌዲያ ማታን ኤቃዴ፡ ዩካዴ አ ጌዲያካ ባሬ አፎላን ኦካ ደማደ፤ ኢዚ አፎላይ ባዩዜዳ አ ጌዲያካ ባሬ ሁጲያ ቢናናን ቁጫዴኔ አ ጌዲያ ዩራዴ ጌዲያን ሺቱዎካ ጫጫፋደ።

39 ዩሱሳ ባሬ ሶይ ዪሴዳ ፓሪሳዊካ ሃዎ ቤዒዴ፡ «ሃዌ ናቢያ ገዴዴንቶ፡ ሃና አ ቦቹያ ሚሺራታ ኦኔንቶኔ ቃይካ ኢዛ ናጋራንቻ ገዲያዎ ኢ ኤራናሸን» ያገደ።

40 ዩሱሲካ ዛሪዴ፡ «ሲሞና፡ ታኒ ኔው ኦዲያ ዩዉ ዴዔ» ያገና፡

ሲሞኒካ፡ «ታማሪሲያዎ፡ ኦዳ» ያገደ።

41 ዩሱሲ፡ «ኢቲ ቢታኒያፔ ሚሻ ታልዔዳ ላዑ አሳቱ ዴዒኖ፡ ኢቱዎ ማታን ኢቹሹ ያቱ ዲናሪ፡ ቃይ ዮኩዎ ማታን ኢሻታሙ ዴዔ።

42 ላዓቶካ ጩገያዌ ቆዩና፡ ላዓቱዎ አጩዎካ ማሪ አጌዳ፡ ሃዎንቱፔ ሃቃዌ ሎይሲ ደሲያዎ ማላቲ?» ያገደ።

43 ሲሞኒካ ዛሪዴ፡ «ዳሩዎ አጎዎ ማላቲ» ያገደ። ዩሱሲካ፡ «ቱሙዎ ዛራዳ» ያገደ።

44 ዩሱሲ ሚሺራቲኮ ያሊዴ፡ ሲሞና ሃዎዳን ያገደ፤ «ሃና ሚሺራቶ ቤዒዴ? ታኒ ኔ ጎሌ ዪና ሃራይ አቶሺን ሃላካ ታ ጌዴው አማቤይካ፤ ሺን ኢዛ ባሬ አፎላን ታጌዲያ ኢሮዒሳደ፤ ባሬ ሁጲያ ቢናናኒካ ቁጫዴ።

45 ኔኒ ታና ዩራ ቤይካ፤ ሺን ኢዛ ታኒ ጌሎዴፔ ደማዴ ታጌዲያ ዩሪያዎ ኣጋ ቤይኩ።

46 ኔኒ ታ ሁጲያን ዛይቲያ ኦካ ቤይካ፤ ሺን ኢዛ ታ ጌዲያን ሺቱዎ ጫጫፋደ።

7:38 ማጎ 26:7፤ ማር 14:3፤ ዮሀ 12:3

47 ሃዋ ዲራው ታ ሂንቴንቶ ኦዳይ፡ ዳርፔ ኢዛ ደሴዳዎ ዲራው፡ ዳር ናጋራይ ኢዚው ዳዒያዌ ማሬቴዳ፤ ጉላይ ማሬቴያዌ ጉላ ደሴ» ያጌዳ።

48 ዬሱሲ ሚሺራቶ፡ «ኔ ናጋራይ ቁጩቴዳ» ያጌዳ።

49 ዬሱሳና ኢቲፔ ቁማ ማናው ኡቴዳዋንቱ ባሬንቱ ዎዛናን፡ «ናጋራ ማራናው ዳንዳዪያዌ ሃዌ ኦኔ?» ያጌዳዮ።

50 ዬሱሲ ሚሺራቶ፡ «ኔ ኦማኑ ኔና ኦሼዳ፡ ሳርቴላን ኔ ጎሌ ባ» ያጌዳ።

8

ዬሱሳ ካሌዳ ማጫዋንታ

1 ዬሱሲ ሃዋፔ ሲሚዳ፡ ሳባኪዲኔ ያሳ ካዉቴላ ሚሺራቹዎ ቃላ ካታማኒኔ ሄራን ኦዲዳ ኦዲዳ። ታማኔ ላዑ ዬሱሳ ካሊያዋንቱካ ኦናና ኢቲፔ ዳዒዮ።

2 ኢታ ኦያናፔኔ ዎልቃማ ሃርጊያፔ ፓዌዳዋንቱ ኢቲ ኢቲ ማጫዋንቱካ ዳዒዮ። ሄዋንቱካ፡ ላፑ ዓላሂ ኬሴዳ ማግዳላ ጌቴቲያ ካታማፔ ዬዳ ማይራዎኔ።

3 ሄርዲሳ ጎሊያን ሱንላ ጊዳዳ ኩዛ ማቻቲ ዮሃና፡ ሶሲና ጌቴቴዉናኔ ሃራ ጩራቴዎና ኢቲፔ ጊዲዳ፡ ዬሱሳኔ ኦ ካሊያዋንታ ሚሻን ማዳዲዮ።

ዜሬላ ሌሚሱዎ

(ማት 13:1-9፤ ማር 4:1-9)

4 ጩራ ኦሳይ ዳር ካታማቴዎፔ ሺቂዳ፡ ዬሱሳኩ ዬዳ ዎዲያን ሌሚሱዎን፡

5 «ዜሬያዌ ዜሬላ ዜራናው ኬሴዳ። ዜሬያ ዎዳ ኢቲ ኢቲ ዜሬላይ፡ ኦጊያ ደናን ዎዲዳ ዬዴቴዳ። ያቲና ሳሉዎ ካፋ ሄዎ ሜዳ።

6 ሃራይ ቃይ ዛላ ቦላ ዎዲዳ ደሌዳ ዎዳ ኮሺያ ሃላ ዳሜና ዲራው ሜሌዳ።

7 ሃራ ዜሬላይ ኦጉንላ ጋርሳን ዎዲዳ። ኦጉንላይ ኢቲፔ ዲጨዳ ሚቴዳ።

8 ሃራይ ሎዒያ ቱዔ ቢታን ዎዲዳ። ደሎዎፔ ጉዪያን፡ ዜሬቶዎፔ ያቲ ኮሺያ ዳኩዎ ሞኬዳ» ያጌዳ።

ዬሱሲ ሌሚሱዎን ሃሳዬዳ ጋሱዎ

(ማት 13:10-17፤ ማር 4:10-12)

ዩሱሲ ሃዋ ሃሳዪዴ፡ «ሃይላይ ዳዒያ ኡባይ ሲሶ» ያጊ ቃላ ጾቁ ኡዲዴ ዋሴዳ።

9 ኣ ካሊያዋንቱ፡ «ሃ ለሚሱ ኣያ ጉሴ?» ያጊ ኣ ኣቼዲኖ።

10 ኢካ ዛሪዴ፡

«ሂንቲንቶ ያሳ ካዉቲላ ፀራ ኤራይ ኢሜቲዳ፤ ሺን ሃራቶ፡ ዪሊዲካ ኤሪና ማላ፡ ሲሲዲካ ኣኬኬና ማላ ለሚሱዋን ኦዲይ» ያጊዳ።

ዩሱሲ ዜሬላ ለሚሱዋ ቢሊዴ ኦዲዳ
(ማጥ 13:18-23፤ ማር 4:13-20)

11 ዩሱሲ፡ «ዜሬላ ለሚሱ ሃዋ፡ ዜሬላይ ያሳ ቃላ።

12 ኣጊያ ጋዳን ዋጴዳ ዜሬላይ፡ ጉላ ዋዴው ቃላ ሲሲያ ኣሳ፤ ኤሌካ ያላሂ ዩኔ፡ ኡንቲንቱ ሲሶዋን ኣማን ኣቲና ማላኔ ቃላይ ዋዛናፔ ደጌታና ማላ ኦሴ።

13 ዛላ ቦላን ዋጴዳ ዜሬላይ፡ ኮይሮ ቃላ ናሼቻን ሲሲያዋንታ። ሄዋንቲካ ጉላ ዋዲያ ኣማኒኔ ፓጪ ጋኪያ ዋዲያን ያጵ ባንታ ዲራው ኤሌካ ኣማኑዋ ካዲኖ።

14 ኣጉንላ ጋርሳን ዋጴዳ ዜሬላይ፡ ቃላ ሲሲያዋንታ፤ ሺን ዴዑዋ ሂርጋይኔ ዲሬቲላ ኢሻሉ ጨሌዳዋንታ። ሄዋንቲ ሎዖ ኣይፊያ ኢማናው ዳንዳዩኪኖ።

15 ሎዖ ቱዔ ቢታን ዋጴዳ ዜሬላይ ቤሲያዌ፡ ሎዒኔ ዪሎ ዋዛናን ቃላ ሲሲዴ ናጊያ ኣሳኔ ሄ ቃላን ሚኒ ኤቂዴ ሎዖ ኣይፊያ ኣይፊያዋንታ።

ያምፒያ
(ማር 4:21-25)

16 «ያምፒያ ሳሊዴ ኢቲባን ቁምዒ ኣጊያዌ ዋይ ኣርሳፔ ጋርሳና ዋሊያዌ ኦኒኔ ባዋ።

17 ቆንጨኖናን ቆሱዋን ኣቲያባይ ኢቲ ዩዉኔ ባዋ። ኤሬቲናኒኔ ቤቲያሳ ኬሴናን ኣታናባይ ኣይኔ ባዋ።

18 ሄዋ ጊዲያ ዲራው ሎይሊ ኣኬካን ሲሲቲ። ዋዛናፔ ሲሲያዎ ኡባው ጉጂ ኣኬካይ ኢሜታና፤ ኣኬኬናዋፔ ሄ ኣው ዳዒያዎ ማላቲያ ኣኬካይካ ኣኬታናዎ» ያጊዳ።

ዩሱሳ ዳዮኔ ኣ ኢሻቲዋ
(ማጥ 12:46-50፤ ማር 3:31-35)

8:10 ኢሳ 6:9 8:16 ማጥ 5:15፤ ሉቅ 11:33 8:17 ማጥ 10:26፤ ሉቅ 12:2 8:18 ማጥ 25:29፤ ሉቅ 19:26

19 ሄ ወዲያን አታኔ አሻቱ ዩሱሳና ጋኬታናው አኮ ዩዲኖ፤ ሺን አሳ ጮራቴላፔ ዳንዶ ጋሱዋን አ ዳማናው ዳንዲይቤይኪኖ።

20 አቲ ቢታኒ፣ «ኔ ዳያኔ ኔ አሻቱ ኔናና ጋኬታናው ኮዮ ዲራው ካሬን ዩዳ ኤቁዲኖ» ያገኘ ኦዳዳ።

21 አካ፣ « ታ ዳያኔ ታ አሻቱ፣ ያሳ ቃላ ሲሲዳ ኦሱዋ ቦላን ፔሺያዋንታ» ያገኘ ዛሬዳ።

ዩሱሲ ቤታ ጮቡ አሌዳ
(ማጥ 8:23-27፤ ማር 4:35-41)

22 አቲ ጋላሲ ዩሱሲ ባሬና ካሊያዋንቱና አቲፔ ዋንጊሪያ ጌሊዳ፣ «አባፔ ሄፊንሳ ቦይቱ» ጌዳ። ኡንቱንቱካ ዳንዲዳ ሃሜታ ደሜዲኖ።

23 ፒኒ ዳዲያ ዋዳ፣ ዩሱሲ ጌሚዲሺዳ። አባን ጎቱዋ ጫርኩ ዳንዶ ዲራው፣ ዋንጊሪያ ጋርሳን ሃላይ ኩሚና ዳር ማቶቱዲኖ።

24 ኡንቱንቱ ዩሱሳኮ ሸቂዳ፣ «ጎዳው፣ ጎዳው! ኦኒ ባዮይቱቱ!» ያገኘ አ ቤጎሌዲኖ።

አካ ቤጎቲዳ ጎቱዋኔ ሃላ ቤታ ሴሪና፣ ጎቱኔ ሃላ ቤታይ ኤቁዳ፤ ኡባባይካ ጮቡ ጌዳ።

25 አካ፣ «ሂንቱንቶ አማኑ ሃቃን ዳዲ?» ያገኘ።
ኡንቱንቱካ ያዪ ማላሌቲዳ አቲ አቲዋ፣ «ሃዋዳን ጫርኩኔ ሃላይ ጮቡ ገቱ ገና አዛዜቲያዌ ሃዌ ኦኔ?» ያገኘቲዲኖ።

ዩሱሲ ፃላሂ ኦይቁዳ ቢታኒያ ፓሌዳ
(ማጥ 8:28-34፤ ማር 5:1-20)

26 ጋሊላ አባፔ ሄፊንሳና ዳዲያ ጌርጌሴናና ጌቲቲያ ጋዲያ፣ ዩሱሲኔ አ ካሊያዋንቱ፣ ዋንጊሪያን ፒኒዳ ጋኬዲኖ።

27 ሄ ሃላፔ ፒኒ ሳዓ ዋጶ ዋዳ፣ ኢታ አያናን ኦይቁቲዳ አቲ ቢታኒ፣ ካታማፔ ኬሲዳ አናና ጋኬቲዳ። ዳር ዋዲያፔ ደሚዳ ማዶዋ ማዬናን ካሎ ጎሊያ አገዳ ዲፋዋን ዳዔ።

28 ዩሱሳ ዳዋዋፔ ጉዩያን፣ ዋሲ አ ሲንሳን ጉፋኒዳ ዋልቃማ ኮሻን፣ «ዋልቃማ ያሳ ናዓ ዩሱሳ፣ ታወኔ ኔው አይቤ አቲፔቲላይ ዳዲ?» ታና ዋዩሶፓሪከ፤ ታ ኔና ዋሳይ» ያገኘ።

29 ኢ ሄዋ አዩሲ ጌዳ ጎቱ፣ ቢታኒያ ዩጌ ኬሳና ማላ ዩሱሲ አ አዛዙ ዲራሳ።

ኢታ አያናይ ቢታኒያ ኦይቆደፔ ዳር ዋዳ ገደ ዲራው፣ ቢራታ ሳንላላታን ጌዲያኔ ኩሺያ ቃሺቲዳ ናጌቲ። ሳንላላታ ዲሊ አኪዳ ኢታ አያናይ ካሌሊና ባዙዋ ቤ።

30 ዩሱሲካ፡ «ኔ ሱንላይ ኦኔ?» ያገ ኦቼዳ። ኢካ ጮራ ኢታ ኣያናይ ጌሊ ኡቶ ዲራው፡ «ለጊዮና» * ያጌዳ።

31 ባሬንታ ዩሱሲ፡ «ሂኒ ጨሞ ኦላ ቢቴ» ያጌና ማላ ዎሴዲኖ።

32 ሄዎን ዳዒያ ዘዚያ ጋፃን ሄሜቲያ ጮራ ጉዲንላቱ ዳዒኖ። ጮራ ቱና ኣያናቱ፤ ሄ ጉዲንላቱዎ ጋርሳ፡ «ጌሊቴ» ጋና ማላ ዩሱሳ ዎሴዲኖ። ኢካ፡ «ቢዴ ጌሊቴ» ጌዳ።

33 ኢታ ኣያናቱካ ቢታኒያፕ ኬሲዴ ጉዲንላቱዎ ጋርሳ ጌሊዲኖ። ጉዲንላ ዉዲካ ላንቂያፕ ካጆቲዴ ኤሌካ ኣባን ሚቴቴዲኖ።

34 ጉዲንላ ሄሚያዎንቱ ሃኖዎ ኡባ ቤያ ዎዴ ሃራሳ ቢዴ፤ ሄ ካታማኒኔ ዩሹዎን ሃኖዎ ኦዴዲኖ።

35 ኣዬ ሃኔዴንቶ ቤዓናው ኬሲዴ፤ ኣሳይ ዩሱሳኮ ዩዲኖ። ኢታ ኣያናይ ኬሴዳ ቢታኒ፤ ኣ ዎዛናይ ሰሚና ማዩዎ ማዩዴ ዩሱሳ ጌዲያ ማታን ኡቶዎ ቤዒዴ ያዩዲኖ።

36 ኢታ ኣያናን ኦይቄቴዳ ቢታኒ ዎቲ ፓፄዴንቶ ቤዒዳ ኣሳይ፤ ሃራ ኣሳው ኦዴዲኖ።

37 ጌርጌሴኖና ጋዲያኒኔ ሄ ሄራን ዳዒያ ኣሳይ ኡባይ ዳሪ ያዩዳ ዲራው፤ ዩሱሲ ባሬንቱ ማታፕ ባና ማላ ዎሴዲኖ። ኢካ ዎንጊሪያን ጌሊዴ ቤዳ።

38 ኢታ ኣያናይ ኬሴዳ ቢታኒካ ዩሱሳና ባና ጊዴ፤ ኣ ዎሴዳ፤ ሺን ዩሱሲ፡

39 «ኔ ጎሌ ሲማዴ ያሳይ ኔው ኦሉ ዎልቃማባይ ኣዬንቶ ማርካታ» ያገ ዩዴዳ።

ሃይቄዳ ናቶኔ ሳኬቲያ ሚሺራቶ

(ማት 9:18-26፤ ማር 5:21-43)

40 ዩሱሲ ሲሜዳ ዎዴ ኣሳይ ኡባይ ናገ ዳዒያ ዲራው፤ ኣ ዎኪ ኣኬዲኖ።

41 ሄ ዎዴ፤ ኣዩሁዴ ኣሳ ዎሳ ጎሌው ሱንላ ጊዴዳ ያዒሮሳ ያጌቲያ ቢታኒ ኣኮ ዩዳ። ኢካ ዩሱሳ ጌዲያ ሲንላን ኩንዲዴ፤ ባሬ ጎሌ ጌላና ማላ ዎሴዳ።

42 ጋሶቲላይካ ታማኔ ላዑ ላይላይ ኩሜዳ ኣው ዳዒያ ኢቲ ናታ ሃይቃናው ማታ ኡቶ ዲራሳ።

ዩሱሲ ቢያ ዎዴ ጮራ ኣሳይ ኣ ዩሹዎን ሱጌቲዴ ሜቶሌዲኖ።

* 8:30 ለጊዮና፡ ሃ ሱንላይ ጊሪኬ ጌቲያ ቃላፕ ኣኬቲዳ። ሱንላ ቢሌላይ «ጮራ» ጉሳ።

43 ሄ አሳ ጊደን ሄ ዋዲያን ታማኔ ላዑ ላይላ ኡባ ሱላይ ጎጊያ ሚሺራታ ዳዓው። ባሬ ዳዒያ ሻሉዋ ኡባ ጳሊያ ኤሪያዋንቶ ዉርሲናካ ፓላናው ዳንዳዮዌ ኦኒኔ ባዋ።

44 ጉዬና ያዴ አ ማዩዋ ማጫራ ቦቻዳ፤ ሄ ማንዒያንካ ኢፔ ጎጊያ ሱላይ ኤቁ አጌዳ።

45 ዬሱሲ፣ «ኦኒ ታና ቦቻዌ?» ያጌዳ።

ኡባይ ካዲና ጳዒሮሲ፣ «ሳዳው፣ አሳይ ሱጌቲዴ ሜቶሊያ ዋዴ፣ (ኦኒ ታና ቦቻዌ) ያጋይ?» ጌዳ።

46 ሺን ዬሱሲ፣ «ኢቲ አሳይ ታና ቦቻዳ፤ ዋልቃይካ ታፔ ከሶዋ ታኒ ኤራይ» ያጌዳ።

47 ሚሺራታካ፣ ዬሱሳ ኢዛ ቦቻዌ ኤሬቴናን አቲቤናዋ ኤራዴ፣ ኮኮራዴ ዮና ዬሱሳ ሲንላን ኩንዳ አጋዴ። አያ ጋሱዋን ዬሱሳ ቦቻዳንቶ ኢዛ ፓዎዋ ኡባ አሳ ሲንላን ኦዳዴ።

48 ኢካ ኢዚው፣ «ሃ ሚሺራቲ! ኔ አማኑ ኔና ፓሌዳ፤ ሳር ባ» ያጌዳ።

49 ዬሱሲ ሃሳይ ዳዒሺን፣ አዩሁዳ አሳ አማኒያዋንቲ ሱንላ ሶዩፔ ኢቲ ቢታኒ ዬዳዌ፣ «ኔ ናታ ሃያዴ፤ ሲሚ ታማሪሲያዋ ሚቶሳፓ» ያጌዳ።

50 ዬሱሲ ሃዋ ሲሲዴ፣ «ያዒሮሳ፣ አማናፔ አቲን፣ ያዮፓ! ኢዛ ፓዎናዉኑ» ያጌ ዛሬዳ።

51 ሶይ ጌሊዴ፣ ጳዒሮሳፔ፣ ያዩቆባፔ፣ ዮሃኒሳፔ፣ ናቲ አቡፔኔ ናቲ ዳዩፔ አቲን፣ ኦኒኔ ጌላናዳን ኤኖ ጊቤና።

52 ኡባይ ሄ ናቲው ዬኪዴኔ ካዮቲዲ ዳዒኖ። ሺን ዬሱሲ፣ «ዬኮፕፔ፣ ጊሳዲፔ አቲን ሃያቤይኩ» ያጌዳ።

53 ኢዛ ሃይቁዳዋ ኤሪዴ አ ቦላ ሚጩዲኖ።

54 ጊዶፔ አቲን ዬሱሲ ኢዚ ኩሺያ ኦይቁዴ፣ «ሃ ናፔ፣ ቤጎታ!» ያጌዳ።

55 ኢዚ ሺምፑካ ሲሚና ኤሌካ ዳንዳ ኤቁና ማናባ አማና ማላ፣ ዬሱሲ አዛዜዳ።

56 ኢዚ አቡኔ ኢዚ ዳያ ማላሌቴዲኖ፤ ሺን ዬሱሲ ኡንቱንታ፣ ሃኖ ዬዉዋ ኦሲኔ ኦዴና ማላ አዛዜዳ።

9

ዬሱሲ ባሬና ካሊያ ታማኔ ላዓቱዋ ኪቴዳ
(ማጥ 10:5-15፤ ማር 6:7-13)

1 የሱሲ ታማኔ ላዑ ኣ ካሊያዋንታ ኢቲፔ ባሬኮ ዪሲዳ፥ ፃላሂያ ኡባ ኣሳፔ ኬሳናውኔ ሃርጊያዋንታ ፓፋና ማላ ዋልቃኔ ማታ ኢሜዳ።

2 ፆሳ ካዉቲላባ ኦዳናውኔ ሃርጋንቻቱዋ ፓፋና ማላ ኡንቱንታ ከቲዳ።

3 ኢ ኡንቱንታ ከቲዳ፥ «ኦጊያ ቢዳ፥ ፃዎዓ ጊዲናካ፥ ዋይ ቃርጨቲያ፥ ዋይ ቁማ፥ ዋይ ሚሻ ጊዲናካ ኣያኔ ኦይቆፒቲ፤ ላዔሊያ ማዩዋካ ኦይቆፒቲ።

4 ሂንቲና ኣሳይ ሃቃን ሞኮፔኔ፥ ሄዋፔ ኬሳና ጋካናው፥ ሂንቲንቲ ጌሌዳ ጎሊያን ጋሚዳ።

5 ሄ ካታማ ኣሳይ ሂንቲና ሞኬናን ኢያፔ፥ ሄዋፔ ኬሲዳ፥ ኡንቱንቲ ሂንቲና ሞኬናን ኢያዎ ማርካ ጊዳና ማላ፥ ሂንቲንቲ ጌዲያፔ ባና ሸጠ ዲጊዳ ቤቲ» ያጌዳ።

6 ኣ ካሊያዋንቲ ቢዳ፥ ቄሪ ካታማ ኡባን ሚሺራቹዋ ቃላ ኦዲዳኔ ሃርጋንቻ ፓሌዳ ዩዩዲኖ።

ሄርዲሴ ኦሌዳባ
(ማት 14:1-12፤ ማር 6:14-29)

7 ሃዒ ጋሊላ ቢታ ካቲያ ሄርዲሴካ ሃኔዳ ዩዉዋ ሲሲዳ ያቲ ጌዳ። ጋሮቲላይካ ኢቲ ኢቲ ኣሳይ፥ «ዮሃኒሲ ሃይቁዋፔ ዳንዴዳ» ያጌ።

8 ሃራ ኣሳይ፥ «ኤላሲ ኬሲዳ ቤቲዳ» ያጊያ ዋዳ፥ ሃራንቲ ቃሲ፥ «ቤኒ ናባቲዋፔ ኢቲ ሃይቁዋፔ ዳንዴዳ» ያጊኖ።

9 ሄርዲሴካ፥ «ታኒ ዮሃኒሳ ቆዲያ ቃንዲሳ ዲጋዲሺን፥ ሃዋዳን ኣሳይ ሃሳዩያ ቢታኒ ኦኔ?» ያጊዳ፥ ዩሱሳ ቤዓናው ኮዩዳ።

ዩሱሲ ኢቹሹ ሻዓ ኣሳ ሚዚዳ ካሊሴዳ
(ማት 14:13-21፤ ማር 6:30-44፤ ዮሀ 6:1-14)

10 ዩሱሲ ከቶዋንቲ ሲሚዳ፥ ኡንቱንቲ ኦሌዳዋ ኡባባ ዩሱሳው ኦዳዲኖ። ኢካ ኡንቱንታ ኣከዳ፥ ቤቲሳይዳ ያጌቲያ ካታማ ማታን ዴዒያ ታካሳ ቤዳ።

11 ኣሳይ ኢ ዴዒያሳ ኤሪዳ ካሊና፥ ኡንቱንታ ሞኪ ኣከዳ ፆሳ ካዉቲላባ ኦዳዳ፤ ሃርጊያፔ ፓፃናው ቤሲያዋንታካ ፓሌዳ።

12 ሳዒይ ኦማርሲያ ዋዳ፥ ዩሱሳ ካሊያ ታማኔ ላዓቲ ኣኮ ዩዳ፥ «ሃ ኣሳይ ኡባይ ኦ ዩሹዋን ዴዒያ ሄራ ጊዳኔ ቄሪ ካታማቲዋ ጊዶ ቢዳ፥ ኣቋያሳኔ ቁማ ዴማና ማላ ሞዩዛ፤ ኣያው ጎፔ ኦኒ ሃዋን ኣሳይ ባይናሳን ዴዔቶ» ያጌዲኖ።

13 ሺን ዩሱስ ኡንቱንታ፡ «አሳው ሜቴቲያባ ሂንቱንቱ አሚቴ» ያጌዲ።

ኡንቱንቱ ዛሬዳ፡ «እኔ ቢዳ፡ ሃ ኡባ አሳው ቁማ ሻሚናን ቆዮፕ ኩሲ ኢቼሹ ሶሎፕፔኔ ላዑ ሞሊያፕ ሃራይ ባዋ፤ ሄዋሲ ኑኒ ሃ ጮራ አሳው ቁማ ሻማና ማላ ኮያይ?» ያጌዲና።

14 [ጋሱካ፡ ሄዋን ዳዒያ አሳይ ኢቼሹ ሻዓ ከና] *

ዩሱስ ባሬና ካሊያዋንታ፡ «አሻታሙ ኢሻታሙ አሳ ጨታን ጨታን ሻኪ ሻኪ ኡቲሲቴ» ያጌዲ።

15 ኡንቱንቱካ ኢ ሳዋዲን ኡባ አሳካ ኡቲሴዲና።

16 ዩሱሲካ ኢቼሹ ሶሎፕኔ ላዑ ሞሊያ ኦይቂዳ፡ ፑዳ ሳሉዋ ቦንጎቲ ያሊዳ ያሳ ጋላቴዳ፤ ዲሲዳ፡ አሳው ጊሻና ማላ አ ካሊያዋንቶ አሚዳ።

17 አሳይ ኡባይካ ሚዳ ካሌዲና። ኡንቱንቱፔ አቴዳ ዶካ፡ ታማኔ ላዑ ሳዎፓ ኩሚዳዋ ዳንጼዲና።

ጳጳርሲ ዩሱሳባ አዋዬዳ
(ማት 16:13-19፤ ማር 8:27-29)

18 ኢቲ ጋላሲ ዩሱሲ ባሬካ ዋሲያ ዋዳ፡ አ ካሊያዋንቱካ አናና ኢቲፔ ዳዒሺን፡ «አሳይ ታና ኦና ጊኖ?» ጊዳ ኡንቱንታ ኦቼዲ።

19 ኡንቱንቱ ዛሬዳ፡ «አሳይ ኔና ፃማቂያ ዮሃኒሳ ያጌ፤ ሃራ አሳይ ቃሲ ኤላሳ † ያጌ፤ ሃራይ ቃሲ ቤኒ ናባቱዋፕ ኢቱ ዳንዳዳ ያጌ» ያጌዲና።

20 ዩሱሲ ኡንቱንታ፡ «ሂንቱሺ፡ ታና ኦና ጊቴ?» ያጌዲ።

ጳጳርሲካ ዛሬዳ፡ «ኔኒ ያሳይ ኦኩዳ ኪሪሰቶሳ» ያጌዲ።

ዩሱሳ ካሊያዋንቱ ሃናናው ቤሲያባ
(ማት 10:38-39፤ 16:24-26፤ ማር 8:34-38፤ ሉቅ

14:26-27)

21 ዩሱሲካ ኡንቱንታ፡ «ሃዋ ኦሲኔ ኦድፒቴ» ያጊ ሚኒሲ አዛዚዳ።

* 9:14 ኢቼሹ ሻዓ፡ ኢስራዔሊያ ዋጋን ማጫዌኔ ቄሪ ናናይ ፓይዳቴና ዲራው፡ ኢቼሹ ሻዓ ጉሳይ ማጫዋኔ ቄሪ ናና ፓይዳናን ኩሚዳዋ። ሃ ፓይዲ ዳዒያ ኮይር ማራይ ቤኒ ማፃፋ ኢቱዋ ኢቱዋን ባዋ። † 9:19 ኤላሳ፡ ሃ ናቢ ኢ ሃይቆዴፕ ዳር ዋዴፕ ጉዬ፡ ዩሱሲ ኪሪሰቶሲ ቢታ ቦላን ታማሪሲዳ ዳሪያ ቦላ ዋሳው ኬሲዳ ላሚቲ ቦዲዳዋፕ ጉዬ ባጋን አናና ሙሴና ሃሳዬዳ። ሄዋ ጉሳይ ሃይቂ ሲሚዳ ዳር ጮራ ዋዲያፕ ጉዬ ፓፃ ቆንጩዳ ጉሳ። 9:19 ማት 14:1፤ 2፤ ማር 6:14፤ 15፤ ሉቅ 9:7፤ 8 9:20 ዮሀ 6:68፤ 69

22 «ታኒ፣ አሳ ናዓይ፣ ዳሮ ሜቱዋ አካናው ቤሴ፤ ጨማቱዋን፣ ቁፅቱዋ ካፓቱዋኒኔ ሙሴ ሂጊያ ታማሪሲያዋንቱን ኢጻታናው ኮሼ፤ ኡንቱንቱ ታና ዎዳናዋንታ፤ ታኒካ ሄዜንሉ ጋላሲ ሃይቁዋፔ ዴንዳናው ቤሴ» ያጌዳ።

23 ዩሱሲካ አሳ ኡባ፣ «ታና ካላናው ዶሲያዌ ዴፖፔ፣ ባሬ ሁጲያ ካዶ፤ ባሬ ማስቃሊያ † ጋላሳን ጋላሳን ቶኪዴ ታና ካሎ።

24 ባሬ ሼምፑዋ አሻናው ዶሲያዌ ኡባይ ባዪዜ፤ ሺን ታ ዲራው ባሬ ሼምፑዋ ባዪዚያዌ ኡባይ አሼ።

25 ኢቲ ኡራይ ሃ አላሚያባ ኡባ አሺዴ ባሬ ሼምፑዋ ባዪዘፔ ዎይ ባሬው ፓጩሶፔ፣ እያ ማዲ?

26 እሳይ ታናኒኔ ታቃላን ዩላቶፔ፣ ታኒ አሳ ናዓይ፣ ታ ቦንቹዋናኔ ጌሻ ከታንቻቱዋ ቦንቹዋና ዪያ ዎይ አኒ ዩላታናዋ።

27 ታኒ ሂንቱንቶ ቱሙዋ ያጋይ፤ ሃዋን ዴዒያ አሳፔ፣ ያሳ ካወቱሳ ቤዓና ጋካናው ሃይቁዋ ሃይቁናዋንቱ ኢቱ ኢቱ ዴዒኖ» ያጌዳ።

ዩሱሳ ማላይ ላሚቴዳ

(ማት 17:1-8፤ ማር 9:2-8)

28 ዩሱሲ ሃዋ ጎዋፔ ጉዪያን፣ ኢቲ ሳሚንታ ከና ጋሚዒዴ፣ ጳዒሮሳኔ ዮሃንሳ፣ ያዪቆባካ አኪዴ፣ ዎሳናው ዴሪያ ሁጲያ ኬሴዳ።

29 ኢ ዎሲሺን፣ አ ዴሙዋ ማላይ ላሚቴዳ፤ አ ማዩካ ቦጊዴ ጳልቄዳ።

30 ቆፔናን ላዑ አሳቱ፣ ሙሴኔ ኤላሰ ኬሲ ቤቲዴ፣ ዩሱሳና ሃሳይ ዴዒኖ።

31 ኡንቱንቱ ቦንቹዋን ቆንጨ ቤቲዴ፣ ዩሱሲ ያሳ ቆፋ ፖላናው ዩሩሳላሚን ሃይቃናዋ § አናና ሃሳዩዲኖ።

32 ጳዒሮሳኔ አናና ኢቲፔ ዴዒያዋንታ ጌሚዒሹ ጌሮዩዳሺን፣ ኤሌካ ቤጎቲዴ አ ቦንቹዋኔ አናና ጋሉ ኤቄዳ ላዑ አሳቱዋ ቤዔዲኖ።

33 ሄ ላዑ አሳቱ፣ ዩሱሳ ሚዪያፔ ሻኬቲያ ዎዴ፣ ጳዒሮሲ ዩሱሳ፣ «ጎዳው፣ ሃዋን ዴዒያዌ ኑሲ ሎዓ ጊዲያ ዲራው፣ ሄዘ

9:23 ማት 10:38፤ ሉቅ 14:27 † 9:23 ማስቃሊያ፣ ሃዋ ጉሳይ፣ ኢቲ አሳይ ባሬ ላይሳ ኡባን ያሳ ካሊዴ ሻኬቲናን ቶካናው ቤሲያ ሜቱዋኔ ዋዪያ። 9:28 2ጵፅ 1:17፣ 18 § 9:31 ሃይቃናዋ፣ ግሪኬ ማፃፋ ቆፋን ሃዋ ጉሳይ፣ «ዩሱሲ ሳሉዋ ቢያዋ»፤ ሃዌ ቃይ ኢ ሃይቁዋፔ ዴንዲያዎኔ ያቲዴ ሳሉዋ ቢያዋ ኡባ ሺሺ ኦይቄዳ ቆፋ።

ደሲያ ኢቱዋ ነው። ኢቱዋ ሙሴው። ኢቱዋ ኤላሳው ከፃና» ያጌዲ።

34 ጳጳርሲ ሄዋ ሃሳይ ዳዒሺን፣ ሻሪ ዩዴ ኢንቱንታ ካሚ አገና ዩሱሳ ካሊያዋንቱ ያዩዲኖ።

35 ሻሪያፕፕካ፣ «ታኒ ዶሬዳ ታ ናዓይ ሃዋ፤ ኢ ጊያዋ ሲሲቱ» ያጊያ ቃላይ ዩዲ።

36 ቃላይ ሲሴቶዋፕ ጉዩያን፣ ዩሱሲ ባሬ ፃላላ ጊዲዴ ቤቱዳ፤ ኢንቱንቱካ ዩዉዋ ባሬንቱ ዋዘናን ኦይቂዴ ሄ ዋዲያን ኦኒኔካ ኣያኔ ኦዲቤና።

ዩሱሲ ኢታ ኣያናን ኦይቂቲዳ ላዑ ኣሳቱዋ ፓሌዳ
(ማጥ 17:14-18፤ ማር 9:14-27)

37 ዋንቲላ ጋላሲ፣ ዩሱሲኔ ሄዙ ኣ ካሊያዋንቱ ዳሪያፕ ዱጌ ዋዲያ ዋዴ፣ ጮራ ኣሳይ ዩሱሳና ጋኬቲዳ።

38 ሄ ዋዴ ኣሳፕ ኢቲ ቢታኒ ባሬ ኮሻ ቶቁ ኦሊዴ፣ «ታማሪሲያዋ፣ ታው ዳዒያዋ ኢቲ ናዓ ጊዶ ዲራው፣ ኔኒ ኣ ቤዓና ማላ ኔና ዋሳይ፤

39 ቃሲ ኢታ ኣያናይ ዋዘና ኣሌናን ዳንዲዴ ኣ ዋሲሴ፤ ዶናና ፓርያና ጋካናው ኣ ኮኮርሲዴ፣ ኡባ ጋላሲ ሜቶሊያዋፕ ኣቲን፣ ኣ ኤሌ ዩዴና።

40 ኔና ካሊያዋንቱ ሄ ኢታ ኣያና ከሳና ማላ፣ ታኒ ኢንቱንታ ዋሳዲ፤ ሺን ዳንዳይቤይኪኖ» ያጌዲ።

41 ዩሱሲ ዛሪዴ ኢንቱንታ፣ «ኣማኔና ሃ ዋዲያ ዳሻ ኣሳው፣ ታኒ ሂንቲናና ኣዉዴ ጋካናው ዳዓኔ? ቃሲ ሂንቲንቱባ ኣዉዴ ጋካናው ዳንዳያኔ? ኔ ናዓ ሃ ኣካያ» ያጌዲ።

42 ናዓይ ዩዴ ዳዒሺን፣ ኢታ ኣያናይ ኣ ሳዓን ኦሊዴ ኮኮርሴዳ፤ ዩሱሲ ኢታ ኣያና ኣጋ ጊ ናዓ ፓሊዴ ኣ ኣቦ ዛሪዴ ኢሜዳ።

43 ኣሳይ ኡባይካ ያሳ ዋልቃማ ዋልቃፕ ዳንዶዋን ማላሌቲዲኖ።

ዩሱሲ ባሬ ሃይቁዋባ ላዒንሉዋ ኦዴዳ
(ማጥ 17:22-23፤ ማር 9:30-32)

44 «ታና ኣሳ ናዓ፣ ኣሳይ ኣሳ ኩሺያን ኣሊዴ ኢማናዋ፤ ሂንቲንቱ ሃ ዩዉዋ ዶሳፕቲ» ያጌዲ።

45 ሺን ኢ ጊያዋ ኢንቱንቱ ኣኬኪቤይኪኖ። ኢንቱንቶ ጌሌና ማላ ኢንቱንቱፕ ጌሜዳ ዲራው፣ ሃ ዩዉዋ ዩሱሳ ኦቻናው ያዩዲኖ።

ኡባፔ አዲያዌ ኦኔሻ? ያጊያ ኦሻ
(ማጥ 18:1-5፤ ማር 9:33-37)

46 እ ካሊያዋንቱ፡ «ኮ ጊደፔ ዳሪያዌ ኦኔ?» ያጊዴ ፓሉሚቲዲኖ።

47 ዬሱሲ ኡንቱንቱ ዋዛና ቆፋ ኤሪዴ፡ ጉላ ናዓ አሂዴ፡ ባሬ ማታን ኤሲዴ።

48 «ሃ ጉላ ናዓ ታ ሱንላን ሞኪያዌ ኦኔኔ ታና ሞኬዳ፤ ቃሲ ታና ሞኪያ ኡባይ፡ ታና ኪቱዳ ታ አባ ሞኬ። ሂንቱንቱ ኡባፔ ጉዲያዌ ኡባፔ ዳራ» ያጊዳ።

ሂንቱንቱ ጊያዋ ጳልቄና ኡራይ ሂንቱንቱ ባጋ
(ማር 9:38-40)

49 ዮሃንሲካ ዛሪዴ፡ «ጎዳው፡ አቲ አሳይ ኔ ሱንላን ኢታ አያናቱዋ ኬሲያዋ ኮኒ ቤዒዴ፡ ኮ ባጋ ጊዴና ዲራው፡ አ ዲጌዶ» ያጊዳ።

50 ሺን ዬሱሲ አ፡ «ሂንቱንቱ ጊያዋ ጳልቄናዌ ሂንቱንቱ ባጋ ጊዲያ ዲራው፡ አ ዲጎፕቱ» ያጊዳ።

ሳማሪያ ካታማ አሳቱ ዬሱሳ ሞካናው ኮዩቤይኪኖ

51 ዬሱሲ ሳሉዋ ቢያ ዋዲ ማቲና፡ ባሬ ዋዛና ቆፋ ዬሩሳላሜኮ ዛሪዳ።

52 ባሬፔ ሲንላው ኡባ ዬዉዋ ጊጊሳና ማላ፡ ኪቱቲያ አሳ ሳማሪያ ካታማ ኪቱዳ።

53 ሺን ኢ ዬሩሳላሜ ባናው ዴንዴዳ ዲራው፡ አሳይ አ ሞኪቤይኪኖ።

54 እ ካሊያዋንቱ ያዩቆቤኔ ዮሃንሲ ሄዋ ቤዒዴ፡ «ጎዳው፡ ኮኒ ኤላሲ ኡደዋዳን፡ * ታማይ ሳሉዋፔ ዩዴ ኡንቱንታ ማናዳን ቆሳና ማላ ኮያይ?» ያጊዲኖ።

55 ሺን ዬሱሲ ጉዬ ሲሚዴ፡ ኡንቱንታ ሴሬዳ። †

56 «ታኒ፡ አሳ ናዓይ፡ አሳ ሺምፑዋ አሻናው ዮዋፔ አቲን፡ ባዩዛናው ያቤይኬ» ያጊዳ። ኡንቱንቱ ሃራሳን ዴዒያ ቄሪ ካታማ ቤዲኖ።

ዬሱሳ ካሊያዋንታ ጋኪያ ፓጩያ
(ማጥ 8:19-22)

9:46 ሉቅ 22:24 * 9:54 ኤላሲ ኡደዋዳን፡ አቲ አቲ ጌሻ ማፃፋ ቢሉላን፡ «ሃ አሳ ዉርሳናው» ያጌ። † 9:55 ኡንቱንታ ሴሬዳ፡ አቲ አቲ ጌሻ ማፃፋን ዴዒያ ቢሉላይ፡ «ኔኒ አዩ ማላ አያኔንቱ፡ ኔና ኤሪኪ? አሳ ናዓይ አሳ ሺምፑዋ አሻናው ዬዳፔ አቲን፡ ባዩዛናው ዩቤና» ያጌ።

57 ኡንቲንቲ ኦጊያና ቢሺን፣ ኢቲ ቢታኒ ዬሱሳ፣ «ጎዳው፣ ኔኒ ቢያሳ ኡባ ታኒ ኔና ካላና» ያጌዳ።

58 ዬሱሱ ኣ፣ «ዎራካናቶ ኦላይ፣ ሳሉዋ ካፋቶካ ጎሊ ዳዔ፤ ሺን ታኒ፣ ኣሳ ናዓይ፣ ጌላ ሹዎፓ ኣኪያሳይ ታው ባዎ» ያጌዳ።

59 ዬሱሱ ሃራ ኡራ፣ «ታና ካላ» ያጌዳ። ሺን፣ ቢታኒ፣ «ጎዳው፣ ታኒ ካሲያን ባዴ ታ ኣባ ዎጋና» ያጌዳ።

60 ዬሱሱ፣ «ሃይቆዎንታ ባሬንቲ ሃይቆዎንቲ ዎጊኖ፤ ኔኒ ባዴ፣ ያሳ ካዉቲላባ ኦዳ» ያጌዳ።

61 ቃሲ ሃራ ቢታኒ፣ «ጎዳው፣ ታኒ ኔና ካላና፤ ሺን ኮይሩዎን ታ ሶይ ኣሳ ባዴ ሳሮታና» ያጌዳ።

62 ሺን ዬሱሱ ኣ፣ «ቦራ ጎሻናው ደዎዌ ኦኒኔ ጉዬ ዪሎፔ ያሳ ካዉቲላው ቤሴና» ያጌዳ።

10

ሚሺራቹዎ ቃላው ኪቴቲዳ ኣሳቱዎ

1 ሃዋፔ ካላ ጎዳይ ሃራ ላፑን ታው * ኣሳ ሱንሊዴ ላዑዎ ላዑዎ ኡዲዴ ኢ ባናው ዳዒያ ካታማ ኡባ ኪቴዳ።

2 ዬሱሱ ኡንቲንታ፣ «ቆይቻው ጋኬዳ ካላይ ዳራ፤ ኪቴቲያ ኣሳይ ጉላ። ሲሚ ቆይጨቲያ ካላ ጎዳይ፣ ቆይቻው ኪቴቲያዎንታ ዬዳና ማላ ዎሲቴ።

3 ታኒ ደርሳቱዎዳን ዎላቱዎ ጊዶ ሂንቴና ኪታይ፣ ቢቴ።

4 ሂንቴንቲ ኦጊው ኣያኔ ኦይቆፒቴ፣ ቦርሳ፣ ቃርጨቲያ፣ ጨማ፣ ጊዲናካ ኦይቆፒቴ፤ ኣሳና ሳሮቴቲዴ ኦጊያን ዎዲያ ዉርሶፒቴ።

† 5 «ሂንቴንቲ ጌሊያ ጎሌ ኡባ ካሲያን፣ ሳሮቴላይ ሃ ጎሊው ጊዶ» ያጌዳ።

9:61 1ካት 19:20 * 10:1 ላፑን ታው፡ ኢቲ ኢቲ ጌሻ ማፃፋ ቢሊላን፡ «ላፑን ታማኔ ላዓ»። ኣዪሁዳ ዎጋን ቢታ ቦላን ዳዒያ ኣሳ ዜሬላይ ላፑን ታማ፡ ሺን ካሲ ኤጫ ግጋኬ ማፃፋ ቢሊላን ዳዒያዊ፡ «ላፑን ታማኔ ላዓ»። ኦኒ ኤሪ ዬሱሱ ባሬ ቃላ ኣላሚያ የሹዎን ጋላናው ሃ ፓይዲዎና ቃራ ኣሳ ሱንሊዴ ኪቴናን ኣኒና ያጊያ ቆፋይ ዳዔ። 10:2 ማት 9:37፣ 38 10:3 ማት 10:16 † 10:4 ኣሳና ሳሮቴቲዴ ኦጊያን ዎዲያ ዉርሶፒቴ፡ ሄ ጋላሳን ጋራቲላን ኡዲያ ሳሮታይ ዎዲያ ሎይሊ ሚያ ዲራው፡ ሃዌ ሃሳዬቴዳ። 10:4 ማት 10:7-14፤ ማር 6:8-11፤ ሉቅ 9:3-5

6 ሄ ጎሊያን ሳርቴላ ደሲያ አሳይ ዳጋ፣ ሂንቴንቱ ሳርታይ ሄ ጎሊያን አቃናዋ፤ ኮዬናዋ ጊደ፣ ሂንቴንቱ ሳርታይ ሂንቴንቶ ሲማናዋ።

7 ሄ ጎሊያን ኡንቱንቶ ዳዲያዋ፣ ሚዲኔ ኡሺዬ ዳዲሺቴ፤ አሳንቻው አ ዲርጉዋ ጨጋይ ኮሼ፤ ኢቲ ጎሊያ፣ ሃራ ጎሊያ ዩዮ፣ፒቴ።

8 «አይ ካታማኔ ሂንቴንቱ ጌሊያ ዋዴ፣ አሳይ ሂንቴና ሞኪ አኪዴ ሚዛናው ሺሾዋ አያኔ ሚቴ።

9 ሄ ካታማቲን ዳዲያ ሃርጋንቻቱዋ ፓሊዴ አሳው፣ «ጻሳ ካወቱላይ ሂንቴኮ ማቴዳ፣፥ ያጊዴ ኦዲቴ።

10 ዬወዋን ቃሲ አይ ካታማኔ ጌሎዴ፣ አሳይ ሂንቴንታ ሞኪ አኪናዋንታ ጊደ፣ ሄ ካታማ ቃቆኮ ኬሲኔ።

11 ሱኒ ሂንቴና ዬላያናው፣ ሃራይ አቶ ኑ ጌዲያ ቦላን ዳዲያ ሂንቴንቱ ካታማ ባናካ ሂንቴንቶ ቆቆፊቶ ል፤ ዬወዋን ቃሲ፣ ጻሳ ካወቱላይ ሂንቴንቱኮ ማቴዳዋ ኤሪቴ» ያጊቴ።

12 ፒርዳ ጋላሲ ሃ ካታማቲ፣ ሶደማ ካታማ ጋኬዳ ሙራይ ካወሻናዋ ያጋዴ ታኒ ሂንቴው ኦዲይ።

አማኔናን ኢጲዳ ካታማቱዋ
(ማት 11:20-24)

13 «አዬ ኔው ኮራዚኔ፤ አዬ ኔው ቤቴሳይዴ፤ ሂንቴንቱን ሃኔዳ ማላታቱ ጊርሳ ካታማኒኔ ሲደና ካታማን ሃኔዴንቶ፣ ሃዋን ዳዲያ አሳቱ ካዩዋ ማዩዋ ማዩዴ፣ ቢዲንሳ ቦላን ኡቲዴ፣ ቤኒፔ ባሬንቱ ናጋራ፣ ሲማናዋንታሺን።

14 ሃዋ ዲራው፣ ሙራቲያ ጋላሲ ሂንቴንቱ፣ አሊዴ ጊርሳ ካታማዉኔ ሲደና ካታማው ሙራይ ካወሻናዋ።

15 ሃኔ ቂፊሪናሆሜ፣ ኔኒ ሳሉዋ ፑዴ ቶቁ ጋናው ኮያዲ? ዲጌ ሲጶሊያ ዋቆናሳ።

16 «ሂንቴንቱ ጊያዋ ሲሲያ አሳይ፣ ታኒ ጊያዋ ሲሴ፤ ሂንቴንታ ኢጲያ ኡራይ ታና ኢጲ፤ ታና ኢጲያ ኡራይ ታና ኪቴዳዋካ ኢጲ» ያጊዳ።

አ ካሊያዋንቱ ኪቴቴዳሳፔ ሲሜዲና

10:7 1ቆር 9:14፤ 1ጊሞ 5:18 ፥ **10:9** ጻሳ ካወቱላይ ሂንቴኮ ማቴዳ፣ ሃዋ ጉሳይ፣ «ጻሳ ካወቱላይ ሃዋን ዋይ ሂንቴንቱ ጊደን ዳዴ» ጉሳ። **§ 10:11** ባናካ ሂንቴንቶ ቆቆፊቶ፣ ሃዋ ጉሳይ፣ ኢፀዋ ቤሲያዋ። **10:11** ከት 13:51 **10:12** ዳሞ 19:24-28፤ ማት 10:15፤ 11:24 **10:15** ኢሳ 14:13-15 **10:16** ማት 10:40፤ ማር 9:37፤ ሉቃ 9:48፤ ዮሀ 13:20

17 ለጥን ታሙ አሳቱካ፡ «ጎዳው፡ ኢታ ኣያናቱካ ኔ ሱንላን ኑሲ ኣዘዘቲዲኖ» ያጊዴ ናሼቻን ሲሜዲኖ።

18 ዩሱሲካ ኡንቲንተ፡ «ሴፃናይ ዋልቃንላዳን ሳሉዋፔ ዋዲሺን ቤዓዲ።

19 ሲሚ ሸሻኔ ሱጉዋ ዩዳናዲን ሂንቲንቱ ሞርኪያ ፃላሂያ ዋልቃ ያናና ማላ ማታ ኢማዲ። ሂንቲንታ ቆሃናዌ ኣይኔካ ዴዔና።

20 ጊደፔ ኣቲን ሂንቲንቱ ሱንላይ ሳሉዋ ማዘጎቢያን ፃፊቶ ዲራው፡ ናሼቲቲፔ ኣቲን ኢታ ኣያናቱ ኣዘዘቶ ዲራው ናሼቶፒቲ። ያጊዲ።

ዩሱሲ ባሬ ናሼቻ ቆንጨሴዳ

(ማት 11:25-27፤ 16:13-17)

21 ሄ ዋዲያን ዩሱሲ ኣያና ጌሻን ዳሮ ናሼቲዴ፡ «ሳሉዋኔ ሳዓ ጎዳው፡ ኔኒ ሃ ዩዌዋ ታማሮዋንቲፔኔ ኣጵ ኤራንቻቲዋፔ ጌንላዴ፡ ቁሪ ናናው ቆንጨሴ ዲራው፡ ኔና ጋላታይ፤ ኤ፡ ታ ኣቦ፡ ኣዩሲ ጎፔ፡ ሃዋ ኦላናው ኔ ሎዖ ሸኔ ጊዴዲ።

22 «ኡባ ዩዌ ታው ታ ኣቡፔ ኢማቲዳ። ናዓይ ኦኔንቶ ኣዉዋፔ ኣቲሺን ኦኒኔ ኤሪያዌ ባዋ፤ ሄዋዳንካ ኣዉ ኦኔንቶ ናዓፔኔ ኢ ቆንጨሳናው ኮዮ ኡራፔ ኣቲን፡ ሃራይ ኦኒኔ ኤሪያዌ ባዋ» ያጊዲ።

23 ካሊዴካ ዩሱሲ ባሬና ካሊያዋንቲኮ ሲሚ ዋዲዴ፡ ኣንቲንቲ ፃላላ፡ «ሂንቲንቲ ቤዒያዋ ፃሊያ ኣይፋቲ ኣንጄቲዳዋንታ።

24 ታ ሂንቲው ኦዲያዌ ኣዬ ጎፔ፡ ጮራ ናባቲኔ ካታቲ ሂንቲንቲ ቤዒያዋ ቤዓናው ኣሞቲዲኖሺን ቤዒቤይኪኖ፤ ሂንቲንቲ ሲሲያዋካ ሲሳናው ኣሞቲዲኖ፤ ሺን ሲሲቤይኪኖ» ያጊዲ።

አሳው ቃሬቲያ ሳማሪያ ቢታኒያ

25 ኣቲ ጋላሲ ሂጊያ ኤሪያዌ ኣቲ ዩሱሳ ፓጫናው ኣኮ ዩዴ፡ «ታማሪሲያዎ፡ ሜዲና ዴዑዋ ላታናው፡ ታኒ ኣያ ኡዶ?» ያጊ ኦቲዲ።

26 ዩሱሲ ዛሪዴ፡ «ሙሴ ሂጊያ ማፃፋን ፃፊቶዌ ኣዬ? ኔኒ ኣያ ጋዴ ቢላይ?» ያጊዲ።

27 ቢታኒካ፡ «ሙሴ ሂጊያ ማፃፋይ፡ ሦሳ ኔ ጎዳ ፖሎ ኔ ዋዛናፔ፡ ፖሎ ኔ ሸምፑዋፔ፡ ፖሎ ኔ ዋልቃፔኔ ፖሎ ኔ ቆፋፔ ሲቃ፤ ሄዋዳንካ ኔ ላጌላካ ኔ ሁጲያዳን ዶሳ» ያጊዲ።

28 ዩሱሲ ኣ፡ «ሊኬ፡ ቱሙዋ ጋዳ፤ ሲሚ ኔኒካ ሃዋ ኦላ፤ ዴዑዋን ዴዓናሳ» ያጊዲ።

29 ሙሴ ሂጊያ ታማሪሲያ ቢታኒ ቃይ ባሬና ዲሎ ኦላናው ኮዪዴ ዩሱሳ፡ «ሃኖሺን፣ ታ ላጌላይ ኦኔ?» ያጊዴ ኦቼዳ።

30 ዩሱሲ ዛሪዳ፡ «ኢቲ ቢታኒ ዩሩሳላሜ፤ ኢያርኮ ቢዴ ዴዒሺን፣ ኦጊያ ቦላን ፓናቱ ኦ ዴሚዳ፣ ኦ ማዩዋ ቃርዋ፤ ጉዩ ሾጩዳ፡ ሃይቃናው ፖሉ ጎዴ ኦሊዳ ቤዲና።

31 ቆፔናን ኢቲ ቁሳይ ሄ ኦጊያና ቢዴዒያዊ፡ ሾጩቲዳ ኩንዳዳ ቢታኒያ ቤዒዳ ዋዳ፡ ኢያኔ ኡዴናን ሚዪያና ኦዲዳ ቤዳ።

32 ሄዋዳንካ ኢቲ ለዊ ሄ ኦጊያና ቢዴዒ። ኢካ ቢታኒያ ቤዒዳ፡ ሚዩቲ ኦዲዳ።

33 ሺን ሳማሪያ ኦሳ ጊዴዳ ኢቲ ቢታኒ፣ ሄ ባጋና ኦዲዳ፣ ሃ ቢታኒያኮ ዩዳ። ኦ ቤዒዳ ዋዳ ኦው ቃሬቲዳ።

34 ኦኮካ ሸቂዳ፡ ዛይቲያኔ ዋዪኒያ ኤሳ * ኦ ማይላን ቲጊዳ፡ ቃቼዳ። ሄዋ፤ ጉዩ ባሬ ሃሪያ ቶጊሲዳ፡ ኢማላይ ኦቂያ ጎሊያ ኦኪ ቤዳ፤ ሄዋን ቢዳዪዳ ናጌዳ።

35 ዋንቲላ ጋላሲ ጉላ ቢራ ባሬ ኪሲያ፤ ኬሲዳ፡ ኢማላይ ኦቂያ ጎሊያ ጎዳው ኢሚዳ፣ «ሃ ቢታኒያ ታው ሎይላ ቢዳያ፤ ሃዋ፤ ዳሩዋ ኔኒ ኬሶ፤ ታኒ ሲሚያ ዋዳ ኔው ጩጋና» ያጌዳ።

36 «ሲሚ ሃ ሄዙ ኦሳቲዋ፤ ፓናቲዋ ኩሺያን ሾጩቲዳ ኩንዳዳ ቢታኒው፡ ላጌ ጊዴዳዊ ሃቃዋ ማላቲ?» ያጌዳ።

37 ሂጊያ ታማሪሲያዊካ፡ «ሄ ኦው ቃሬቶዋ» ያጌዳ።

ዩሱሲካ ኦ፡ «ሲሚ ባዴ ኔኒካ ሄዋዳን ኦላ» ያጌዳ።

ዩሱሲ ማርቲኔ ማይራሚ ሶይ ቤዳ

38 ዩሱሲ ባሬና ካሊያዋንቲና ኦጊያ ቢዳ፡ ኢቲ ሄራ ጋርሳ ጋኬዳ። ሄዋን ማርቶ ጌቲቲያ ኢቲ ሚሺራታ ባሬ ጎሊን ሞካዳ።

39 ኢዚዉካ ማይራዋ ጌቲቲያ ሚቻታ ዴዳው፤ ሄናካ ዩሱሳ ጌዲያ ማታን ኡታዳ፡ ኢ ኦዲያዋ ሃይዛዴ ዴዳው።

40 ማርታ ቃይ ሶይባ ጊጊሳዴ ዳቡራ ዴዳው፤ ሄዋ ዲራው ዩሱሳኮ ሸቃዳ፡ «ሃና ታ ሚቻታ፡ ኪታ ኡባ ታ ቦላ ኦሊና፣ ታኒ ታሬካ ላባናዴ ያላዴ ጮዑ ጋይ? ሃያና ታና ማዳናዳን ኢዚው ኦዳ» ያጋዲ።

41 ዩሱሲካ ዛሪዳ ኢዘ፡ «ማርቲ፣ ማርቲ፣ ኔኒ ጮራ ዩዉዋ ቆፓዳ ሂርጋ፤ ቃሲካ ሜቶታ።

10:33 2ኦድ 28:15 * 10:34 ዛይቲያኔ ዋዪኒያ ኤሳ፡ ኦራላ ጫቁዋ ዋዲያን ሃዋንቲ ዳሊያዋንታ ጌቲቲዳ ኦኬቲና። ኡባ ሃዋኒ ያሬቲዳ ዛይቲ፡ ኦራላ ዳሊያ ማላታ ጌቲቲ። ያይ 5:14 ያለቲ። 10:38 ዮሀ 11:1

42 ሺን ኮሺያዌ ኢቲባ፤ ማይራማ ባሬፔ ኦኒኔ ኣኬና ሎዖባ ደራዲ» ያጌዳ።

11

ዩሱሲ ዋሳባ ታማሪሴዳ

(ማት 6:9-13፤ 7:7-11)

1 ኢቲ ጋላሲ ዩሱሲ ኢቲሳን ዋሳ ዋሲ ዴዔ። ዋሳ ወርሶዋፔ ጉዬ ኣ ካሊያዋንቱፔ ኢቱ። «ጎዳው! ዮሃንሲ ባሬና ካሊያዋንታ ዋሳ ታማሪሶዋዳን። ኦናካ ኔኒ ዋጊ ዋሳኔንቶ ታማሪሳ» ያጌዳ።

2 ኢካ ኡንቱንታ፡ «ዎሳ ዋሲዴ ያጊ ዋሲቱ፡ ሳሉዋን ዴዒያ ኦ ኣቦ፡ ኔ ሱንሳይ ኣንጃቶ፤ ኔ ካወቱሳይ ዮ፤ ኔ ሼኒ ሳሉዋን ሃኖዋዳን ሳዓንካ ሃኖ፤

3 « ጋላሳን ጋላሳን ኮሺያ ቁማ ኦሲ ሃቼ ኢማ፤

4 « ሱኒ ኦና ናቁዳዋንቱዋ ኡባ ኣቶ ጎዋዳን፡ ኔኒካ ኦናቁዋ ኣቶ ያጋ፤ ኦና ኢታፔ ናጋፔ ኣቲን፡ ፓጪያን ጌልሶፓ» ያጊቱ» ያጌዳ።

5 ቃይካ ዩሱሲ ባሬና ካሊያዋንታ፡ «ሂንቱንቱፔ ኢቶ ሲቆ ላጊ ዴዒንቶ ጊዶ ቢላሂያን ኣኮ ዪዴ፡ ታ ሲቆ ላጌው፡ ታው ሄዙ ሶሉዋ ታልዓ፤

6 ኣዪሲ ጎፔ፡ ኢቲ ታ ላጌሳይ ዪና ኣ ሚዚያዋ ጳያዲ» ያጊ ዋሲዳ ጎይቱ።

7 ባሬ ጎሌን ዴዒያ ኣ ሲቆ ላጊ ሶዪፔ ሃሳዪዴ፡ ታና ሜቶሶፓ፤ ፔንጊ ቃሽቲዳ፤ ታናናይካ ታናና ጊሴዲኖ፤ ሄዋ ዲራው ታኒ ዴንዲዴ ኔው ኣይኔ ኢማናው ዴንዲይኬ» ጋናዋ?

8 ታኒ ሂንቱንቶ ኡዲያዌ ኣዬ ጎፔ፡ ኢ ኣው ሲቆ ላጊያ ጊዶ ዲራው፡ ኢሜኔንቶኔካ ኡንዔሶ ዲራው ኢ ኮዪያዋ ኡባ ኢሜ።

9 ሃዋ ዲራው፡ ሰሲቱ፡ ሂንቱንቶካ ኢሜታናዋ፤ ኮዪቱ፡ ዴማኒታ፤ ካሪያ ዪዴ ጃሲቱ፡ ሂንቱንቶ ደዬታናዋ» ያጋይ።

10 ጋሱካ፡ ዋሲያ፡ ኡባይ ኣካናዋ፤ ኮዪያ ኡራይካ ዴማናዋ፤ ካሪያ ዪዴ ጃሲያ ኡራው፡ ካሪ ደዬታናዋ።

11 «ሂንቱንቱ ጊዶፔ ባሬ ናዓው፡ ዋሊያ ዋሲና ሾሻ፡ ቁማ ኢማ ጊና ሹቻ ኢሚያ ኣዉ ዴዒ?»

12 ወይ ቁቁሊያ ዋሲና ሶጉዋ አሚዬ?

13 ሂንቲንቱ ኢታ ጊዲ ደዒዳ ሂንቲንቱ ናናው ሎዖባ አሚያዎ ኤሮፔ፣ ያቲና ሳሉዋን ደዒያ ሂንቲንቱ አዉ ባሬና ዋሲያዋንቶ አያና ጌሻ ዋቲ ዳሪሲዳ አማንዳሻ?» ያጌዳ።

ዬሱሳኔ በዔል-ዘቡላ
(ማጥ 12:22-30፤ ማር 3:20-27)

14 አቲ ጋላሲ ዬሱሲ አቲ ቢታኒያፔ ዲዲሲያ አያና ከሶዋፔ ጉዬ ዲዳ ቢታኒ ሃሳያ ደሚና፣ አሳይ ማላሌቲዳ።

15 ሺን ኡንቲንቱቲ አቱ አቱ፣ «ጋሌናቱዋ ካፑዋ ቢዔል-ዘቡላ አው ዋልቃ አሚና ጋሌናቱዋ ከሴ» ያጌዲኖ።

16 አቱ አቱ ቃሲ ዬሱሳ ፓጫናው ሳሉዋፔ ማላታ ቤሳናዲን አፔ ኮዬዲኖ።

17 ሺን ዬሱሲካ ኡንቲንቱ ቆፋ ኤሪዳ ኡንቲንታ ሃዋ ያጌዳ። «ባሬ ጊደን ሻኬቲያ ካዉቲላይ ኡባይ ቆያናዋ፤ ሻኬቲያ ጎሊካ ኩንዴ።

18 ያቲና ሴፃና ካዉቲላይ ባሬ ጊደን ሻኬቶፔ አ ካዉቲላይ ዋቲ ኤቃናዌ? ሂንቲንቱ ታና፣ ሳላሂያ ካፑዋ ቢዔል-ዘቡላ ኔው ዋልቃ አሚና ከሳ) ያጌ ሃሳዪታ።

19 ሲሚ ታኒ በዔል-ዘቡላ ዋልቃን ጋሌናቱዋ ከሲያዋ ጊደፔ ሂንቲንቱ ናናይ ኦ ዋልቃን ከሳናዋንቱ? ሃዋ ጊዲያ ዲራው፣ ኡንቲንቱ ሂንቲንቱ ቦላን ፒርዲያዋንታ ጊዳናዋንታ።

20 ሺን ታኒ ጋሌናቱዋ ከሲያዌ ያሳ ዋልቃና ጊደፔ፣ ሲሚ ያሳ ካዉቲላይ ሂንቲንቱኮ ዬዳዋ ኤሪቲ።

21 «ዋልቃማ አሳይ ቤሲያዋዲን ሚኒዳ ባሬ ጎሊያ ናጎፔ፣ አ ሻሉ ሎይሊ ናጌታናዋ።

22 ዬዉዋን ቃሲ አፔ ሚኑዋ ዳሪያዌ ዪዳ አ ቆሆፔኔ ያኖፔ ኢ አማኔቲዳ ቶራኔ ጎንዳሊያ አፔ ዋሊ አኪዴ፣ አው ደዒያ ሚሻ ጌሼቲ አኬ።

23 «ታ ባጋ ጊዳናዌ ታናና ኤቄቲ፤ ታናና ሺሺ ቤናዌካ ላሌ።

ቱና አያናይ ካሴ ዩጊ ቤዳ አሳኮ ሲሚዳ ዪያ ጋሱዋ
(ማጥ 12:43-45)

24 «ቱና አያናይ አሳፔ ከሴዳ ዋዴ፣ ባሬው ሸምፒያሳ ኮዪዳ፣ ሃላይ ባንታሳና አቋ ቤ። ሸምፒያሳ ዴሜናን አቶፔ፣ ሳታኒ ካሴ ዩጋ ከሴዳ ታ ጎሊያ ሲማና) ያጌ፤

25 ሲሚያ ዋዴካ ጎሊ ፒቲቲዳ ገሳዋ ዳሚ።

26 ሄዋፔ ካላ፣ ቢዳ ሃራ አፔ ኢታ ላፑ ቱና አያናቱዋ አኪ ያ ጌሊዳ፣ ሄዋን ዳዒና፤ ሄ ቢታኒያ ዳዑ ኮይሮዋፔ ካላዌ ኢቶዋ ጌዳ» ያጌዳ።

27 ዩሱሲ ሃዋ ሃሳይ ዳዒሺን፣ ኢቲ ሚሺራታ ጮራ አሳ ጊደፔ ባሬ ኮሻ ቶቁ ኦሳዳ፣ «ኔና ዩሌዳዉናኔ ቆንጮዳ ኔ ዳያ አንጄቲዳዉና» ያጋደ።

28 ዩሱሲ ቃሲ፣ «አንጄቲዳዋንቱ ያሳ ቃላ ሲሲዳ አዛዘቲያዋንታ» ያገረ ዛሬዳ።

ያሳፔ ኦሴቶ ማላታ
(ማት 12:38-42፤ ማር 8:12)

29 ጮራ አሳይ ሺቆ ዋዳ ዩሱሲ፣ «ሃ ዩሌታይ ኢታ፤ ኦራላ ማላታ ኮዬ፤ ሺን ናቢያ ዮናሳ ማላታፔ ሃራይ አሜቲና።

30 ጋሱካ ዮናሲ ኔኔዌ ካታማ አሳው ማላታ ጊደዋዳን፣ ታኒ፣ አሳ ናዒይካ፣ ሃ ዩሌታው ማላታ ጊዳና።

31 አዋይ ሞኪያሳ ያሊያ ዋዳ፣ ኡሼቻ ዲጌባጋና ዳዒያ ጋዲያ ካታታ ሶሎሞኔው ዳዒያ አቶ ኤራቲላ ሲሳናው ቢታ ጋፃፔ ዩዳ ዲራው፣ ፒርዳ ዋዳ ሃ ዩሌታን ዳንዳዳ ፒርዳናዉኑ፤ ቤዒቲ፣ ሶሎሞኔፔካ አቋያዌ ሃዋን ዳዔ።

32 ኔኔዌ አሳይ ፒርዳ ዋዳ ሃንቲንቱ ቦላ ዳንዲዳ ፒርዳናዋንታ፤ አያው ጎፔ፣ ኡንቲንቱ ዮናሲ ኦደዋ ሲሲዳ ባሬንቱ ናጋራ ፓዲ ሲሜዳ ዲራሳ፤ ቤዒቲ፣ ዮናሳፔ አቋያዌ ሃዋን ዳዔ።

ቦላ ፖሊሲያ ያምፒያ
(ማት 5:15፤ 6:22-23)

33 «ሶይ ጌሊያ አሳው ፖላናዳን፣ ያምፒያ ያምፒዳ ቶቃሳን ዋላናፔ አቲን፣ ጌማሳን ዋይ ፖዑዋ ካሚያ ዩዉዋፔ ጋርሳና ዋሊያዌ ኦኒኔ ባዋ።

34 ኔ አሳቲላው ኔ አይፊ ያምፒያ ማላ፤ ኔ አይፊ ፓፃ ጊደፔ ኔ ኩሜንላ አሳቲላይካ ፖዑዋ ዳሜ፤ ሺን ኔ አይፊ ሃርሳፔ ኔ ኩሜንላ አሳቲላይካ ቋማ።

35 አከካ፤ ሄዋ ጊዲያ ዲራው፣ ኔ ጋርሳን ዳዒያ ፖዑ ቋሚናዳን ናጌታ።

36 ሲሚ ኔ አሳቲላይ ኡባይ ፖዑዋን ኩሜዳዋ ጊደፔ፤ ቋሚዳ አሳቲላይ ኔናን ባይናዋ ጊደፔ፣ ኔ አሳቲላይ ኡባይ።

11:29 ማት 16:4፤ ማር 8:12 11:30 ዮን 3:4 11:31 1ካት 10:1-10፤
2ኦድ 9:1-12 11:32 ዮን 3:5 11:33 ማት 5:15፤ ማር 4:21፤ ሉቃ 8:16

ጾምፒ ባሬ ፖዑዋ ኔ ቦላን ፖሲሲያዋዳን፣ ኔ ቦላን ዋጋጋ ፖዑዋ ጊዳናዋ» ያጌዳ።

ዩሱሲ ፓሪሳዋቱዋኔ ሙሴ ሂጊያ ታማሪሲያዋንታ ኩናኔዳ (ማጥ 23:1-36፤ ማር 12:38-40፤ ሉቅ 20:45-47)

37 ዩሱሲ ሃሳያ ወርሶዋፔ ካላ፣ ኢቲ ፓሪሳዌ ቢታኒ ባሬ ጎሌን ቁማ ማናዳን ኣታሌዳ፤ ዩሱሲካ ኢቲፔ ጌሊዳ ጋዪታን ኡቴዳ። *

38 ፓሪሳዊካ ዩሱሳ ቁማ ማናፔ ካሲያን ኩሺያ ሜጩቲ ቤናዋ ቤዒዳ ማላሌቲና።

39 ጎዳይካ፣ «ሂንቴንቶ ፓሪሳዋቶ፣ ፀዓይ ሻታ ቦላ ባጋ ጌሺታ፤ ሺን ሂንቴንቱ ጋርሳይ ኡዚያኒኔ ኢታቴላን ኩሜዳ።

40 ሂንቴንቶ ኤያቶ! ቦላ ባጋ ሜዴዳዌ ጋርሳ ሜዲቤኔ?

41 ሺን ሂንቴንቱ ፀዓይኒ ሻታ ጋርሳን ዳዒያዋ ሂዩሳቶ ኢሚቴ፤ ሄዎዳ ኡባባይካ ሂንቴው ጌሻ ጊዳናዋ።

42 «ሺን ሂንቴንቶ ፓሪሳዋቶ፣ ሂንቴው ኣዬ! ኣያው ጎፔ፣ ኣኦጋፔኔ ፃሎቲያፔ፣ ኣፑፒያ ደዑዋፔ፣ ታሙ ኩሺያፔ ኢቲ ኩሺያ ጾሳው ኢሚታ፤ ሺን ቱሙ ፒርዳኔ ጾሳ ሲቂያዋ ሂንቴንቱ ኣጊታ። ዩወዋን ቃሲ ሂዋ ኣኔናን ሃዋ ኣላናው ቤሴ።

43 «ሂንቴንቶ ፓሪሳዋቶ፣ ሂንቴው ኣዬ! ኣያው ጎፔ፣ ኣዪሁዳ ኣሳ ዎሳ ጎሊን ቦንቾ ኡቱዋ፣ ጌያ ጊደኒካ ቦንቾ ሳርታ ኮዪታ።

44 «ኣሳይ ኤሬናን ቦላና ሃሜቲያ ቤቴና ዱፋዋ ማላቲያ ዲራው ሂንቴው ኣዬ!» ያጌዳ።

45 ሙሴ ሂጊያ ታማሪሲያዋንቱፔ ኢቱ፣ «ታማሪሲያዋ፣ ኔኒ ሃዋ ያጋ ሃሳዮ ዲራው ኑና ቦራዳ» ያጊ ዛሬዳ።

46 ዩሱሲ፣ «ሂንቴና ሂጊያ ኤሪያዋንቶ፣ ሄንቴው ኣዬ! ኣያው ጎፔ፣ ኣሳይ ቶኪዳ ዳንዳዬና ዳፆ ቶኩዋ ሃራ ቶሲታ፤ ሺን ሂንቴንቱ ሂንቴ ሁጳው ቢራዲያንካ ቦቺኪታ።

47 «ሂንቴንቱ ኣዎቱ ዎዴዳ ናባቱዋ ዱፋዋ ሎይሊያ ዲራው ሂንቴው ኣዬ!

48 ሲሚ ሂንቴንቱ ኣዎቱ ናባቱዋ ዎዴና፣ ሂንቴንቱ ኣንቱንቱ ዱፋዋ ቦላን ጎሊያ ኬዲያ ዲራው፣ «ናባቱዋ ኦሱ ሎዓ» ያጊዳ፣ ኣንቱንቱዋ ማርካቲታ።

49 ሃዋ ዲራው፣ ጾሳ ኣዶ ኤራቴላይ፣ ታኒ ናባቱዋኔ ዩሱሲ ኪቶዋንታ ኡንቱንቱኩ ኪታና፤ ኡንቱንቱካ ሄዎንቱፔ ኢቱዋ ኢቱዋ ዎዳናዋንታ፤ ኢቱዋ ኢቱዋ ሜቶላናዋንታ) ያጌዳ።

* 11:37 ጋይታን ኡቴዳ፣ ቁማ ማናው ኡቴዳ ጉሳ። 11:42 ዎግ 27:30

50 ሃዋ ጊዲያ ዲራው፣ ሃ አላሚ ሜዴቶዴፔ ደሚዳ ጉኩዳ ናባቱዋ ሱላው ሃ ዩሌታይ ኦሼቱ።

51 አቤላፔ ደሚዳ ያርሹዋሳፔኔ ጌሻ ጎሊያፔ ጊዲያን ጉኩዳ ዛካራሳ † ሱላ ጋካናው ኮዩቱ። ኤ! ታኒ ጋይ፤ ሃ ዩሌታይ ሃዋ ኦሼቲያዋ።

52 «ሂንቴንቶ ሙሴ ሂጊያ ኤሪያዋንቶ፣ ሂንቴው አዩ! አያው ጎፔ ኤሪ ፔንጊያ ደዪያ ቁልፒያ አኩዲታ። ሂንቴንቱ ሂንቱ ሁጵወካ ጌሊቤይኪታ፤ ቃሲ ጌላናው ኮዪያዋንታካ ዲጌዲታ» ያጌዳ።

53 ዩሱሲ ሄዋፔ ከሶዋፔ ጉዪያን፣ ሂጊያ ታማሪሲያዋንቱኔ ፓሪሳዋቱ አ ኦሻን ኡርጉንሉሳኔ ኤቁቱሳ ደሚዲኖ።

54 አ ደናፔ ሎዔናባይ ከሶፔ አይቃናው ጌዲኖ፤ ሺን ዳሚቤይኪኖ።

12

ሎዒ ማላቲያ ኢታቴላፔ ናጌታና ማላ ሴራ

(ማት 10:26፣ 27)

1 ሄ ዋዲያን ጮራ ሻዒን ፓይዳቲያ አሳይ ኢቱ ኢቱዋ ዩቆና ጋካናው ሺቁ ዳዒሺን፣ ዩሱሲ ባሪና ካሊያዋንቶ ኮይሮ ኦዳናው ደሚዳ፣ «ፓሪሳዋቱዋ ኢርሹዋፔ ናጌቲቲ፤ ሃዌካ ሎዒ ማላቲያ ኤንቲንቱ አሚያ ኢታ ቲሚርቲያ።

2 ሺን አያኒኔ ካሚቴዳ ዩወ ቆንጨያ ከሴናን አቴና፤ ቃሲካ ጌሚዳ ዩወ ኤሪቴናን አቴና።

3 ሃዋ ዲራው ሂንቱ ቋሚኒ ሃሳዮዌ ኡባይ፣ ጋላሲ ፖዑዋን ሲሴታናዋ፤ ሂንቴንቱ አሳይ ባይናሳን ሂኒ ጌሶ ጎሊያን ሃይላን ሳሱኮዌ ኡባይ ቶቁ ጌዳ ሲሴቲያ ቆንጨኛሳን አዋጃታናዋ።

ኢቲ ያሳ ፃላላው ያያና ቤሴ

(ማት 10:28-31)

4 «ታናዳን አማኒያዋንቶ፣ ታኒ ሂንቴው ያጋይ፤ ሃዒ አሹዋ ዋዲያዋንታ፣ ሄዋፔ ካላ ቃይ አያኔ ኦላናው ዳንዳዬናዋንታ ያዮፒቱ።

† 11:51 አቤላፔ ደሚዳ ... ዛካራሳ፡ አዪሁዳቱዋ ማፃፋቱዋ ጋርሳን ደሚላ ማፃፋይ ኮይሮ ማፃፋ። አክ፡ አቤሊ አሳ ኡባፔ ኮይሩዋን ኢሻይ አ ዋዲያዋ ኦዳ። አዪሁዳቱዋ ጌሻ ማፃፋቱዋን ወርሴላ ማፃፋይ ላዔሊያ ኦዳዋ ማፃፋ። ሄ ማፃፋን ዛካራሲ ወርሴላን ሃይቁዳዋ ኦዲያ ዲራሳ ሉቃሲ አቤላፔ ዛካራሳ ጋካናው ጌዳዌ። 12:1 ማት 16:6፤ ማር 8:15

5 ዩዌዋን ቃሲ ሂንቴንቱ ኦሲ ያያናው ቤሲንቶ ታኒ ሂንቴንታ ኤሪሳና፤ ሄዌካ ዋጶዋፔ ጉዲያን ጋናሚያን ኦላናው ማታይ ዴዲያ ያሳ ያላላው ያዩቲ፤ ኤ፡ ኣው ያዩቲ ያጋይ።

6 «ኢቼሹ ሱኒያ ካፋቱ ሳንቲሚያን ሻሜቲኪኖዬ? ሄዋንቱፔ ኢቲናኔ ኡሳ ያሳይ ዶጌና።

7 ሺን ሃራይ ኣቶ ሂንቴንቱ ሁጺያን ዴዲያ ቢናናይ ኡባይካ ፓይዴቲዳዋ፤ ሃዋ ዲራው ያዮፒቲ፤ ሂንቴንቱ ጮራ ሱኒያ ካፋቱዋፔ ዳሪታ።

ዩሱሳን ኣማኒያዋንታኔ ኣ ኢዲያዋንታ

(ማጥ 10:32፣ 33፣ 12:32፣ 10:19፣ 20)

8 «ታኒ ሂንቴው ኦዳይ፤ ታባ ኣሳ ሲንሳን ማርካቲያዋ ኦሲኔ ታኒካ ኣሳ ናዳይ፡ ቃሲ ያሳ ኪታንቻቱዋ ሲንሳን ማርካታና፤

9 ሺን ኣሳ ሲንሳን ታና ካዲያዋንታ ታኒካ ኣሳ ናዳይ፡ ቃሲ ያሳ ኪታንቻቱዋ ሲንሳን ካዳና።

10 «ታ ቦላ፡ ኣሳ ናዳ ቦላ፡ ቦሪያ ቃላ ሃሳዪያዌ ዴያፔ ኣ ናቁ ኣቶ ጌቲታና፤ ሺን ጌሻ ኣያና ቦላ ቦሪያ ቃላ ሃሳዪያዌ ዴያፔ ቃይ ኣ ናቁ ኣቶ ጌቲቲና።

11 «ኣሳይ ሂንቴንታ ኣዪሁዴ ዋሲያ ጎሊያኮ፡ ጋዲያ ኣዪሲያዋንቲኮኔ ማታይ ዴዲያዋንቲ ሲንሳ ፒርዳሲ ሺሺያ ዋዴ፡ «ዋጊ ዛራኔሻ? ዋይ ኣያ ጊዴ ሃሳያኔሻ?» ያጊዴ ሂርጎፒቲ፤

12 ኣያው ጎፔ፡ ሂንቴና ኣያና ጌሻይ ሂንቴንቱ ሄ ሳቲያን ሃሳያናው ቤሲያባ ታማሪሳናዋ» ያጌዳ።

ዱሬ ቢታኒያ ቦዛቲላ ኦዲያ ለሚሱዋ

13 ኣሳ ጋርሳፔ ኢቲ ቢታኒ ዩሱሳ፡ «ታማሪሲያዎ፡ ኦ ኣቡ ሃይቁና ኦኒ ላታና ማላ ኣቲዳባ፡ ታው ጊሻና ማላ ሃያጎዶ ታ ኢሻው ኦዳ» ያጌዳ።

14 ዩሱሲ ቃይ፡ «ሃ ቢታኔው፡ ሂንቴንቱ ቦላን ፒርዲያዋ ጊዳናዳኔ ሄዋ ሂንቴው ጊሻናዳን ታና ኦኔ ሱንሌዳዌ?» ያጌዳ።

15 ጉጂዴካ ኡባቱዋ፡ «ኣሳ ሺምፑዋሲ ሻሉዋ ዱሬቲላይ ዴዑዋ ኣሜና ዲራው፡ ያሬቲያዋፔኔ ዮራቲያዋፔ ናጌቲቲ፤ ዱሬቲላ ኣሙዋ ኡባፔካ ሂንቴና ናጊቲ» ያጌዳ።

16 ካሊዴካ ሃዋዳን ያጊ ለሚሱዋ ኡንቲንቶ ኦዴዳ፡ «ኣው ዴዲያ ቢታይ ዳሪሲዴ ካላ ሞኬዳ ኢቲ ዱሬ ቢታኒ ዴዴ።

12:10 ማጥ 12:32፣ ማር 3:29 12:12 ማጥ 10:19-20፣ ማር 13:11፣ ሉቅ 21:14-15

17 ሃ ቢታኒ፥ ታው ታ ካላ ዋላናው ጊዲያ ሳዓይ ባንታዎ ዲራው ኣያ ኡደሻ?) ያጊዳ፥ ባሬ ዋዛናን ቆፔዳ፤

18 ሃዋዳን ያጊ ማሌዳ፤ ታኒ ዋታኔ ጎፔ፥ ታው ዳዒያ ዩሲያ ኮላዳ፥ ሃራ ኣኪያ ዩሲያ ሜቆና ያጊዳ ማሌዳ፤ ሄዋን ታ ካላኔ ታው ዳዒያ ሚሻ ኡባ ዋላና።

19 ያታዳ ታና፥ «ኔ ካጫይ ዳሮ ሎዓ፤ ኔው ዳሮ ዋዲያሲ ጊዲያ ማፀዎ ሺሻዳ፤ ሲሚ ሽምፓዳ ማ፥ ኡሻ፥ ናሼታ» ጋና ያጊዳ።

20 «ሺን ያሳይ ኣ፥ ነሃ ቦዛው፥ ሃቹ ቃማ ኔኒ ሃይቃ። ያቲና ሃ ኔኒ ሺሹዳ ማፀ ኡባይ ኦሲ ጊዳናዎ?» ያጊዳ።

21 «ባሬው ቢታ ቦላን ሻሉዎ ሺሺያዎ፥ ያሳ ሲንላን ቃይ ማንቆ ጊዳዳ ኣሳይ ሃቢታኒያ ማላ» ያጊዳ።

ኡባ ዎዳ ያሳን ኣማኔቱሳ ኮሺ
(ማት 6:25-34)

22 ሃዋፔ ካላ ዩሱሲ ባሬና ካሊያዋንታ፥ «ሃዋ ዲራው፥ ታ ሂንቲው ኦደይ፥ ሂንቲንቲ ፓፃ ዳዓናው ኣያ ማኔ? ሂንቲንቲ ቦላሲ ኣያ ማያኔ? ያጊዳ ሂርጎፒቲ።

23 «ጋሱካ፥ ሽምፑ ቁማፔ፥ ቃሲ ኣሳቲላይ ማዩዋፔ ኣዴኔ?

24 ኣኔ ቁራቱዋ ፃሊቲ፤ ኡንቲንቲ ዜሪኪኖ፤ ጫኪኪኖ፤ ኡንቲንቶ ካላ ሺሺያ ሳዓይ ዎይ ዩሲ ባዋ፤ ሃኖፔ ኣቲን፥ ኡንቲንታ ያሳይ ሚዜ፤ ሂንቲንቲ ካፋቲዋፔ ዳሮፔ ዳሪኪቲ?

25 ሂንቲንቲፔ ዳሪ ቆፒዳ ዳሮ ዋዲያ ዳዓናው ዳንዳዪያዎ ኦኔ?

26 «ሲሚ ሂንቲንቲ ሃ ላፋባ ኦላናው ዳንዳዬናዋንታ ጊዶፔ ኣያው ሃራባው ሂርጌቲቲ?

27 ጨሻቲ ዎቲ ዲጨኖንቶ ኣኔ ፃሊቲ፤ ኡንቲንቲ ኪታን ዳቡሪኪኖ፤ ፑቲዋ ሱቁኪኖ፤ ጊደሺን ታኒ ሂንቲው ኦዲያዎ፥ ሶሎሞኔ ሄዋ ኬና ቦንቹቲዳዎ * ጊዲዳ፥ ሄ ጨሻቲዋፔ ኢቲዋ ማላኔ ማዩቤና።

28 ሂንቲንቶ ላፋ ኣማኑ ዳዒያዋንቶ፥ ያቶፔ ያሳይ ሃቹ ቤቲዳ፥ ዎንቲ ታማን ኤፃናው ኦሊቲያ፥ ዳንባን ደሊያ ማታ ሃዋዳን ማዩዚያዎ ጊዶፔ፥ ሂንቲንታ ዎቲዳ ኡንቲንቲፔ ኣሊዳ ማዩዜኔ?

29 «ሃዋ ዲራው፥ ነሃ ማኔ? ኣያ ኡሻኔ?» ያጊዳ ኡባ ዎዳ ኮዮፒቲኔ ሂርጎፒቲ።

* 12:27 ሶሎሞኔ ሄዋ ኬና ቦንቹቲዳዎ፥ ኣዪሁዳ ኣሳይ ሶሎሞኔ ባሬ ዳዒዳ ላይላ ኡባን ዳሮ ዲሬቲላን ዳዒዳ ጊዳ ቆፒና። 12:27 1ካት 10:4-7፤ 2ኦድ 9:3-6

30 እያው ጎጥ፣ ሃዋ ዳማናው ሃ አላሚያን ዳዒያ ጾሳን አማኔቴና አሳይ ሂርጌቴኖ። ሂንቴንቶ ሃዌ ኡባይ ኮሺያዋ ሳሉዋን ዳዒያ ሂንቴንቱ አዉ ኤሬ።

31 ሃዋ ሃኒያዋ አጊዴ፣ ጾሳ ካዉቴላ ኮዩቴ፤ ኢ ሂንቴንታ ኮሺያዋ ኡባ አማናዋ።

ሳዒን ባሬ ዲሬቴላን አማኔቶዌ ሳሉዋን ዋኒ?
(ማጥ 6:19-21)

32 «ሂንቴንቱ ጉላ ጊዲንቶኔ፣ ሳሉዋ ሂንቴንቱ አዉ ባሬ ካዉቴላ ሂንቴንቶ አማናው ናሼቴዳ ዲራው ያዮፒቴ።

33 «ሂንቴው ዳዒያዋ ዛለዒዴ ማንቆ አሚቴ፤ ካዩሱ ሺቄናሳን፣ ቢልዒይካ ማናሳን፣ ሳሉዋን ዉሬና ሚሻ ዳጋዩዴ፣ ኤጩና ቃርጨታቱዋ ሂንቴንቱ ሁጴው ዋሊቴ።

34 እያው ጎጥ፣ ሂንቴንቱ ዋዛናይ ሂንቴ ሚሻይ ዳዒያሳን ዳዒናዋ።

ሚኖ ኦሳንቻ

35 «ሂንቴ ፃሳይ ዳንጩቶዋ፣ ሂንቴ ጾሞፒካ ፖዔዳዋ ጊዴ።

36 ሂንቴንቱካ፣ ባሬንቱ ጎዳይ ዩዴ ፔንጊያ ቆፂያ ዋዴ፣ ኤሌካ ደያናው ቡላቻፔ ሲማና ጋካናው ናጊያ ኦሳንቻቱዋ ማላቴቴ።

37 ባሬንቱ ጎዳይ ሶይ ዬዳ ዋዴ ቤጎቴ ዳዒሺን ዳሚያ ሄ ኦሳንቻቱ አንጃቴዳዋንታ። ታኒ ቱሙዋ ጋይ፤ ኢ ኡንቱንታ፣ (ኡቴቴ) ጊዴ፣ ባሬ ዳንጩዋ ሚኒሲዴ ኡንቱንቶ ቁማ አሊዴ ሸሳናዋ።

38 ጎዳይ ሄካ ቢላሂያን ዋይ ሄካ ቢላሂያፔ ካላ ዬዳ ዋዴ፣ ቤጎቴዴ ጌንጨ ናጊዴ ቤቴያ ቆማቱ አንጃቴዳዋንታ።

39 ሃዋ ቃይ ኤሬቴ፤ ካዩሱ አይ ሳቴያን ዩንቶ ጎሊያዉ ኤሪንቶ፣ ጎሊ ቦኩቴያ ዋዴ ጮፀ ጊዴ ጃሌናሺን።

40 አሳ ናዒይ ቆፔና ሳቴያን ያናዋ፤ ሂንቴንቱ ጊጌቴ ናጊቴ» ያጌዳ።

41 ጳጳርሲካ «ጎዳው፣ ሃ ለሚሱዋ ኔኒ ኦዲያዌ ኮፃላላሴ ሃራ ኡባሲካ አቴፔ ኦዳይ?» ያጌዳ።

42 ጎዳይካ፣ «ሲሚ ኡንቱንቱ ባሬ ሶይ አሳው ቁማ አማናው ቤሲያ ሳቴያን አማና ማላ፣ አ ጎዳይ ሱንሊያ አማኔቴዳኔ ኤራንቻ ሚዚያ ቆማይ ኦኔ?» ያጌዳ።

43 ጎዳይ ሲሚያ ዋዳ ሃዋዳን ኪቴቲና ዳሚያ ቆማይ ኢ ኢንጃቴዳዋ።

44 ታኒ ሂንቴው ቱሙዋ ኦዳይ፤ ዳዒያ ማፀዋ ኡባ ቦላን ኣ ሱንሳናዋ።

45 ዩዉዋን ቃሲ ሄ ቆማይ፡ «ታ ጎዳይ ኤሌ ዩና፤ ጋሚዳናዋ» ያገ ባሬ ዋዛናን ቆፖፔኔ ኣቱማኔ ማጫ ቆማቱዋ ሾቻ ደሞፔ፡ ቃይካ ኮዮዋዳን ሙሳኔ ኡሻ፡ ማሶቱሳካ ደሞፔ፡

46 ሄ ቆማ ጎዳይ፡ ኢ ቆፔና ጋላሲኔ ሲጲቤና ሳቲያን ያናዋ፤ ሄ ዋዲያን ኣ ቃንፆሬሊዳ፡ ኣ ጊሹዋ ማዳራካ ኣማኔናዋንቱና ኢቲሳ ኡዳናዋ።

47 ባሬ ጎዳ ሸኒያ ኤሪዳ ጊጌናዌኔ ኣሸኒያዳን ኪቴቲና ቆማይ፡ ኢ ኢታ ጶባ ጶቤታናዋ።

48 ኤሪቤናዊ ቃይ ጶቤታናው ቤሲያዋ ኡዳዳዌ፡ ጉላ ጶቤቲ። ዳርባይ ኢሜቲዳ ኣሳ ኡባፔ፡ ኣፔ ዳርባይ ኮዬቴ፤ ዋልቃማ ሃዳራይ ኢሜቶዋፔ፡ ኣፔ ዳሪሲዳ ኮዬቴ።

49 ዩሱሲ፡ «ታኒ ዩዳዌ፡ ሃ ሳባ ቦላ ታማ ሳላናሳ፤ ሃዒካ ኤዪዳንቶ፡ ታና ኣይ ኬና ናሽቻናዊሻ።

50 ታኒ ፃማቄታና ሜቱዋ ዪንቃታይ ፖሌታና ጋካናው ዋናዳ ኡንዔታይታ!

51 ሃ ሳባ ታኒ ዩዳዌ፡ ሳሮቱላ ኣሃናሳ ማላቲዬ? ሂንቴው ማላቶፖ። ታኒ ዮዌ፡ ሳሮታሲ ጊዳናን ሻካናሳፔ ኣቲን።

52 ኣያው ጎፔ፡ ሃዒፔ ደሚና ኢቲ ጎሊያን ዳዒያ ኢቼሹ ኣሳቱ ሻኬታናዋንታ፤ ሄዛቱ ላባቱዋ ቦላ፡ ላባቱካ ሄዛቱዋ ቦላ ዳንዲዳ ዋላቄታናዋንታ።

53 ኣጫ ናባ ቦላ፡ ናባይካ ኣዉዋ ቦላ፡ ኣታ ናቲ ቦላ፡ ናታካ ኣቲ ቦላ፡ ቦሎታታ ናባ ማቺ ቦላ፡ ናባ ማቻካ ቦሎታቲ ቦላ፡ ዋላሳን ዳንዲዳ ሻኬታናዋንታ» ያጌዳ።

ዋዲያ ሃናታ ኤራዋ
(ማጎ 16:2-3)

54 ቃይካ ዩሱሲ ኣሳሲ፡ «ኣዋይ ዉሊያ ባጋና ሂንቴ ሻሪያ ቤዖፔ፡ ሃዒ ሃ ሳቲያን ሄኮ ዋልቃማ ኢራይ ቡካና ሃኔ» ያገታ፤ ቱሙካ ቃይ ቡኩ።

55 ዲጌ ባጋና ጫርኩ ጫርኩዳ፡ ሃቼ ሻማናዋ) ያገታ፤ ጌቱቶዋዳንካ ቃይ ሃኔ።

56 ሂንቴኖ ሎዓ ማላቲያ ኢታቶ፣ ሳዓኔ ሳሉዋ ያሊዳ፣ ሃናናዋ ኤሪታ፤ ሺን ሃ ዋዲያባ ዋቲ ኤራናው ዳንዳይኪቴ?

ሲጋቴላባኔ ሞቱዋባ

(ማጥ 5:25-26)

57 «ዋዴ ሂንቴንቱ ያሎ ጊዳዳ ዩወዋ ሂንቴንቶ ኣያው ፐርዲኪቴ?

58 ኔ ሞርኪያና ኢቲፔ ፐርዲያ ዳና ሲንላን ሺቃናው ቦዴ፣ ቢር ኦጊያ ቦላ ዳዒሺን ሲጌታ ዲጋ። ሄዌ ቆጥፔ ኔና ጎቹዴ ፐርዲያ ዳናኮ አፋና፤ ዳናይካ ፖሊሴው ኣሊ ኢማናዋ፤ ፖሊሲ ቃሾ ጎሌን ዩጋናዋ።

59 ታኒ ኔው ኦዲያዌ፣ ወርሴላ ኣጩዋ ጨጋና ጋካናው ሄዋፔ ኬሳካ» ያጌዳ።

13

ናጋራፔ ሲሜና ኡባይ ቆያና

1 ሄ ዋዲያን ኢቲ ኢቲ አሳቱ ዩሱሳኮ ዩዴ ጲላያሲ ጋሊላ አሳ ዋዲዳ ኡንቴንቱ ሱላ ያርሹዋና ኢቲፔ ዋላኬዳዋ ኣው ኦዴዲኖ።

2 ዩሱሲካ ዛሪዴ፣ «ሃዋንቱ ጋሊላ አሳቱ ሃይቄዳ ዲራው፣ ያቲና ኡንቴንቶ ሃራ ጋሊላ አሳ ኡባፔካ ኣዲዴ ናጋራንቻቱዋ ጊደዋንታ ማላቲኖ?

3 ታኒ ያጋይ፣ ሃዋዳን ጊዳና፤ ዩወዋን ቃሲ ሂንቴ ናጋራ ፓዲዴ ናጋራፔ ሲሜናን ኢዳፔ፣ ሂንቴንቱ ኡባቱካ ሄዋዳን ሃይቄታ።

4 ዋይ ሳሊሆማ ጊምቢ ኡንቴንቱ ቦላ ኩንዲዴ፣ ዋዲዳ ታማኔ ሆሰቸን አሳቱዋ ዩሩሳሌሜን ዳዒያዋንቱ ኡባፔ ኣዲዴ ናቆዋንታ ማላቲኖ?

5 ሃዋዳን ጊዳና ያጋይ፤ ዩወዋን ቃሲ ናጋራ ፓዳና ቆጥፔ ኡባቱካ ሃዋዳን ባያኒታ» ያጌዳ።

6 ዩሱሲካ ሃዋዳን ያጊ ለሚሱዋ ኦዴዳ፣ «ኢቲ ቢታኔው ዋዲያ ቱራ ጎሻ ጋዴን ቶኬቱዳ ባላሲያ ጌቲቲያ ኣይፊ ሜቲቲያ ሚላታ ዳዓው፤ ሄ ቢታኒካ ሚላታ ኣይፋዴንቶኔ ጊዴ ዩዳዌ፣ ኣይኔካ ኣይፊያ ዳሚቤና።

7 ዋዲያ ቱራ ናጊያዋ ኢ፣ «ታኒ ሃ ባላሲያ ጌቲቲያ ሚላቲፔ ኣይፊያ ዳሚናው ሄዙ ላይላ ሲሜሬታዴ ኣያኔ ዳሚቤይኬ። ሃዋ ዲራው ዳካ ዳንላ ዲጋ፤ ኣያው ቢታ ጮ ማሊሳይ?» ያጌዳ።

8 ናጊያዌካ ዛሪዴ፣ ሳዳው፣ ታኒ ኢ ዩሹዋ ሃሩማናሲኔ ፒቱዋ ኦላናሲ፣ ሃ ላይላ ያላላው ባሻ።

9 ሲንገላው አይፎፔ ሎዓ፤ ሺን አይፊናን ኢዖፔ ዳኬቱ ጌዳ» ያጌዳ።

ዩሱሲ ቁና ሚሺራቶ ሳምባታ ጋላሳ ፓሌዳ

10 ዩሱሲካ ኢቲ ሳምባታ ጋላሲ አዪሁዳ ዋሳ ጎላቱዋፔ ኢቱዋን ታማሪሲ ደዔ።

11 ሄዋኒካ ታማኔ ሆሰፑን ላይላ ኩሜንላ ቱና አያናይ ቁኒሴዳ ሚሺራታ ደዓው። ኢዛካ ሱራዴ ኤቃናው አይኔ ዳንዲያቤይኩ።

12 ዩሱሲካ ኢዞ ቤዔዳ ዋዴ ያሲዳ፡ «ሃ ሚሺራቱ፣ ኔ ሃርጊያፔ ፓፃዳ» ያጌዳ።

13 ዩሱሲ ባሪ ኩሺያ ኢዚ ቦላ ዋሊና፡ ሄዋዴ ሱራ ሲቲ ጋ ኤቃዴ ባሪ ያሳ ጋላታዳ።

14 ሺን አዪሁዳ ዋሳ ጎሌ ካፑ ቃሲ ዩሱሲ ሳምባታን ፓሌዳዋ ዲራው ሃንቄቲ ዛርዋሺን አሳቱዋ፡ «ኪቱታናው ቤሲያ ኡሱፑን ጋላሳቱ ደዒኖ፤ ሄ ጋላሳቱን ዪዴ ፓፂቴፔ ኣቲን ሳምባታን ጊዴና» ያጌዳ።

15 ጎዳይካ ዛሪዴ፡ «ሃ ሎዓ ማላቲያ ኢታ አሳቶ፡ ሂንቴንቴፔ ኢቱኔካ ሳምባታ ጋላሲ ቦራ ማጋዲዋፔ ዋይ ሃሪያ ጎፃታፔ ቢሊዴ ሃላ ኡሻናው አፊኔ?»

16 ሃና አብራሃዋ ያራ ጊዴዳወና፡ ታማኔ ሆሰፑን ላይላ ኩሜንላ ፃላሂ ቃቹዳወና ሳምባታ ጋላሲ ሄ ቃሹዋፔ ቢሌታናው ቤሴኬ?» ያጌዳ።

17 ሃዋ ኦዴዳ ዋዴ ኤቄቲያዋንቱ ኡባይ ዩላቴዲኖ፤ አሳይ ኡባይ ቃይ ኢ ኦሌዳ ማላሊሲያ ኦሱዋን ኡባን ናሹቴዲኖ።

ሳናፊጪያ አይፊያ ዜሬላ ለሚሱዋ

(ማር 4:30-32)

18 ዩሱሲካ፡ «ያሳ ካወቱላይ አያ ማላቲ? ኢ አያ ማላቲንቶ፡ ታኒ ሂንቴንታ ዋታ ቤሶ?»

19 ያሳ ካወቱላይ ሳናፊጪያ ጌቲቲያ ቄሪ ሚላቲ አይፊያ ማላቲ። ሄ ሚላቲ አይፊያ አሳይ አኪዴ ጎሻ ጋርሳን ዜሬዳ፤ ዜሬቶና ዲጫዴ ዋጋ ሚላ ጊዳዲ፤ ያቲና ሳሉዋ ካፋቲካ ኢዚ አጫ ቦላ ባሬንቶ ጎሊያ ኬፀዲኖ» ያጌዳ።

ኢርሹዋ ለሚሱዋ

(ማጥ 13:33)

20 ዩሱሲካ ዛሪዴ፡ «ያሳ ካወቱላይ አያ ማላቲንቶ፡ ታኒ ሂንቴንታ ዋታ ቤሶ?»

21 ኢት ሚሺራታ ሄዙ ከሪያ ጳሊያ አካዳ፣ ሙናቄዳ ሙናቃይ ኡባይ ዴንዳና ጋካናው፣ አኒ ቲጌዳ ኢርሹዋ ማላቲ» ያጌዳ።

ኡንባ ፔንጊያባ
(ማት 7:13፣ 14፣ 21፣ 22)

22 ሄዋፔ ካላ ዩሱሲ ዩሩሳሌም ቢዳ፣ ዋጋ ካታማኒኔ ቄሪ ካታማን ዴቢያ አሳ ታማሪሲዳ አጼዳ።

23 ሄ ዋዴ ኢት ቢታኒ ሸቂዳ አ፣ «ኅዳው፣ ያሳ ፒርዳፔ አቲያዋንቱ ጉላ አሳ ፃላሌ?» ያጌዳ።

ሄዋፔ ጉዬ ዩሱሲ አንቱንታ።

24 «ታኒ ሂንቴንቶ ኦዳይ፤ ኡንባ ፔንጊያና ጌላናው ባፀቲቱ። ጮራ አሳይ ጌላናው ኮዩኖ፤ ሺን ዳንዳይቤይኪኖ።

25 ጎሊያዉ ዴንዲዳ፣ ኢፒላ ቃቾዋፔ ጉዬ ሂንቴንቱ ካሪን ኤቂዳ፣ ሳዳው፣ ጎዳው፣ ኑሲ ደያሪኪ) ያጊዴ ፃሳ ደሚያ ዋዴ፣ ኢካ ዛሪዳ፣ ሳቃፔ ዩዲቴንቶ፣ ታኒ ሂንቴንታ ኤሪኬ) ያጋናዋ።

26 «ሄ ዋዴ ሂንቴንቱ፣ ሳኒ ኔናና ኢቲፔ ሜዶ፤ ኡሼዶ፤ ኔኒ ኑ ሄሪንካ ታማሪሳዳ) ያጋናዋንታ።

27 «ዩሱሲ ቃሲ፣ ሳኒ ሂንቴንቶ ኦዳይ፤ ሂንቴንቱ ሃቃፔ ዩዲቴንቶ፣ ታኒ ሂንቴንታ ኤሪኬ፤ ኡባቱካ ማካላንቻቱ ታማታፔ ሃኪቱ» ያጋናዋ።

28 «አብራሃም፣ ዩሳቂ፣ ያዩቆቤኔ ናባቱ ኡባይ ሂንቴንቱ ካሪን ኤቂሺን፣ ያሳ ካዉቲላን ዴቢያዋንታ ሂንቴንቱ ቤቢያ ዋዴ፣ ሂንቴንቶ ዩኮኔ አቻ ጳቁዋ ጊዳናዋ።

29 «አሳይ አዋይ ዶሊያሳፔኔ ዉሊያሳፔ፣ ቃሲ ኪሊባጋፔኔ ሂርኪባጋፔ ዩዳ፣ ያሳ ካዉቲላ ጋዩታን ኡቲኖ።

30 ቤቢቴ፤ ጉዩቴዳዋንቱ፣ ሲንሳታናዋንታ፤ ሲንሳቲዳዋንቱ ቃይ ጉዩታናዋንታ» ያጌዳ።

ዩሱሲ ዩሩሳሌምን ኦጼዳባ
(ማት 23:37-39)

31 ሄ ዋዴ ፓሪሳዋቱዋፔ ኢቱ ኢቱ ዩሱሳኮ ዩዳ፣ «ሂርዲሴ ኔና ዋቆናው ኮዩያ ዲራው፣ ሃዋፔ ባዲጋ» ያጌዲኖ።

32 ዩሱሲ ዛሪዳ፣ «ቢዳ ሄ ዋራካናሲ፣ ሳቼኔ ዋንቲ ኢታ ኢያናቱዋ ከሳና፤ ሃርጋንቻቱዋካ ፓላና፤ ሄዜንላ ጋላሲ ታ ኦሱዋ ዉርሳና) ያጊቱ።

13:27 ማዝ 6:8 13:28 ማት 22:13፤ 25:30፤ 13:28፣ 29፤ ማት 8:11፣ 12 13:30 ማት 19:30፤ 20:16፤ ማር 10:31

33 ሃናፕ ኣቲን ናቢ ዩሩሳላሜፕ ሃራሳን ሃይቃናው ቤሴና ዲራው፡ ታኒ ሃቼ፡ ዋንቲኔ ዋንቲፕሺ ኦጊያ ቦላ ዳዓናው ቤሴ።

34 «ዩሩሳላሜ ካታማ ኣሳው፡ ዩሩሳላሜ ካታማ ኣሳው፡ ናባቱዋ ዋጲያዋንቶ፡ ሂንቴንቱኮ ኪቴቶዋንታ ሹቻን ጫዲያዋንቶ፡ ኩታታ ባሬ ማራቱዋ ባሬ ቁፊያፕ ጋርሳና ሺሻ ሃጲያዋዳን፡ ታኒ ሂንቴንቱ ናና ኢቲ ጋዲያ ሺሻናው ኣፑ ጌዴ ኮያዲታ! ሺን ታና ዲጌዲታ።

35 ቤዒቲ፤ ያሳይ ሂንቴንቱ ጎሊያ ኣይኔ ኦሊቤና፤ ታኒ ሂንቴንቶ ያጋይ፤ ሂንቴንቱ፡ ሳዳ ሱንሳን ዪያዌ ኣንጃቴዳዋ) ጋና ጋካናው፡ ታና ቤዒኪታ» ያጌዳ።

14

ዩሱሲ ሃርጋንቻ ሳምባታን ፓሌዳ

1 ሳምባታ ጋላሲ ፓሪሳዋቱዋ ሱንሳቱዋፕ ኢቱዋ ጎሌ ዩሱሲ ቁማ ማናው ጌሌዳ ዋዴ፡ ኣያ ኪቴቲንቶ ቤዓናው ኣሳቱ ናጊዴዒኖ።

2 ቦላይ ጋፊና ሜቶቲያ ኢቲ ቢታኒ ዩሱሳፕ ሲንሳና ዴዔ።

3 ዩሱሲ ሂጊያ ታማሪሲያዋንታኔ ፓሪሳዋቱዋ፡ «ሳምባታን ፓላናው ዳንዳይቲ ዳንዳይቲ?» ጊዴ ኦቼዳ።

4 ኡንቴንቱካ ጮዑ ጌዲኖ። ኢ ሄ ቢታኒያ ቦላ ቦቹ ፓሌዳ ኣ ሞዪዜዳ።

5 ዩሱሲ ኡንቴንታ፡ «ሂንቴንቱፕ ሃሪ ዋይ ቦራይ ኦላን ኩንዲንቶ፡ ሳምባታ ጊዴ ኤሌሊ ኬሴናዌ ኦኔ?» ጌዳ።

6 ኡንቴንቱካ ሃ ዩዉዋሲ ኢቲ ዛሩዋኔ ኢማናው ዳንዳይቤይኪኖ።

ኣሺኬቴላባ

7 ዩሱሲ ሾቤቶዋንቱ ቦንቸሳ ዶሪያ ዋዴ ጻሊዴ፡

8 «ኦኒኒ ቡላቻ ጻሶፕ፡ ቦንቸቲዳሳን ኡቶፓ፤ ኦኒ ኤሪ ኔፕ ኣሊዴ ቦንቸቶዌ ጻሴቴዳዋ ጊዳናዋ።

9 ኔና ኣኔ ጻሳዌ ዪዴ፡ ሃዋ፡ ኡቱዋ ኣው ዩዳ) ያጊና፤ ሄዋዲያን ዩላታዴ ያዴና ዳዒያሳን ኡቱዋ ደማሳ፤

10 ዩዉዋን ቃሲ ኔኒ ጻሴቶ ዋዴ ኔና ጻሶዌ ዪዴ፡ ታ ላጌው፡ ኪሊ ጲቃሳን ኡታ) ጋና ማላ፡ ባዴ ኡባፕ ሆካሳን ኡታ፤ ሄ ዋዴ ኔና ኢቲፕ ኡቱዳዋንቱ ኡባቱዋ ሲንሳን ኔው ቦንቸ ኢማታናዋ፤

14:5 ማት 12:11 14:8 ሉም 25:6፣ 7

11 ባሬ ሁጲያ ጾቁ ኡዲያ ኡባይ ቶሼታናዎ፤ ባሬ ሁጲያ ቶቹያዎንቱ ጾቁ ገና» ያገ ለሚሱዎ ኡንቱንቶ ኦዴዳ።

12 ዬሱሲ ባሬና ያሴዳዎ ዛሬዳ፡ «ኔኒ ላፃ ዎይ ካወዎ ገጊሴዳ ዎዳ፡ ኔ ላጌላቱዎ ዎይ ኔ ኢሻቱዎ ዎይ ዱሬ ኔ ሾራቱዎ ያሶፓ፤ ኢያው ጎፔ፡ ኡንቱንቱ ኔና ባሬንቱ ታራን ያሲዳ ኩሺያ ጨጋና ዳንዳዪኖ።

13 ሺን ኢታሊያባ ገጊሴዳ ዎዳ፡ ሂዬሳቱዎ፡ ጉንዳቱዎ፡ ደማቱዎኔ ቆቃቱዎ ያሳ።

14 ኡንቱንቱ ኔው ኩሺያ ዛራናው ዳንዳዬናዎንታ ገዲያ ዲራው፡ ኔኒ ኢንጃታናሳ። ያላቱ ሃይቁዎፔ ዳንዲያ ዎዳ ያሳይ ኔው ኩሺያ ዛራናዎ» ያጌዳ።

ዎልቃማ ባላ ለሚሱዎ
(ማት 22:1-10)

15 ዬሱሲ ሃሳያ ወርሲያ ዎዳ፡ ቁማ ማናው ኡቶ አሳፔ ኢቱ ሃዎ ሲሲዳ፡ «ያሳ ካወቱላ ጋዪታን ኡቲያዌ ኢንጃቱዳዎ» ጌዳ።

16 ዬሱሲካ ሃዎዳን ጌዳ፤ «ኢቲ ቢታኒ ዳሮ ሎዎ ካወዎ ገጊሲዳ፡ ጮራ አሳቱዎ ያሴዳ።

17 ካወዎ ዎዲ ጋከና፡ ካሴ ያሴቶዎንታ፡ ሳሂ ካወ ገጌዳ፡ ሃዪቱ፡ ጌዳ ያሳና ማላ ባሬ ጎሌን ከቲቲያ ቆማ ኡንቱንቱከ ከቲዳ።

18 ሺን ኡባቱካ ኢቲፔ፡ ቤናዳን አጋና ማላ ዎሴዲኖ፤ ኮይሮ ቢታኒ ቆማው ኦዲዳ፡ ታኒ ቢታ ሻሜዳ ዲራው ባዳ ቤዓናው ኮሼ፤ ሃዎ ዲራው ሃያ ጎዶ ታው ሃንቁቶፓሪኪ» ጌዳ።

19 «ላዔሊያዌ ቃሲ፡ ታኒ ኢቼሹ ዋላ ቦራቱዎ ሻሜዳዎንታ ዋፃ ቤዓናው ቢያ ዲራው፡ ሃያ ጎዶ ታው ሃንቁቶፓሪኪ» ጌዳ።

20 «ሃራይ ቃሲ፡ ታኒ ማቻቶ ኢኬዳ ዲራው፡ ያናው ዳንዳያቤይኬ» ጌዳ።

21 «ቆማይካ ዪዳ ባሬ ጎዳው፡ ሃናዎ ኡባ ኦዴዳ። ህ ዎዳ ጎዳይ ዳሮ ሃንቁቲዳ፡ ባሬ ጎሊያን ከቲቲያ ቆማ፡ ሳኒ ካታማ ኦጊያኔ ሎሶ ኦጊያ ኤሌላዳ ኬሳ፤ ማንቃቱዎኔ ጉንዳቱዎ፡ ደማቱዎኔ ቆቃቱዎ ሃ አካዳ ያ» ጌዳ።

22 «አ ቆማይካ፡ ሳጎዳው፡ ኔኒ ታና አዛዘዎዳን ኦላዲ፤ ሺን ሃሂካ ሃራ አሳ አኪያሳይ ዳዔ» ጌዳ።

23 ጎዳይካ ባሬ ቆማ፡ ታ ጎሊ ኩማናዳን ሃኒ ኦጊያፔ ካሬ ባጋኔ ዲርሳ ጋፃ ኡባ ኬሳዳ፡ አሳ ታ ጎሊ አካዳ ያ።

24 አያው ጎጥ፣ ኮይሮ ታ ጎሌ ሾቤቴዳዋንቱ፤ ኢቲ አሳይኔ ታ ቁማ ማና) ጌዳ» ያጌዳ።

ዩሱሳ ካላናው ባሬና ያርሹሳ ኮሾ
(ማት 10:37-38)

25 ጮራ አሳይ ዩሱሳና ኢቲ፤ ቢዳዲያ ዎዳ፣ አካ አሳኮ ጉዬ ሲሚዳ።

26 «ኦኒኔ ታኮ ዪያዌ ዳዎ፤ ባሬ አባኔ አቶ፣ ባሬ ማቻቶኔ ባሬ ናና፣ ባሬ አሻቱዋኔ ሚቻቱዋ፣ ባሬ ዴዑዋ አሸናን ታ፤ አሉ ደሶ፤ ታና ካሊያዋ ጌቱታናው ዳንዳዬና።

27 ኦኒኔ ባሬ ማሰቃሊያ ቶኪዳ፣ ታ ጌዲዋ ካሌናን ቆዮ፤ ታና ካሊያዋ ጌዳናው ዳንዳዬና።

28 «ሂንቴንቱ፤ ኢቱ ሹቻ ጎሊያ ከፃናው ኮዮ፤ ከታ ዉርሳናው ጌዲያ ሻሉዋ ካሴቲዳ ኡቲ ሄቱናዌ ኦኒ?

29 ሄዌ ቆዮ፤ ጎሊያ ደሚዳ፣ ከታ ዉርሳናው ዎልቃይ ኢዎ፤

30 ቤዔዳዋንቱ ኡባይ፣ «ሃ ቢታኒ ከፃናው ደሚዳ፤ ሺን ከታ ዉርሳናው ኢፃቴዳ) ጌዳ ቁሊጪኖ።

31 «ዎይ ታው ሻዓ አላንቻቱዋ ኦይቄዳ ኢቲ ካቲ፣ ሃራ ላታው ሻዓ አላንቻቱዋ ኦይቄዳዋንቱና ኦሌታናው ዳንዳዮ፤ ኮይሮና፣ ታኒ ያናኔ ያኒኪታሻ ጌዳ ኡቲ ቆፔኔ?

32 ባሬው ዳንዳዬቴናን ቆዮ፤ አላው ዪያ ዮኮ ካቲ ሃኩዋን ዳዲሺን ከቲዳ ሲጌታናው ዎሴ።

33 ሲሚ ሃዋዳንካ ሂንቴንቱ፤ ኦኒኔ ባሬው ዳዲያዋ ኡባ አጌናዌ፣ ታና ካሊያዋ ጌዳናው ዳንዳዬና።

ጎዔና ማዲያባ
(ማት 5:13፤ ማር 9:50)

34 «ማዲያ ሎዓ፤ ሺን ሎቂሎቄናን ቆዮ፤ ላዔሶ አ ዎቲ ሎቂሎቄሳናው ዳንዳዬቲ?

35 ቢታዉካ ሎዔና፤ ቱዔያናዉካ ማዳናዋ ጌዳ ዲራው፣ አሳይ አ ኦሊ አጌ። ሲሲያ ሃይሳይ ዳዲያዌ ሃዋ ሲሶ» ያጌዳ።

15

ባዬዳ ደርሳ
(ማት 18:12-14)

1 አቲ ጋላሲ፣ ቃራፃ ሺሺያዎንቱኔ ናጋራንቻቱ ኡባይ ዬሱሳ ሲሳናው አኮ ሸቆዲኖ።

2 ፓሪሳዎቹ ሙሴ ሂጊያ ታማሪሲያዎንቱ፣ «ሃ ቢታኒ፣ ናጋራንቻቱዎ ሺሺያዎንቱ ኡንቱንቱና ቁማ ሚያዎ» ያጊዴ ዙዙሜዲኖ።

3 ዬሱሲካ ለሚሱዎን ዛሩዎ ሃዎዲን ያጊ ኦዴዳ፡

4 «ፃቱ ዶርሳይ ዴዲያ ኡራይ ሂንቱንቱ ጊዶፔ ዴዲንቶ ሄዋፔ አቱ ባዴንቶ ኡዲፔ ታማኔ ኡዲፔኮዎ ዴንባን አጊዴ ባዬዳዎ ቤታና ጋካናው ኮዬናዌ ኦኔ?»

5 ዴሚዳ ዎዴ ናሼቻን ባሬ ሃሺያ ቦላን ዶርሳ ቶከ፡

6 ባሬ ጎሌ ሲሚዴ፣ ባሬ ዶሲያዎንታኔ ሾራቱዎ አቲፔ ዪሲዴ፣ «ባዬዳ ታ ዶርሳ ዴዎ ዲራው፣ ታናና አቲፔ ናሼቲቱ» ያጊዴ ኦዴ።

7 ሄዎዲንካ ናጋራ ፓዲሳ ኮሼና ኡዲፔ ታማኔ ኡዲፔ ዪላቱዋፔ ኦሊዴ ናጋራ ፓዲያ አቲ ናጋራንቻን ሳሉዋን ዳር ናሼቻይ ጊዳናዎ።

ባዴዴ ቤቱዳ ሳንቲሚያ

8 «ቃይካ ታሙ ናሃሲያ ሳንቲሚ * ዴዲያ ሚሺራታ ታሙዋፔ አቲ ባዴንቶ ዴማና ጋካናው ያዎፒያ ያዎፓዴ፣ ጎሊያ ፒታዴ ሎይላ ኮዬናወና ኢዛ ኦኔ?»

9 ኢዛካ ዴሚዳ ዎዲያን ባሬ ዶሲያዎንታኔ ባሬ ሾራቱዎ አቲፔ ዪሳዴ፣ «ታፔ ባዬዳ ሳንቲሚያ ዴሚዳ ዲራው፣ ታናና አቲፔ ናሼቲቱ» ያጋዴ ኦዴው።

10 ሄዎዲንካ ናጋራ ፓዲያ አቲ ናጋራንቻ ጋሶቱላን ያሳ ኪታንቻቱዎ ሲንላን ናሼቻይ ሃናናዎ» ያጊዴ።

ባያ ናዓ

11 ጉጂዴ ዬሱሲ፣ «ላዑ ናናይ ዴዲያ አቲ ቢታኒ ዴዴ፤

12 ኡንቱንቱፔፔካ ቱፋ ናዓይ፣ «ኔ ማፀዎፔ ታና ጋኪያዎ አማ» ጌዴ። አዉካ ባሬ ማፀዎፔ ናናቶ ጊሼዴ።

13 ጉላ ዎዲያፔ ጉዲያን ቱፋ ናዓይ ባሬና ጋኬዳዎ ኡባ ሺሺ አኪዴ ሂኒ ሃኮ ጋዴ ቤዳ፤ ሄዎን ባሬ አኬዳ ሚሻ ኡባ ላሊ ዉርሲ አጌዴ።

14 ኢካ ዴዲያዎ ኡባ ዉርሴዳዎፔ ጉዲያን ሄ ጋዴን ዎልቃማ ኮሻይ ጌሌዳ፤ ኢካ ሜቱዎን ኡንዔቱሳ ዶሚዳ።

15:2 ሉቅ 5:29-30 * 15:8 ናሃሲያ ሳንቲሚ፡ ግሪኬ ቃላ ቢሌላኒ አቲና፣ አቲ ጋላሳ ሙሚያ ኦሊ ፔሼዳ ዎልቃ ኦሳንቻው ጨጌቲያ ሚሻ ከና ጊዲያዎ ኦዴ።

15 ሃዋ ዲራው ሄ ጋዴን ዳዊያዎንቱ፤ ለቱዋኮ ሸቂዳ፤ ሓገና ኔው ቆማ ኦሳሪኪ?) ያገና፤ ቢታኒካ ባሬ ጉዲንላ ወዲያ ሄማና ማላ ኣ ዳምባ ዬዳዳ።

16 ጉዲንላ ወዲ መያ ሃልዑዋ ማናው ኣሞቴዳ፤ ሺን ሄዌንቶካ ኣው ለመያዌ ቤቲቤና።

17 ባሬ ባዱዙዋ ኤሮ ዎዳ፤ ሓመይ ያኒዳ ሳዓን ኣቲያ ታ ኣቦ ኣሊያዎንቱ ኣፑኔ፤ ሺን ታኒ ሃዋን ኮሻን ሃይቃና ማታይታ?

18 ዳንዲዳ ታ ኣቡኮ ባኔ) ሃዋዳን ያጋና፤ ሓ ኣቦ፤ ያሳካ ኔናካ ናቃዲ፤

19 ሃኒፔ ጉዬ ኔ ናዓ ያጌታዳ ያሴታናው ቤሲኬ፤ ኔው ከቲቲያዎንቱ ለቱዋዳን ታና ዎሳሪኪ ጋና) ጌዳ።

20 ሄ ማንዲያንካ ዳንዲዳ ባሬ ኣቡኮ ዬዳ።

«ኣ ቢሮ ሃኩዋን ዳንዲዳ፤ ኣወ ቤዲዳ፤ ኣው ቃሬቴዳ፤ ኣኮ ዎዳ ቢዳ፤ ኣ ኢዲሚ ዬሬዳ።

21 «ናዓይካ፤ ሓ ኣቦ፤ ታኒ ያሳካ ኔናካ ናቃዲ፤ ሃኒፔ ጉዬ ኔ ናዓ ጌቲታዳ ያሴታናው ቤሲኬ) ያጌዳ።

22 ሺን ኣወ ባሬ ኦሳንቻቱዋ፤ ሓሌሌ ቢዳ፤ ኡባፔ ዶሬቴዳ ሎዎ ማዩዋ ኣሂዳ፤ ኣ ማዩዚቲ፤ ኣ ቢራዲያን ሚጊዲዋ፤ ኣ ጌዲያንካ ጫማ ተ ዎላቲ።

23 ዎዳዳ ኮሩማ ኣሂዳ ሹከቲ፤ ዎይቲ፤ ናሹቶይቲ።

24 ኣያው ጎፔ፤ ሃዌ ታ ናዓይ ሃይቁዳ፤ ሺን ሃዒ ፓዌዳ፤ ባዬዳ፤ ሺን ሃዒ ቤቲዳ) ያገና፤ ናሹቻ ዶሜዲኖ።

25 «ሄ ዎዲያን፤ ባይራ ናዓይ ጋዴን ዳዊያዌ ዩዳ ጎሌኮ ማቲያ ዎዳ፤ ዬላኔ ዲሩዋ ኮሹንቻ ሲሴዳ።

26 ኣካ ዬወ ኣዬንቶ ኤራናው ኮዩዳ፤ ቆማቱዋ፤ ለቱዋ ያሲዳ፤ ሃዌ ኣዬ?) ጌዳ ኦፔዳ።

27 ቆማቲካ፤ ሳ ኣሻይ ሳሮ ዬዳ ዲራው፤ ኔ ኣቡ ዎዳ ኮሩማ ኣው ሹኬዳ) ያገ ኦዳዲኖ።

28 «ባይራ ናዓይ ሃንቁቲዳ ጎሌ ጌሊኬ ያገ ኣዳና፤ ኣወ ካሬው ከሲዳ፤ ጌሳናዳ ዎሴዳ።

29 ሺን ኣ ዛሪዳ ባሬ ኣባ፤ ሓኮ ሃዋ ከና ዎዲያ ቆማዳን ኔው ከቲታዲ፤ ኔ ኣዛዘዋ፤ ለቱዋኔካ ፓጪሳ ቤይኬ፤ ታ ላጌላቲዋና ኣቲፔ ናሹታና ማላ ሃራይ ኣቶ ኣቲ ዳሻ ቡልዑዋኔ ታው ኣማ ቤይካ፤

† 15:22 ሚጊዲዋ ... ጫማ፡ ሃ ቃላቲ ናዓ ኣቡ፤ ኣ ፖሎ ዎዛናፔ ኣኮዋ ቤሲያንታ። ሚጊዲ፡ ሄ ናዓይ ጎሌን ዳዊያ ኣሳቲዋ ኡባፔ ሎዎ ያሌቴዳዋ ቤሴ። ጫማይ ቃይ፤ ኣ ባሬ ኣቡሲ ኣይሌ ጌዳናዳን ናዓ ጌዲያዋ ቤሴ። ኣይላቲ ሄዎዳ ጫማ ዎላኪኖ።

30 ሺን ሃዋ ኔ ናዓይ ኔ ሚሻ ጫራቱዋና ኢቲፔ ዲፊሲዴ ዪና፥ ዲኮ ቦራ ሹካዳ፥ ያጌዳ።

31 «አዉካ አ፥ ታ ናዓው፥ ኔኒ ኡባ ጋላሳ ታናና ኢቲፔ ዴዓ፤ ታሳ ጊዴዳባይ ኡባይካ ኔዋ።

32 ሺን ሃዋ ኔ ኢሻይ፥ ሃይቄዳዌ ፓዖ ዲራውኔ ባዬዳዌ ቤቶ ዲራው፥ ኮኒ ሚዲኔ ኡሺዴ ናሹታናው ቤሴ) ያጌዳ» ጊዴ ኦዴዳ።

16

ጋርሳና ሱንላቴላ አኬዳ ጨንጫ ቢታኒያ

1 ዬሱሲ ባሬና ካሊያዋንቶ ኦዲዴ፥ «ኢቲ ዲሬ ቢታኒ፥ ባሬ ካሊያ ኡባ ቦላ ሱንላዳ ኢቲ ቢታኒ ዴዔ፤ ሺን ሃ ቢታኒ ኣ ሚሻ ባዪዜ ያጊያ ዘገርሳይ ኣ ጋኬዳ፤

2 ሄዋ ዲራው ባሬ ሱንላዳ ቢታኒያ ያሲዴ፥ «ሃዌ ታኒ ሲሲያ ዬዉ ኣዬ? ሃኒፔ ጉዬ ኔኒ ታ ካሊያኒኔ ታ ሚሻ ቦላ ታፔ ጋርሳና ሱንላታዴ ኪቴታናው ዳንዳያቤና ዲራው፥ ሃቹ ጋካናው ኪቴቴዳዋ ሄታዴ ሹፋ) ያጌዳ።

3 «ሱንላቴዳዊ ባሬ ዋዛናን፥ ታ ኅዳይ ታና ሱንላቴላፔ ኮላና ሃኔ፤ ሺን ታ ዋናሻ? ኅሻናው ዋልቃይ ታው ባዋ፤ ዋሳናው ቃሲ ታው ፖኬ።

4 ታ ኦሳናባ ታ ኤራይ፤ ኢ ታና ሱንላቴላፔ ኬሶፔ፥ ባሬንቱ ኅሌ ቢና፥ ታና ሞኪያ ላጌላቴዋ ታኒ ዴማና) ያጌዳ።

5 «ባሬ ኅዳፔ ሻሉዋ ታልዔዳ ኣሳቴዋ ሁጲያን ሁጲያን ያሲዴ፥ ኮይሮ ቢታኒያ፥ «ኔኒ ታ ኅዳፔ ዋይሳ ኬና ሻሉዋ ታልዓዲ?) ያጌዳ።

6 «ኢካ፥ «ታኒ ያቱ ባሬታ ኩሜዳ ዛይቲያ ታልዓዲ) ያጌዳ። «ሱንላቴዳ ቢታኒካ፥ ኔኒ ፓራማና ዋራቃታ ሄይ፤ ኡታዴ ኤሌካ (ኢሻታማ) ጋዴ ዓፋ ያጌዳ።

7 «ሄዋፔ ሃራ ቢታኒያ፥ «ኔኒ ኣፑኩዋ ታልዓዲ?) ያጌዳ። « (ዩቱ ቁንዓ ዛርጋ) ያጌዳ። «ሱንላይካ፥ «ዋራቃታ ሄይ፤ ሆሰፑን ታማ ጋዴ ዓፋ) ያጌዳ።

8 «ሃ ሱንላይ ጨንጫቴላን ኦሌዳ ዲራው፥ ኣ ኅዳይ ኣ ጋላቴዳ፤ ኣያው ሳፔ፥ ሃ ኣላሚያ ኣሳይ ባሬንቱዋ ፖውዋ ኣሳፔ ኣዴዳ ጨንጫቱዋ።

9 «ታኒ ሂንቴንቶ ያጋይ፥ «ሃ ኣላሚያ ሻሉ ዉሪያ ዋዴ፥ ሜዲናው ዉሪና ካሊያን ሂንቴንታ ሞካና ማላ፥ ሃ ሚሻን ሂንቴንቶ ላጊያ ዴሚቴ።

10 ለፋ ዩወዋን አማኔቴዳዌ፡ ዋጋባኒካ አማኔቴ። ሺን ለፋ ዩወዋን አማኔቴቤናዌ፡ ዋጋባኒካ አማኔቴና።

11 ሲሚ ሂንቴንቴ ሃ አላሚያ ሻሉዋን አማኔቴናዋ ጊደፔ፡ ቱማቴላ ሻሉዋ ሂንቴንቶ ኦኔ ሃዳራ ጊደ አሚናዌ?

12 ሂንቴንቴ ሃራ አሳ ሻሉዋን አማኔቴናዋ ጊደፔ፡ ሂንቴንቴ ሚሻ ኦኔ ሂንቴንቶ አሚናዌ?» ጌዳ።

13 «ኢቲ ካላ ላዑ ጎዳቶ ቆማታናው ዳንዳዪያዌ አይ ቆመይካ ባዋ፤ አያው ጎፔ፡ ኢቱዋ አዲዳ፡ ሃራ ደሴ፤ ዋይ ኢቱዋ ቦንቲዳ፡ ሃራ ካዲ፤ ያሳወኔ ሻሎ ሞዴታናው ዳንዳይኪታ» ያጌዳ።

14 ሻሉዋ ደሴያ ፓሪሳዋቱ ሃዋ ኡባ ሲሲዳ፡ ዬሱሳ ቦላ ቂሊጩዲኖ።

15 ሺን ዬሱሲ ኡንቱንታ፡ «ሂንቴንቴ አሳ ሲንላን ሂንቴንታ ዲሎ አሳ ኦሊያዋንታ፤ ሺን ያሳይ ሂንቴንቴ ዋዛና ኤሬ፤ አያው ጎፔ፡ አሳ ሲንላን ቦንቲቴዳዌ ያሳ ሲንላን ቱና ጌዳ።

ሙሴ ሂጊያባኔ ጌሉዋ አካባ
(ማት 5:31-32፤ 11:12-13፤ ማር 10:11-12)

16 «ሙሴ ሂጊያኔ ናባቱ ፃፌዳ ማፃፋ * ዮሃንሳ ዋዲያ ጋካናው አሳይ አዛዘቲዳ ዳዔዲኖ፤ ሄዋፔ ካላ ቃይ ያሳ ካወቴላይ ኦዴቴዳ፤ አሳይ ኡባይ ያ ጌላናው ኬሴቴ።

17 ሺን ሂጊያፔ ኢቲባይ አቲያዋፔ ሳሉኔ ሳባይ አዲያዌ ማታቴ።

18 «ባሬ ማቻቶ ቢሊዳ ሃራሮ አኪያዌ ኡባይ ዋሹሜ፤ ቃሲ አሲናፔ ቢሌቴዳ ማጫወኖ አኪያዌ ኦኒኔካ ዋሹሜ።

ዱሬ ቢታኒያባኔ ማንቆ ጊዳዳ አለዓዛራባ

19 «ጋቲ ሎይሲዳ አልዎ ጊዳዳ ማዩዋ ማዩዲኔ ጋላሳን ጋላሳን ኡቶሩዋን ናሹቲዳ ዳዒያ ኢቲ ዱሬ ቢታኒ ዳዔ።

20 ቃሲካ ኩሜንላ አሳቴላን ማይላይ ዳዒያ ኢቲ አለዓዛራ ጌቴቲያ ሂዬሳይ፡ ሃ ዱሬ ቢታኒያ ካሪያን ጌሴዳ።

21 ሃ ዱሬ ቢታኒያ ሳሞፓፔ ላሌቴዳ ሱፓ ማናው አሞቴ፤ ሃራይ አቶ ካናቱካ ዪዳ አ ማይላ ላጪኖ።

22 «ሃ ሂዬሳ ቢታኒ ሃይቂና፡ ኪታንቻቱ አ አብራሃዋ ባጋ ቦንቻሳ አፌዲኖ፤ ዱሬ ቢታኒካ ቃሲ ሃይቂዳ ሞጌቴዳ።

* 16:16 ሙሴ ሂጊያኔ ናባቱ ማፃፋ፡ አዪሁዳቱዋ ጌሻ ማፃፋቱዋ፤ ሄዋንታ ጉሳይ ኤጫ ጫቁዋ ማፃፋ። 16:16 ማት 11:12፣ 13 16:17 ማት 5:18 16:18 ማት 5:32፤ 1ቆር 7:10፣ 11

23 ሲያለፈን ዳር ሴሌቲዳ ዳዲሺን፣ ቶቁ ገዴ ሃኩዋን አለዓዛራ፣ አብራሃም ባጋን ዳዲያዎ ቤዔዳ።

24 «እካ ባሬ ኮሻ ቶቁ ኡዲዳ፣ ለአብራሃም፣ ታ አቦ፣ ታው ቃሬታ። ሃ ታማ ሴላን ማቶታ ዳዲያ ዲራው፣ አለዓዛር ባሬ ቢራዲያ ፀራ ሃላን ቦቹዳ፣ ታ ኢንፃርሳ ኢርዲሳናዲን ሃያና ታኮ ኪታሪኪ» ያጌዳ።

25 «አብራሃም ቃሲ፣ ለታ ናዓው፣ ኔኒ ፓፃ ዳዓዳ፣ ሎፆ ዳዐብ ዳዒና፣ አለዓዛር ሎዔና ማቶ ዳዐብ ዳዔዳዎ ቆፓ። ሃዒ ቃይ ኢ ሃዋኒ ናሹቲያ ዎዳ፣ ኔኒ ማቱዋ ቦላ ዳዓ።

26 « ለሃዋፔ ሃራይ ቃይ፣ ሃዋፔ ያ ሂንቱንቱኮ አቆናው ኮዪያዋንቱ አዲናዲን፣ ያኒ ዳዲያዋንቱካ ቃሲ ሃ ኑኮ ፒኔናዲን፣ ኑ ገደኒኔ ሂንቱንቱ ገደን ዎጋ አፋ ማዴቱዳ» ያጌዳ።

27 «ዱሬ ቢታኒካ፣ ለአብራሃም፣ ሲሚ ሄዋ ገደፔ፣ ኔኒ አለዓዛራ ታ አቡ ጎሌ ዬዳና ማላ፣ ኔና ዎሳይ።

28 አያው ጎፔ፣ ታው ኢቼሹ አሻቱ ዳዲያ ዲራው፣ ኢንቱንቱ ቃይ ሃ ማቱዋሳ ዬና ማላ፣ ኢንቱንቶ አለዓዛር ቢዳ ማርካቶ» ያጌዳ።

29 «አብራሃም ቃሲ፣ ለሙሴኔ ናባቱ ፃፌዳ ማፃፋይ ኢንቱንቶ ዳዔ፤ ሄ ማፃፋይ ገያዎ ኢንቱንቱ ሲሲና» ያጌዳ።

30 «ዱሬ ቢታኒ፣ ለሃዒ፤ አብራሃም፣ ታ አቦ፣ ሄዋ ገደና፤ ሺን ኢቲ ቢታኒ ሃይቁዋፔ ዳንዲዳ፣ ኢንቱንቱኮ ቢንቶ፣ ኢንቱንቱ ባሬንቱ ናጋራ ፓዲዳ፣ ሲማናዋንታ» ያጌዳ።

31 «አብራሃምካ፣ ለኢንቱንቱ ሙሴኔ ናባቱ ፃፌዳ ማፃፋ ሲሴናዋ ገደፔ፣ ሃራይ አቶ ኢቲ ኡራይ ሃይቁዋፔ ዳንዲ ዪንቶካ አማኒሲና» ያጌዳ።

17

ናጋራባ ዬሱሲ አዳዳ

(ማት 18:6፣ 7፣ 21፣ 22፣ ማር 9:42)

1 ዬሱሲ ባሬና ካሊያዋንታ፣ «አሳ ባሌሌያዊ ዬናን አቲና፤ ሺን ባሌሌያዎ አሂያ ኡራው አው አዬ፤

2 ሄ ቢታኒ ሃ ጉላቱዋፔ ኢቱዋ ባሌሌያዋፔ፣ ጋጨያ ዎፃ ባሬ ቆዲያን ቃሹቲዳ አባን ሚቱቲያዊ አው ሎዓ።

3 ሂንቱ ሁጹው ናጌቲቱ።

«ኔ ኢሻይ ኔና ናቆፔ፣ አ ዙራ። ቃሲ ናጋራፔ ኢ ሲሞፔ፣ አው አቶ ያጋ።

4 ኢት ጋላሲ ኢ ኔና ላፑ ጌዴ ናቁዳ፣ ላፑ ጌዴካ፣ ሳና ታ ናቁዳ፣ ታና ማራ) ጌዴ ኔኮ ጥፕ፣ አው አቶ ጋ» ያጌዳ።

5 ከቴቴዳዋንቱካ ጎዳ፣ «ኑሲ አማኑዋ ጉጃ» ያጌዴ ኦቼዲኖ።

6 ጎዳይካ፣ «ሂንቴው ሳናፊጪያ አይፊያ ከና አማኑ ዳዒንቶ፣ ሂንቴንቱ ሃ ቦዒያ፣ ሃዋፕ ሾዴታዳ፣ አባን ቶኬታ) ጊንቶ ሂንቴው ኤኖ ጋና» ያጌዳ።

ቆማይ ኦላናው ቤሲያ ኦሱዋ

7 ቃሲካ ዬሱሲ፣ «ሂንቴፕ ጎሺያዌ ዋይ ሚያ ሄሚያ ቆማይ ዳዒያ አሳይ ሃቄት ዳዖፕ፣ ጎሻ ጋዴፕ ዋይ ሚያ ጋዴፕ ሲዋ ዋይ ኤሊካ፣ ሃያ ሾምፓ አካ፣ ቁማ ማናው ኡታ) ያጌያዌ ኦኔ?

8 ዬዉዋን ቃሲ፣ ሓ ማና ካዉዋ ጊጊሳ፤ ታ ማናኔ ኡሻና ጋካናው ሚናዳ ታና ኤቃዳ ሚዛ። ሄዋፕ ጉዬ ኔው ማ፣ ኡሻ) ያጌያዋ ጊዴኔ?

9 ሄ ቆማይ ከቴቴዳባ ኦሌዳ ዲራው፣ ሄ ቢታኒ ጋላታናው ቤሴኔ?

10 ሄዋዳንካ ሂንቴ ቃሲ አሳይ ሂንቴና ከቶ ኦሱዋ ኦሌዳ ዋይ፣ ሓኒ ማዳና ቆማቱዋ፤ ኑ ኦሶ ፃላላ ኦሌዳ) ያጌቴ» ያጌዳ።

ዬሱሲ ኦሉ ኦይቄዳ ታሙ አሳቱዋ ፓሌዳ

11 ዬሱሲ ዬሩሳሌም ቢዳ፣ ጋሊላፕኔ ሳማሪያ ጊያ ጋዳቱዋፕ ጊዲዋና አዲዳ።

12 ኢ ኢት ጉሳ ካታማቶ ጌሊያ ዋዲያን፣ ሃኩዋን ኤቄዳ ታሙ ኦሉዋን ኦይቄቴዳዋንቱ አ ቤዔዲኖ። ኡንቱንቱካ ሃኩዋን ኤቄዳ፣

13 ባሪንቱ ኮሻ ቋቁ ኡዲዳ፣ «ዬሱሳ፣ ጎዳው፣ ሃያ ጎዶ ኑና ፓላሪኪ!» ያጌዲኖ።

14 ዬሱሲ ኡንቱንታ ቤዒዳ፣ «ቢዳ፣ ሂንቴንቱ ቦላ ቄሳቱዋ ቤሲቴ» ያጌዳ።

ኡንቱንቱካ ቄሳቱዋኮ ቢዳዒዳ ኦሉዋፕ ፓፄዲኖ።

15 ኡንቱንቱፕ ኢቱ ባሪ ሃርጊያፕ ፓፄዳዋ ቤዒዳ፣ ባሪ ኮሻ ቋቁ ኡዲዳ፣ ያሳ ቦንቸዳ ሲሜዳ።

16 ጋላቲዳካ ዬሱሳ ጌዲያ ማታን ጉልባቴዳ። ሄ ቢታኒ ሳማሪያ አሳ።

17 ዬሱሲ ዛሪዳ፣ «ታሙ ፓፂቤይኪኖ? ያቲና ኡዲፕናቱ ሃቃን ዳዒኖ?

18 አዪሁዳ አሳ ጊዳና ሳማሪያ ቢታኒያፕ ኦቲን፣ ያሳ ቦንቸናው ሲሜዳዋንቱ ባዋ ጉሴ?» ያጌዳ።

19 ዩሱሲ አ፡ «ዳንዳ ባ፤ ኔ አማኑ ኔና ፓሌዳ» ያጌዳ።

ጾሳ ካወቱላ ዩሳባ
(ማጥ 24:23-28፣ 37-41)

20 ፓሪሳዎቹ አቲ ጋላሲ፡ «ጾሳ ካወቱላይ አዉዴ ያኔ?» ጌዴ ኦቲና ዩሱሲ፡ «ጾሳ ካወቱላይ ሂንቴንቴ ናጊያ ኦጊያን ዩና» ያጊ ዛሬዳ።

21 ቃሲካ፡ «አኒኔ፡ ለጾሳ ካወቱላይ ሃዋን ዴዔ፡ ዎይ ሃዋን ዴዔ» ጋናው ዳንዳዩና፤ ጾሳ ካወቱላይ ሂንቴንቴ ዎዛና ጊደን ዴዔ» ያጌዳ።

22 ዩሱሲ ባሬና ካሊያዎንቶ ኦዲዳ፡ «አሳ ናዓይ ቆንጨያ ጋላሳቱዋፔ አቱዋ ቤዓናው ሂንቴንቴ አሞቲያ ዎዲ ያና፤ ሺን ቤዒኪታ።

23 ቃሲ ኡንቴንቴ ሂንቴና፡ ለዋኩ ሃዋና) ዎይ ለሃዋና) ያጋናዎንታ። ሺን ኡንቴንታ ካሊዳ፡ ኡንቴንቴና ቦፒቱ።

24 ዋልቃንላይ ሳሉዋን ዋልቃሚያ ዎዴ፡ ሃ ጋፃፔ ሂኒ ጋፃ ፖዑ ፖዒያዎዳን፡ አሳ ናዓ ዩሳይካ ሃዋዳን ሃናናዎ።

25 ሺን ኮይሮቲዴ አሳ ናዓይ ዳሮ ሜቱዋ ሜቶታናዉኔ ሄ ዎዲያን ዴዒያ ዩሌታን ኢፃታናው ቤሴ።

26 «ኖሄ ዎዲያን ሃናዎዳንካ፡ አሳ ናዓይ ቆንጨያ ጋላሳንካ ሃዎዳን ሃናናዎ።

27 ኖሄ ማርካቢያ ጌሎ ጋላሳይ ጋካናው ኡንቴንቴ፡ ሚዲኔ ኡሺዳ፡ አኪዲኔ አኬቲዴ ዴዒሺን፡ ባሻ ሃላይ ዪዴ ኡባ አሳካ ባዪዜዳ።

28 «ሃዎዳንካ፡ ሎፃ * ዎዲያን፡ አሳይ ሚዲኔ ኡሺዳ፡ ዛሊዒዳ፡ ቶኪዲኔ ጎሊያ ከፃዴ ዴዒዲና።

29 ሺን ሎፃ፡ ሶደማፔ ኬሶ ጋላሳን ቃሲ ሳሉዋፔ ታማይኔ ኤፃያ ቦንቆ ሹቻይ ቡኬዳ፤ ኡባባካ ሚዴ ዉርሴዳ።

30 «አሳ ናዓይ ቆንጨያ ጋላሳንካ ሃዎዳን ሃናናዎ።

31 ሄ ጋላሳን፡ ጎሊያ ሁጲያን ዴዒያዎ፡ ጎሌ ጋርሳን ዴዒያ ሚሻ አካናው ዎጶፖ፤ ሃዎዳንካ ጎሻ ጋዴን ዴዒያዎ፡ ጉዬ ሲሞፖ።

17:26 ደሞ 6:5-8 17:27 ደሞ 7:6-24 * 17:28 ኖሄ ... ሎፃ፡ ጾሳይ ቢታ ባሻ ሃላን ባዪዜዳ ዎዴ፡ ኢ ኖሃኔ አ ጎሌ አሳ አሺዳ። ጾሳይ ሶደማኔ ጋሞራ ካታማቱዎ፡ ኢዚን ዴዒያ አታ አሳቱዋ ኡባ ታማን ባዪዜዳ ዎዴ፡ ሎፃኔ አ ጎሌ አሳ አሺዳ (ደሞ 19:1-29 ጄሊቲ)። 17:29 ደሞ 18:20-19:25 17:31 ማጥ 24:17፣ 18፤ ማር 13:15፣ 16

32 እኔ ሎጼ ማቻቲባ ቆፒቱ!
 33 ባሬ ሽምጥዋ አሻናው ኮዪያ ኡባይ፣ ባዪዜ፤ ባሬ ሽምጥዋ ባዪዪያ ኡባይ፣ ደዑዋን ናጌ።
 34 ታ ሂንቱው ኦዲያዌ አዬ ጎፔ፣ ሄ ቃማን ላዑ አሳቱ ኢቲ ጊሱዋን ጊሳናዋንታ፤ ኡንቱንቱፔ ኢቱ አኬቲና ላዔሊያዌ አታናዋ።
 35 ላዑ ማጫ አሳቱ ኢቲ ዋፃን ጋጫናዋንታ፤ ኢቲና አኬቲና፣ ኢቲና አታናዉኑ።
 36 ላዑ አሳቱ ጎሻ ጋርሳን ዴዒና፤ ኢቱ አኬታናዋ፣ ላዔሊያዌ አታናዋ» ያጌዳ።
 37 አ ካሊያዋንቱ ዬሱሳ፣ «ጎዳው፣ ሄዌ ሃቃን ሃናናዌ?» ያጌዲና።
 ኢካ ዛሬዴ፣ «ባኩታይ ዴዒያሳ ሾርቲ ሺቃናዋ» ያጌዳ።

18

ማንቆ ጊዴዳ አምዓቲባኔ ማካላንቻ ዳናባ

1 ዬሱሲ ባሬና ካሊያውንቶ፣ ሳሌቲናን ኡባ ጋላሲ ዋሳናዳን ለሚሱዋን ኦዴዳ።
 2 ኢካ፣ «ኢቲ ካታማን ያሳው ያዬናዌ፣ አሳካ ቦንቼና ኢቲ ዳናይ ዴዔ።
 3 ሄ ካታማን አምዔ ሚሺራታ ዴዒው። ኢዛካ ሄ ዳናኮ ያዴ፣ ታዋ ሞርኬዉኔ ታው ዴዒያ ዬዉዋ ፒርዳ» ያጋዲ።
 4 «ዳር ዋዲያን ኢዚው ፒርዴናን ኢፄዳ። ሺን ባሬ ዋዛናን ቆፒዴ፣ ታኒ፣ ኡባ ያሳው ያያና ቆዮፔካ፣ አሳካ ቃይ ቦንቻና ቆዮፔ፣
 5 ሄ አምዔ ሚሺራታ ታና ላባንሊያ ዲራዉኔ ኡባ ዋዴ ታኮ ያዴ ታና ዳቡርሴና ማላ፣ ታኒ ኢዚው ፒርዳና» ጌዳ።
 6 «ሄ ማካላንቻ ዳናይ ጎዋ አኬኪቱ።
 7 ያሳይ ጋላሲኔ ቃማ ባሬንታ ማዳና ማላ፣ ዳንዲያን አኮ ዋሲያ ደሬታዋንቱሲ ፒርዴኔዬ? ኢ ኡንቱንቶ ኤሌካ ዛሬኔ?
 8 ታኒ ሂንቱንቶ ያጋይ፤ ኡንቱንቶ ኤሌሊ ፒርዳና፤ ሺን አሳ ናዳይ ዪያ ዋዴ ሃ ቢታን አማኑዋ ዴማኔሻ?» ያጌዳ።

ኦቶሬቲያ ፓሪሳዊያኔ ባሬና ካዉሺሴዳ ቃራፃ ቃንፂያ ቢታኒያ

9 ባሬንታ ጌሻ ጊዴ አማኔቲያዋንቶኔ ሃራ ኡባ ዳሪ ካዲያዋንቶ፣ ዬሱሲ ሃ ለሚሱዋ ኦዴዳ።

17:32 ደም 19:26 17:33 ማኮ 10:39፤ 16:25፤ ማር 8:35፤ ሉቅ 9:24፤ ዮሀ 12:25 17:36 ማኮ 24:40

10 «ለዑ አሳቱ ዋሳናው ጌሻ ጎሊያ * ጌሌዲኖ። ሄዋንቱ፤ ኢቱ ፓሪሳዊያ፤ ኢቱ ቃይ ቃራፃ ቃንዲያዋ።

11 ፓሪሳዊ ዴንዲ ኤቂዴ ባሬ ዋዛናን ዋሲዴ፤ ሪሳው፤ ታኒ ሃራ አሳዳን፤ ቦንቂያዋንቱዳን፤ ማካሊያዋንቱዳን፤ ዋሹሚያዋንቱዳን፤ ዋይ ሃዋዳን ቃራፃ ሺሺና ዲራው ኔና ጋላታይ።

12 ሳሚንታን ላዑ ካላ ያማይ፤ ታኒ ዴሚያ ኡባ፤ ታሙ ኩሺያ፤ ኢቱዋ አማይ፤ ያጌዳ።

13 «ሺን ቃራፃያ ቢታኒ ሃኩዋን ኤቂዴ፤ ባሬ አይፊያን ፑዴ ሳሉዋ ጶቁ ጊዴ ፃላናዉካ ኮዩቤና። ሺን ባሬ ቲራ ባቂዴ፤ ሪሳው፤ ታኒ ናጋራንቻ፤ ታና ማራ» ያጌዳ።

14 ታኒ ሂንቲንቶ ኦዲያዌ አዬ ጎ፤ ካሴ ቢታኒያ፤ አቂዴ ሃ ቢታኒ ዲሎ ጊዲዴ ባሬ ጎሌ ሲሜዳ፤ ባሬና ጶቁ ኦሊያ ኡባይ ካዉሻና፤ ባሬና ቃይ ካዉሺሲያ ኡራይ ጶቁ ጋና» ያጌዳ።

ዩሱሲ ጉላ ናና አንጄዳ
(ማቴ 19:13-15፤ ማር 10:13-16)

15 ዩሱሲ ባሬ ኩሺያ ዋሲዴ አንጄና ማላ አሳይ ጉላ ናና አኪዴ አኮ ዩዲኖ። አ ካሊያዋንቱካ ቤዒዴ፤ አሳ አሄና ማላ ጌዲኖ።

16 ዩሱሲ ቃሲ ጉላ ናና ባሬኮ ያሲዴ፤ «ጉላ ናናይ ታኮ ያና ማላ አገቱ፤ ዲጎ፤ ጎሳ ካዉቲላይ ሃዋንቱ ማላሳ።

17 ታኒ ሂንቲንቶ ቱሙዋ ኦዲይ፤ ጎሳ ካዉቲላ ጉላ ናናዳን አኪናዋንቱ ኡባይ ሄ ካዉቲላ ሙሌካ ጌሌና» ያጌዳ።

18 ዩሱዳ ቢታ ሞዲያዋንቱ፤ ኢቱ፤ «ሎፖ ታማሪሲያዋ፤ ታኒ ሜቂና ዴዑዋ ላታናው አያ ኦላናው ቤሲ?» ያጌዴ ዩሱሳ ኦቼዳ።

19 ዩሱሲካ አው፤ «አያው ታና ሎፖ፤ ያጋይ? ኢቱ ያሳ፤ ኢቲን፤ ሎዑ ኦኒኔ ባዋ፤

20 ያሳ አዛዛቱዋ፤ ሳዋሹዋ፤ ዋቋ፤ ዉፖ፤ ዋርዲዋ ማርካቶ፤ ኔ አባኔ ኔ ዳዮ ቦንቻ ያጊያዋ ኤራ» ያጌዴ ዛሬዳ።

21 ቢታኒ ዛሬዳ፤ «ሃዋ ኡባ፤ ናዓቲላ፤ ደማዴ ናጋዲ» ያጌዳ።

22 ዩሱሲካ ሃዋ ሲሲዴ፤ «ኢቲባይ ኔኒ ቢሮን ኦሌናኒ አቶዌ ዴዒ፤ ሄዌኔካ፤ ኔው ዴዒያዋ ኡባ ዛሊዳዴ ማንቃቶ ኢማ፤ ሃዋ አላ፤ ሳሉዋንካ ኔኒ ዴሬታና፤ ሄዋ፤ ጉዬ ታ ጌዲዋ ካላ» ያጌዳ።

23 ሄ ቢታኒ ቃሲ ሄዋ ሲሲዴ ዳሮ ዴሬ ጊዴ ዲራው ዳሮ ካዮቲዳ።

* 18:10 ዋሳናው ጌሻ ጎሊያ፡ አዩሁዳ አሳይ ኡባ ዋዴ ጌሻ ጎሊያን ዋንታ ጉራኒኔ ጋላሳ ዋሲኖ።

24 ዩሱሲካ ሃ ቢታኒ ዳሮ ካዮቶዋ ቤዒዳ፡ «ዱሬ አሳይ ያሳ ካዉቲላ ጌላናው ዋቲ ሜታንዳሻ!

25 ዱሬ አሳይ ያሳ ካዉቲላ ጌላናዋ፤ ጋሉ ማርፒያ ያዉያና አቋናዌ ማታቲ» ያጌዳ።

26 ሄዋ ሲሴዳ አሳይ፡ «ሲሚ ኮኒ አታናው ዳንዳዪ?» ያጌዳ።

27 እካ ቃይ ዛሪዳ፡ «አሳው ዳንዳዬናዌ ያሳው ዳንዳዬ» ያጌዳ።

28 ጳዊርሲ ዛሪዳ፡ «ሲሚ ኮኒ ኮሲ ዳዉያ ኡባ አጊዳ ኔና ካሌዳ» ያጌዳ።

29 እካ፡ «ቱሙዋ ጋይ፡ ያሳ ካዉቲላ ዲራው ባሬ ጎሊያ፡ ዋይ ባሬና ዩላዋንታ፡ ዋይ ባሬ ማቹያ፡ ዋይ ባሬ ናና፡ ዋይ አሻቱዋ አጌዳዌ።

30 ሃዋዲያን ዳሮ ዳኩዋ፡ ሲንላ ዪያ ካዉቲላኒካ ሜቋና ዴዐዋ አኬናዌ ኮኒኔ ባዋ» ያጌዳ።

ዩሱሲ ባሬ ሃይቁዋባ ሄዜንሉዋ ኦዴዳ

(ማጥ 20:17-19፤ ማር 10:32-34)

31 ዩሱሲካ ታማኔ ላዑ ባሬና ካሊያዋንታ ባሬኮ ዪሲዳ፡ «ሲሚ ዩሩሳላሜ ባና፤ አሳ ናዓባይካ ናባቱ ማፃፋን ፃፊቲዳባይ ኡባይ ያኒ ፖሌታና።

32 አዪሁዳ ጊያናዋንቶ አ አሊ አማና፡ ቂሊጫና፡ ዳሮ ሜቶላና፡ አ ቦላን ጨቻና፤

33 ሾጮዋ፤ ጉዪያን ዋቋና፡ ሄዜንሊያ ጋላሲ ኢ ዳንዳና» ያጌዳ።

34 ኡንቱንቱካ ሃ ዩዉዋ፤ አያኔ አኬኪቤይኪኖ፤ ሃዪቁካ ኡንቱንቶ አኬኬቲቤና ዲራው ኢ ሃሳዮባካ ኤሪቤይኪኖ።

35 ዩሱሲ ኢያርኮኮ ማቲዳ ዋዲያን፡ ኢቲ ቆቃ ቢታኒ ዋሲዳ ኦጊያ ጋፃን ኡቲዳ።

36 ጮራ አሳይ አቋያዋ ሲሲዳ፡ «ሃዌ አዬሻ?» ያጌ ኦቹዳ።

37 አሳይካ አው፡ «ናዚሬቲያ ዩሱሲ ሃዋና አቋዴ ዴዔ» ያጌ ዛሬዲኖ።

38 እካ፡ «ዳዊቲ ናዓ ዩሱሳ፡ ታና ማራሪኪ» ጊዴ ዋሴዳ።

39 አፔ ሲንላና ቢዴ ዳዉያዋንቱካ፡ ጮዑ ጋናዳን ሃንቁቲዲኖ። ኢ ቃይ፡ «ዳዊቲ ናዓው፡ ታና ማራሪኪ» ጊዴ ዳሪ ዋሴዳ።

40 ዩሱሲካ ኤቂዳ፡ ባሬኮ አሃናዳን አሳው ኦዴዳ።

41 ዩሱሳኮ ኢ ማቶ ዋዲያን፡ ዩሱሲ፡ «ታኒ ኔው አያ ኦላናዳን ኮያይ?» ያጊዴ አ ኦቹዳ።

እካ ዛሪዳ፡ «ጎዳው፡ ዪላናው ኮያይ» ጌዳ።

- 42 ዩሱሲካ፡ «ጻላ፡ ኔ አማኑ ኔና ፓሌዳ» ያጌዳ።
- 43 ሄ ዎዲያንካ ግሊ አጌዳ፤ ያሳካ ቦንቹዳ ኣ ጌዲዎ ካሌዳ። አሳይ ኡባይ ቢታኒያ ግሊዳ፤ ያሳ ጋላቴዲኖ።

19

ዩሱሲኔ ዛኪዮሳ

- 1 ዩሱሲ ሂኒ ኢያርኮ ካታማ ጌሊዳ፤ ሄዎና አዲ ዳዔ።
- 2 ሱንሳይ ዛኪዮሳ ጌቴቲያ ኢቲ ዲሬ ቢታኒ ሄዎን ዳዔ። ኢካ ቃራግያዎንቱሲ ካቸዎ።
- 3 ዛኪዮሲ ዩሱሳ ጌቴቲያዊ ሃቃዊንቶ ቤዓናው ኮዩሺን ቃንሳ ጌዳዳዎ ዲራው፤ አሳ ጮራቴላፔ ዳንደዎን ቤዓናው ዲንዳዩቤና።
- 4 ዩሱሲ ሄ ኦጊያና አዲያ ዲራው፤ ሲንሳው አዲዳ ኢቲ ቦዲያ ቦላ ከሴዳ።
- 5 ዩሱሲ ሄ ሳዓ ጋኪዳ፤ ቶቁ ጌ ፑዳ ግሊዳ፤ «ዛኪዮሳ፡ ሃቹ ኔ ጎሌን ፔሻናው ቤሲያ ዲራው ኤሌ ዎቆ» ያጌዳ።
- 6 ኢካ ኤሌሊ ቦዲያፔ ዎቆዳ፤ ናሼቻን ዩሱሳ ሞኬዳ።
- 7 ሄዎን ዳዔያ አሳ ኡባይ ሃዎ ቤዒዳ፤ «ሃዌ ናጋራንቻ ጎሌን ጌሊዳ አማላ ጌዲዳ ሸቤታና ሃኔ» ጌዳ ኡባቱካ ዙዙንላ ደሜዲኖ።
- 8 ዛኪዮሲካ ቃሲ ኤቂዳ ጎዳ፤ «ጎዳው፡ ሲሚ ታው ዳዔያዎ ኡባፔ ባጋ ሂዩሳቶ አማና፤ ኦፔኔካ ዎርዲዎን ኣኬዳዎ ጌደፔ፤ ኦይዲ ዳኩዎ ኡዳዳ ዛራና» ያጌዳ።
- 9 ዩሱሲካ ዛኪዮሳው ኦዲዳ፤ «ኔኒካ ኣብራሃዎ ሸሻ ጌዲያ ዲራው፤ ሃቹ አቶቴሳይ ሃ ጎሌ አሳው ዩዳ።
- 10 አያው ጎፔ፤ አሳ ናዓይ ባዩዳዎ ኮያናዉኔ አሻናው ዩዳ» ያጌዳ።

ታሙ ቆማቱዎ ለሚሱዎ (ማት 25:14-30)

- 11 አሳይ ሃዎ ሲሲዳ ዳዔሺን ዩሱሲ፤ ሂኒ ዩሩሳሌሜ ማቶ ዲራውኔ ኡንቱንቶ ያሳ ካዉቴሳይ ሃዒካ ቆንጨያዎ ማላቶ ዲራው ለሚሱዎ ኦዳዳ።
- 12 ሃዎዳን ያጌ ደሜዳ፤ «ኢቲ ዎልቃማ ቢታኒ ባሬው ካዉቴሳ ቦንቹዎ ኣኪዳ ሲማናው፤ ሂኒ ሃኮ ጋዲያ ቤዳ።

13 ባሬ ቆማቱዋ ጊደፔ ታሙዋ ያሰደ፡ ኡንቱንቶ ታሙ ሚና * ጌቲቲያ ሚሻ ኢሞዋሽን፡ ሳቲ ሲማዴ ያና ጋካናው፡ ሃሚሻን ዛለዲሺቲ) ያጌዳ።

14 «ሺን አ ጋዲያ አሳይ አ ኢያ ዲራው፡ ሳሃ ቢታኒ ኑ ቦላ ካወታናዳን ኑኒ ኮዮኮ» ያጌዳ፡ ጉዬና ኢ ዴዲያሳ አሳ ኪቲዲኖ።

15 ጊደፔ አቲን፡ ሃ ቢታኒ ካቲ ጊዲዴ ሂኒ ባሬ ጋዴ ሲሜዳ። ሄ ቆማቲ ሁጲያን ሁጲያን ኢ ኢሞ ሚሻን ዛለዲዴ አይ ኬና ዋዲሴዲኖንቶ ኡራናው ያሰደዳ።

16 «ኮይሮ ቆማይ ሸቂዴ፡ ሳዳው፡ ኔኒ ታው ኢሜዳ ታሙ ሚና ዋዲያ ታሙዋ ዴማዲ) ያጌዳ።

17 አ ጎዳይ አ፡ ሳሃናሽ! ኔኒ ሎዎ ቆማ፤ ኔኒ ጉላ ዬወዋን አማኔቲዳዋ ጊዳዴ ቤቶ ዲራው፡ ታሙ ካታማቱዋ ቦላን ማታይ ኔው ኢሜቲዳ) ያጌዳ።

18 «ላዔሊያዌካ ሸቂዴ፡ ሳዳው፡ ኔኒ ታው ኢሜዳ ኢቼሹ ሚና ጌቲቲያ ሚሻይ ኢቼሹዋ ዋዲዳ) ያጌዳ።

19 አ ጎዳይካ አ፡ ሳው ኢቼሹ ካታማቱዋ ቦላን ማታይ ኢሜቲዳ) ያጌዳ።

20 ሃራ ሄዘንሊያ ቆማይ ሸቂዴ፡ ሳዳው፡ ጨርቃን 99 ዋሌዳ ኔ ሚሻ ሃዋ ቤዓ።

21 አያው ጎፔ፡ ኔኒ ዋላቤናሳፔ አኪያዋ፤ ዜራቤናዋ ቆይጨያ ሜቄሊ ባይና አሳ ጊዲያ ዲራው፡ ኔው ያያዲ) ያጌዳ።

22 «ጎዳይካ፡ ሳ ኢታ ቆማይ፤ ኔኒ ሃሳዮ ቃላን ኔ ቦላ ታኒ ፒርዳና። ዋላቤናዋ አኪያዋ፡ ዜራቤናዋ ቆይጨያ ሜቄሊ ባይና አሳ ጊዲያዋ ኤርፔ።

23 ታኒ ያዴ ታ ሚሻ ዋዲያና አካና ማላ፡ አዪሲ ዋዲሲያዋንቶ ኢማቤይኪ?) ያጌዳ።

24 «ጎዳይካ፡ ሄዋን ኤቆዋንታ፡ ሳ ሚሻ አፔ ዋሊ አኪዴ ታሙ ሚናይ ዴዲያዋ ኢሚቲ) ያጌዳ።

25 ኡንቱንቲካ፡ ሳዳው፡ አው ታሙ ሚናይ ዴዔ) ያጌዳኖ።

26 «ኢካ፡ ሳቲ ሂንቲንቶ ኦዲያዌ፡ ዴዲያዋ ኡባው ጉጁታናዋ፤ ባይናዋፔ ቃሲ ሄ ዴዲያዌካ አኬታናዋ።

27 ዬወዋን ቃሲ ታኒ ኡንቱንቲ ቦላን ካወቲናዳን ኮዬዳ ታ ሞርካቱዋ ታኮ አሂዴ ታ ሲንላን ሹኪቲ) ጌዳ» ያጌዳ።

* 19:13 ሚና፡ ሚና ጌቲቲያዌ፡ ግሪኬ ቃላን (ሚናሲ) ጊያዋ፡ ሃዋ ቢሊላይ፡ ሄዋዴ ዴዲያ ኦሳንቻ አሳው ኢሜቲያ ሄዙ አጌና ዲርጉዋ። 19:26 ማት 13:12፤ ማር 4:25፤ ሉቅ 8:18

ዩሱሲ ዳር ቦንቹዋን ዩሩሳሌሜ ጌሌዳ
(ማጥ 21:1-11፤ ማር 11:1-11፤ ዮሀ 12-19)

28 ዩሱሲ ሃዋ ጎዋፔ ካላ ሂኒ ዩሩሳሌሜ ኬሳናው ባሬና ካሊያዋንቱፔ ሲንፋቲዳ ቤዳ።

29 ዳብሬ ዛይቲ ጌቲቲያ ዳሪያ ማታን ዳዒያ ሂኒ ቤቴፋጌን ቢታኒያ ጌቲቲያ ሄራ ካታማቱዋኮ ሸቄዳ ዋዳ ባሬና ካሊያዋንቱፔ ላዓቱዋ።

30 «ሂንቲንቱፔ ሲንፋን ዳዒያ ቄሪ ካታማቱዋ ቤቲ፤ ያ ሂንቲንቱ ጌሊያ ዋዳ፤ ኦኒኔ ቢር ኡቲቤና ሃሬ ማራይ ቃሼቲ ኡቴዳዋ ዳማኒታ፤ ኣ ቢሊዳ ሃ ኣኪ ዪቴ።

31 ኦኒኔ ሂንቲንታ፡ «ሃዋ ኣያው ቢሊቲ?» ጊዳ ኦቾፔ፡ «ኢ ባሬ ጎዳው † ኮሺያ ዲራሳ» ያጊቲ» ያጊዳ።

32 ኪቴቲዳዋንቱካ ቢዳ፡ ዩሱሲ ኡንቱንቶ ኦዶዋዳን ሃኒና ዳሜዲኖ።

33 ኡንቱንቱ ሃሬ ማራ ቢሊያ ዋዳ ቤዒዳ ሃሪያ ጎዳይ፡ «ሃሬ ማራ ኣያው ቢሊቲ?» ያጊዳ።

34 ኡንቱንቱካ፡ «ጎዳው ሃዌ ኮሺ» ያጊዳ።

35 ሃሬ ማራ ዩሱሳኮ ኣሄዲኖ፤ ባሬንቱ ማዩዋ ኣ ቦላን ዋሊዳ ዩሱሳ ሃሪያ ቶጊሴዲኖ።

36 ኣሳይካ ዩሱሲ ቢያ ኦጊያ ቦላ ባሬንቱ ማዩዋ ሂዳዲኖ። †

37 ኢ ዳብሬ ዛይቲ ጌቲቲያ ዳሪያ ዲጌፋ ኣፊያ ኦጊያ ማቴዳ ዋዳ፡ ዳር ጮራ ጊዳዳ ኣ ካሊያዋንቱ ቤዒዳ ያሳይ ኦሌዳ ማላታው ኡባው ናሼቲዳ፡ ባሬንቱ ኮሻ ቶቄ ኦሊዳ።

38 «ጎዳ ሱንፋን ዪያ ካቲ ኣንጃቴዳዋ፤

ሳሉዋን ሳርታይ ጊዳ።

ቃሲ ኪሊ ቶቃ ሳሉዋን

ዳዒያ ያሳይ ቦንቹቶ»

ያጊዲኖ።

39 ኣሳ ጋርሳን ዳዒያ ኢቲ ኢቲ ፓሪሳዋቱ ዩሱሳ፡ «ታማርሲያዎ፡ ኔና ካሊያዋንታ ጮፀ ኦሳሪኪ» ያጊዲኖ።

40 ኢካ ዛሪዳ፡ «ታኒ ሂንቲንቶ ኦዳይ፡ ኡንቱንቱ ጮፀ ጎፔ፡ ሹቻይካ ዋሳናዋ» ያጊዳ።

41 ዩሱሲ ዩሩሳሌሜ ማቴዳ ዋዳ፡ ካታማቶ ቤዒዳ፡ ዩኪዳ፡

† 19:31 ጎዳው፡ ሃዋን ጎዳው ጌቱቶዌ፡ ሃሬ ማራ ጎዳፔሺን፡ ያሳ ጊዳና። † 19:36 ማዩዋ ሂዳዲኖ፡ ሃዋ ጉሳይ፡ ኣዪሁዳ ኣሳ ዋጋን፡ ኤሬቴዳኔ ቦንቹቲያ ኣሳው ኡዳቲያ ኣሚፋ ዋካ ዋጋ። 19:38 ማዝ 118:26

42 «ኔ ሳርታው ጊዲያዎ ነኒ ሃቼ ኤራዲንቶ ሎዓ፤ ሺን ሃዒ ሄዌ ኔ ኣይፊያፕ ጌሜዳ።

43 ኣያው ጎፔ፣ ኔ ቦላ ያና ዎዲ ዳዔ፤ ሄ ዎዳ ኔና ኢዲያዎንቱ ኔ የቹዎን ዲርሳ ዲሪዳ፣ ያፔኔ ሃፔኔ ዶዲዳ፣ ኔና ኡንዔሊያ ዎዲ ያናዎ።

44 ኔናኔ ኔ ዲርሳ ጋርሳን ዳዒያ ኔ ኣሳ ሜንሌሬላና። ያሳይ ኔና ቤዓናው ዩዳ ዎዲያ ኔኒ ኤራቤና ዲራው፣ ኔና ኢዲያዎንቱ ሹቻ ኡባ ኢቱዎ ኢቱዎ ቦላፔ ዳንሊዳ ላላናዎ» ያጌዳ።

ዩሱሲ ጌሻ ጎሊያን ዛለዒያዎንታ ዩዳርሴዳ
(ማጥ 21:12-17፤ ማር 11:15-19፤ ዮሀ 2:13-22)

45 ሃዎፔ ካላ ዩሱሲ ጌሻ ጎሊያ ጌሊዳ፣ ዛለዒያዎንታ ሄዎፔ ኬሴዳ።

46 ዩሱሲ ዛሪዳ፣ « ታ ጎሊ ያሳ ዎሲያ ጎሊያ ጊዳናዎ ጌቲቲዳ ያሳ ቃላን ዓፊቲዳ። ሺን ሂንቲንቱ ኣ ፓኑዎ ጎንጎሉዎ ኦሴዲታ» ያጌዳ።

47 ዩሱሲ ኡባ ዎዳ ጌሻ ጎሊያን ታማሪሲ ዳዒሺን፣ ቄሳቱዎ ካፓቱ፣ ሙሴ ሂጊያ ታማሪሲያዎንቱኔ ኣሳ ኣዩሲያዎንቱ ኣ ዎዳናው ኮዩኖ።

48 ሺን ኣሳይ ኡባይ ኣ ሃሳያፔ ኢቱኔ ኣቲናን ሲሲ ኡቶ ዲራው፣ ኣ ዎዲያ ኦጊያ ኡንቲንቱ ዳዩዲኖ።

20

ዩሱሳ ማታ ቦላ ዳንዳዳ ኦሻ
(ማጥ 21:23-27፤ ማር 11:27-33)

1 ኢቲ ጋላሲ ዩሱሲ ኣሳ ጌሻ ጎሊያን ታማሪሲዳኔ ሚሺራቹዎ ቃላ ኦዲዳ ዳዒያ ዎዳ፣ ቄሳቱዎ ካፓቱኔ ሙሴ ሂጊያ ታማሪሲያዎንቱ ጋዲያ ጨማቱዎና ኢቲፔ ዩሱሳኮ ዩዲኖ።

2 ኡንቲንቱካ፣ «ሃ ዩጩዎ ኔኒ ኡዲያዌ ኣይ ማታኔንቶ ኦዳ፤ ሃ ማታካ ኔው ኢሜዳዌ ኢ ኦኔ?» ያጌዳ ኦቹዲኖ።

3 ኢካ፣ «ታ ሂንቲና ኢቲ ኦሻ ኦቹያዌ ዳዒያዎ ኣኔ ዛሪቲ።

4 ዮሃኒሳ ዲንቃታይ ያሳፔ ዎይ ኣሳፔ?» ያጌ ኦቹዳ።

5 ኡንቲንቱ ባሬ ጊዶን ማቄቲዳ፣ «ያሳፔ ጎፔ፣ ሄዎ ጊዶፔ ላያው ኣማኒቤይኪቲ» ኮና ያጋናዎ፤

6 «ኣሳፔ» ጎፔ፣ ኣሳይ ኡባይ ዮሃኒሲ ናቢያ ጊዲያዎ ኣማኒያ ዲራው ሹቻን ኮና ዳቻናዎንታ» ያጌዲኖ።

7 ሃዋሲ፡ «ሃቃፔ ዩዳንቶ ኤሮኮ» ጊዴ አው ዛሬዲኖ።

8 ዩሱሲካ፡ «ሃዋ ጊደፔ ታካ፡ ታኒ ኦ ማታን ሃ ዩወዋ ኦላይታንቶ ሂንቴንቶ ኦዲኬ» ያጌዳ።

9 ሃዋፔ ሲሚዴ ዩሱሲ አሳው ሃ ለሚሱዋ ያገገ ኦዲዋ ደሚዳ፡ «ኢቲ ቢታኒ ዳሮ ዋዪኒያ ቱራቱዋ ቶኬዳ። ጎሻንቻቱዋሲ ኮላው ኢሚዴ፡ ኢ ሂኒ ሃራ ጋዲያ ቢዴ ጮራ ዋዲያ ጋሚዴ።

10 ዋዪኒ አይፊያ አይፎ ዋዴ፡ ዋዪኒያ ጎሻ ጎዳይ ባሬና ጋኪያዋ አሃናዳን ኢቲ ቆማ ኮላዋቱዋኮ ከቴዳ። ከቴቲ ቤዳዋካ ዶቢዴ፡ ሚላ ኩሺያ ዩዴዲኖ።

11 ሃዋፔ ሃራ ቆማ ከቴዳ። ኡንቴንቴ ሄዋካ ቃሲ ዶቢዴ፡ ቶቺዴ፡ ሚላ ኩሺያ ዩዴዲኖ።

12 ሃዲካ ሃራ ሄዜንሏያ ቆማ ከቴዳ። ኡንቴንቴካ ቃሲ ኦ ማሱንሏዴ፡ ሂኒ ካሬ ኦሌዲኖ።

13 «ሄ ዋዪኒያ ቱራ ጎዳይካ፡ ሲሚ ኦያ ኡደ? ኦኔ ሃዲ ታ ደሲያ ናዓ ከታና፤ ኦኒ ኤሪ ኦ ቦንቾፔኔ» ጌዳ።

14 ጎሻንቻቱ ቃሲ ናዓ ቤዴዳ ዋዴ፡ ሃዋ ኦ ላቲያዋ ጊደ ዲራው፡ ሃዪቴ ዋዶይቴ፤ ሃዋፔ ጉዬ፡ ቢታይ ኦሳ ጊደናና) ጊዴ ዘሬቴዲኖ።

15 ዋዪኒያ ቱራ ሳዓፔ፡ ሂኒ ካሬው ከሲዴ ኦ ዋዴዲኖ።

«ዋዪኒያ ቱራ ጎዳይካ ኡንቴንታ ኦያ ኦላንዴሻ?

16 ዮፔ ሄ ጎሻንቻቱዋ፡ ዋዳናዋ፤ ዋዪኒያ ቱራ ሳዓካ ሃራንቶ ኢማናዋ» ያጌዳኖ።

አሳቱካ ሃዋ ሲሶ ዋዴ፡ «ሃዋ ማላባ ኦሆፖ» ያጌዳኖ።

17 ዩሱሲካ ሂኒ ኡንቴንቴኮ ያሊዴ፡

« ሲሚ ሹቻ ጎሊያ ከዲያዋንቴ ካዴዳ ሹቻይ፡

ኢ ዋና ጎሊያ ሚኒሲያ ሁጴ ሹቻ ጊዴዳ)

ጌቴቲዴ ያፌቴዳዋ ቢሌላይ ኦዬ?

18 ሃ ሹቻ ቦላን ኩንዲያ ኡባይ ሚዴሬቴ፤ ሹቻይካ ኦ ቦላን ኩንዲያ ኡባይ ቡንቼታናዋ» ያጌዳ።

ጊራ፡ ጊራኔ ኦጋኔ ጊያ ኦሻ
(ማጥ 22:15-22፤ ማር 12:13-17)

19 ሙሴ ሂጊያ ያፊያዋንቴኔ ቁሳቱዋ ካፓቱ ዩሱሲ ሃሳዬዳ ለሚሱ፡ ኡንቴንቴ ቦላን ጌቴቶዋ ኤሮ ዲራው፡ ሄ ሳቲያንካ ኦ ኦይቃናው ኮዬዲኖ። ሺን አሳው ያዬዲኖ።

20 ዩሱሳ፡ ሄ ጋዲያ ሞዲያዎሲኔ ኣ ማታሲ ኣሉዳ ኢማናው ኣ ደናፔ ከሲያ ቃላን ኦይቃናው ኢንጃቲያ ዎዲያ ናጊኖ። ሄዎ ዲራው ጌሻ ማላቲዳ ኦይላናው ዎቺያዎንታ ከቲዲኖ።

21 ሄ ከቲቶዎንቲካ ዩሱሳ፡ «ታማሪሲያዎ፡ ኔኒ ቱማ ዩወዎ ሃሳዩያዎኔ ታማሪሲያዎ፡ ሄዎዲንካ ቃይ ያሳ ኦጊያ ቱማቲላን ታማሪሲያዎኔ ኦሲኔ ዲማዬናዎ ኦኒ ኤሬቶ።

22 ቃሲካ ኡንቲንቲ፡ ሮማ ካቲያ ቁሳሬው ጊራ ጨጋናው ኮሺ ዎይ ኮሺኔ?» ያጊ ኦቺዲኖ።

23 ኢ ቃሲ ኡንቲንቲ ዳሻቲላ ኤሪዳ፡

24 «ኣኔ ታና ኢቲ ዲናሪያ * ቤሲቲ፤ ሄዎ ቦላን ዳዒያ ሚሲሊኔ ፃፊቶዌ ኦና ቤሲ?» ጌዳ።

25 ኡንቲንቲካ፡ «ቁሳሬዎ» ጊዳ ዛሬዲኖ። ኢኔካ፡ «ሄዎ ጊደፔ፡ ቁሳሬዎ፡ ቁሳሬው ኢሚቲ፤ ያሳዎ፡ ያሳው ኢሚቲ» ያጊዳ።

26 ኡንቲንቲካ፡ ኢ ሃሳዩዳ ቃላን ኣሳ ሲንሳን ኦይቃናው ዳንዳዩ ቤይኪኖ። ኣ ዛሩዎን ማላሊቲዳ ጮዑ ጌዲኖ።

ሃይቁዎፔ ዳንዲዎባ ኦሻ
(ማጥ 22:23-33፤ ማር 12:18-27)

27 ሳዲቃዎናቲፔ ኢቲ ኢቲ ዩሱሳኮ ዩዳ፡ ኦሻ ኣው ሺሼዲኖ።

28 ኡንቲንቲካ ዩሱሳ፡ «ታማሪሲያዎ፡ ኢቲ ቢታኒ ማቻቶ ኣኪዳ ናዓ ዩሌናን ሃዩያዎ ጊደፔ፡ ሚሺራቶ ሄዎ ኢሻይ ላታ ኣኪ ናዓ ዩሊዳ ባሬ ኢሻው ዜሬላ ዎላና ማላ ሙሴ ኦሲ ፃፊዳ።

29 ኢቲ ዎዲያን ላፑ ኢሻቲ ዳዒያዎንቲፔ፡ ባይራይ ማቻቶ ኣኪዳ ዩሌናን ሃይቁ ኣጌዳ።

30 ላዔሊያዎካ ኢዞ ላቲዳ።

31 ሄዜንሊያዎካ ቃሲ ኢዞ ኣኩዳ፤ ላፑናቲካ ኢዞ ኣኪዳ ናዓ ዩሌናን ሃይቁዲኖ።

32 ወርሴላን ሚሺራታካ ሃይቃ ኣጋዲ።

33 ሲሚ ላፑናቲካ ሄ ሚሺራቶ ኣኩዳ ዲራው፡ ሃይቁዎፔ ዳንዳዳ ዎዳ፡ ኢዞ ኦሲ ማቺ ጊዳኔ?» ያጊ ኦቺዲኖ።

34 ዩሱሳካ፡ «ሃ ኣላሚያ ናናይ ኣኪኖኔ ኣኩቲኖ።

35 ሺን ሃይቁዎፔ ዳንዲዳ፡ ሲንሳፔ ዩያ ዎዲያን ዳዓናው ቤሲያዎንቲ ኣኪኪኖኔ ኣኩቲኪኖ።

* 20:24 ዲናሪያ፡ ሄዎዳ ሮማ ቢታ ኣሳይ ጎዔቲያ ሚሻ። 20:27 ከት 23:8
20:28 ዛር 25:5

36 ኡንቱንቱ ያሳ ኪታንቻ ማላቲዴ ደዲያ ዲራው፡ ሄዋፔ ሲሚዴ ሃይቁኪኖ። ሃይቁዋፔ ዴንዲያዋንታ ጊዲያ ዲራው ኡንቱንቱ ያሳ ናና።

37 ሙሴ፡ ያሳይ አው ቆንጩዳ ዋራባ ፃፌዳ ታሪኪያ ጋርሳን፡ ጎዳ ያሳ፡ «አብራሃም ያሳ፡ ዪሳቃ ያሳ፡ ያዩቆባ ያሳ» ያጊዴ ያሱሳይ፡ ሃይቃዋንቱ ዴንዲያዋ ቤሴ።

38 ኡባይካ አው ሃይቁ ቤናዋንታ ጊዲያ ዲራው፡ ኢ ሃይቁቤናዋንቱ ያሳፔ አቲን፡ ሃይቆዋንቱዋ ጊዴና» ያጊዴ።

39 ኢቲ ኢቲ ሙሴ ሂጊያ ፃፌዳዋንቱካ፡ «ታማሪሲያዎ፡ ሎዑዋ ሃሳያዳ» ያጊዴኖ።

40 ሃዋፔ ሲሚዴ፡ ኢቱካ አ አቻናው ፃሎዌ ባዋ።

ዩሱሲ ኦኔ ጊያ ኦቫ

(ማት 22:41-46፤ ማር 12:35-37)

41 ሃዋፔ ካላ ዩሱሲ ኡንቱንታ፡ «አሳይ ኪሪሰቶሳ ዋቲ ሩዳዊቲ ናዓ) ያጊኖ?

42-43 ጋሶቴላይኔካ፡ ዳዊቲ ባሬ ሁጴው ማዚሙሬ ማፃፋ ጋርሳን፡

ሳዳይ ታ ጎዳ፡ «ታኒ ኔ ሞርኬቱዋ

ኔ ጊዲያፔ ጋርሳና ዴዓናዳን አላና ጋካናው፡

ታ ኡሼቻን ኡታ» ጊዳ)

ያጊዴ።

44 «ሲሚ ዳዊቲ ኪሪሰቶሳ፡ ሳዳ)፡ ጊዴ ያሲያዋ ጊዶፔ፡ ዋቲ አው ናዓ ጊዳና ዳንዳዪ?» ያጊዴ።

ሙሴ ሂጊያ ታማሪሲያዋንቱፔ ናጌታና ማላ፡ ዩሱሲ ሴሬዳ ሴራ

(ማት 23:1-36፤ ማር 12:38-40)

45 አሳይ ኡባይ ሲሲሺን ባሬና ካሊያዋንቶ፡

46 «ሙሴ ሂጊያ ታማሪሲያዋንቱፔ ናጌቲቴ፤ ኡንቱንቱካ፡ አዲሳ ቃሚሺያ ማዪዴ ዩያናው፡ ጌያይ ዴዲያሳን ቦንቾ ሳርታ አካናው፡ ዋሲያ ጎሌን ቦንቾ ኦይዲያን ኡታናው፡ ሸቤቴዳሳን ቦንቾሳ ኮዪያዋንታ።

47 ሄዋንቱካ አምዓቱዋ ጎሊያ ካሎዪያዋንታ፤ ባሬንታ ቤሳናው ዋሳ አዲሲያዋንታ፤ ኡንቱንታ ኢታ ፒርዳይ ናጌ» ያጊዴ።

21

አምባጊት አምታ
(ማር 12:41-44)

1 ዩሱሲ ጾቁ ጊዬ ፃሊያ ዎዴ፡ ዴሬ አሳይ ጌሻ ጎሊያን አምታ ሺሺያ ሚሻ ጊዶን ባሬንቶ ዴዲያዎፕ ኡንቱንቱ ዩጊያ ዎዴ ቤዔዳ።

2 ቃሲካ አቲ ሂዬሳ አምዔ ሚሺራታ ላዑ ሴምቤሪያ ሂዎን ዩጊያ ዎዴ ቤዔዴ።

3 «ታ ሂንቱው ቱሙዎ ጋይ፡ ሃ ሂዬሳ አምዔ ሚሺራታ፡ ኦፔኔ ዳሩዎ አማዲ።

4 ሃ አሳይ ኡባይ ባሬንቶ ፓላሆዎፕ አሜዲኖ፤ ሺን አዛ ባሬ ሂዬሳቴላ ዎልቃን ባሬው ዴዲያዎ ኡባ አማዲ» ያጌዳ።

ጌሻ ጎሊ ኮሌታናዎ ዩሱሲ ካሴቲዴ ኦዴዳ
(ማት 24:1-2፤ ማር 13:1-2)

5 አ ካሊያዎንቱፔ አቱ አቱ፡ «ጌሻ ጎሊ ሎዖ ሹቻኒኔ ባላ ሸቁዎ አምታን ሎዔዳዎ» ያጊ ሃሳዪያ ዎዴ ዩሱሲ፡

6 «ሃዌ ሂንቱንቱ ቤዔያዌ ኡባይ ኮሌቲናን፡ ሹቻይ ሹቻ ቦላን ኬሌቲዴ አቴና ዎዲ ያናዎ» ያጌዳ።

7 ኡንቱንቱካ፡ «ታማሪሲያዎ፡ ሲሚ ሃዌ ሃናናዌ አዉዴ? ቃሲካ ሃዌ ሃናናው ማላይ አዬ?» ያጊዲ ኦቹዲኖ።

ዩሱሲ ሜቱዎ ዎዲኔ ናሺቻ ዎዲ ያናዎ ኦዴዳ
(ማት 24:3-13፤ ማር 13:3-13)

8 አካ፡ «ኦኒኔ ባሌጮናዳን ናጌቲቲ፤ ጮራ አሳይ፡ «ታኒ ከሪሰቶሳ» ያጊዴ ቃሲካ፡ «ዎዲ ማቴዳ» ያጊዴ ታ ሱጎላን ያናዎንታ፤ ሂንቱንቱ ቃሲ ኡንቱንታ ካሎፕቲ።

9 አላ ዩዉዎኔ አሳ ማካላባ ሲሲያ ዎዴ ዳጋዎፕቲ፤ ሃዌ ኮይሮ ሃናናው ቤሲያዎ ጊዶ ዲራፔ አቲን ዉርሴላይ ቢራ» ያጌዳ።

10 ሂዎፕ ካሊዴ አሳው፡ «አሳይ አሳ ቦላ፡ ካዉቴላይካ ካዉቴላ ቦላ፡ ዴንዳናዎ፤

11 ዎልቃማ ቢታ ቃላይ ሃናናዎ፤ ኮሻይኔ ሃርጊ፡ ዴማ ዴማሳን ሜዲታናዎ፤ ያሺያ ዩዉኔ ኡባካ ዎልቃማ ማላታይ ሳሉዎፕ ሃናናዎ።

12 «ሃዌ ኡባይ ሃናናፔ ካሲያን ቃሲ አሳይ ሂንቱንታ ኦይቃናዎንታ፡ ሜቶላናዎንታ፤ ሂኒ አዪሁዳቱዎ ዎሳ ጎሌ አሳው አሲ አማናዎንታ፤ ቃሾ ጎሌካ ጌሊሳናዎንታ፤ ካታቱዎ ሲንላኒኔ

ሞዲያዎንቱ ሲንሳን ሺሻናዎንታ፤ ሃዌ ኡባይ ታ ሱንሳ ጋሱዋን ሂንቴንታ ጋካናዎ።

13 ሃዌካ ማርካታናው ሂንቴው ሎዎ ቃዳ ገደናዎ።

14 ሃዎ ገደያ ዲራው፣ አይ ዛሩዋ አማኔ ገዴ ኮይሮቲዴ ሂንቴንቱ አንዴቲና ማላ ሃዎ ዎዛና አሏቱ።

15 ኤቁቲያዎንቱ ኡባይ፣ ኤቁታናዉኔ ላካናው ዳንዳዬና ቃላኔ አቶ ጨንጨቱላ ታኒ ሂንቴንቶ አማና።

16 ሂንቴንታ ዩሌዳዎንቱኔ ሂንቴንቱ አሻቱ፣ ሂንቴንቱ ደባቱኔ ሂንቴንቱ ላጌላቱካ አቴናን ሂንቴንታ አሏ አማናዎንታ፤ ሂንቴንቱፔካ አቱዋ አቱዋ ዎቆናዎንታ።

17 ታ ሱንሳ ዲራው አሳ ኡባ ማታን ኢዳቲዳዎንታ ገደኒታ።

18 ዩዉዋን ቃሲ ሂንቴንቱ ሁጲያ ቢናናፔካ አቲናኔ ባዩኩ።

19 ሚኒ ኤቁዴ ሂንቴንቱ ሺዎፑዎ አሺታ።

ዩሱሲ ዩሩሳሌሜ ባዬላባ ኦዴዳ

(ማት 24:15-21፤ ማር 13:14-19)

20 «ዩሩሳሌሜ ኦላ አሳን ዶዴቴዳ ዎዴ፣ ኢዚ ባዬላይ ማቴዳዎ ኤሪቱ።

21 ሄ ዎዴ ዪሁዳን ዴዲያዎንቱ ዴሪያኩ ባቃቲና፤ ካታማን ዴዲያዎንቱ ቃይ ሄዎፔ ኬሲና፤ ባላጋሪያን ዴዲያዎንቱካ ያ ካታማኩ ጌሎፒና፤

22 ያሳ ቃላን ፃፌቴዳዌ ኡባይ ፖሌታናዳን ሃዌ ሃሉዋ ኬሲያ ዎዲያ።

23 ቢታ ቦላን ዎልቃማ ሜቱ ሃናናዎ፤ ሃዲ ዴዲያ አሳ ቦላን ሃንቁ ያናዎ፤ ሄዎ ዲራው ሄዎዲያን ሻሃሮዎንቶኔ ቆንሲያዎንቶ አዬ!

24 አሳይ ኡባይ ማሻን ሃይቃናዎንታ፤ ያሳ ኤሬና ጋዲያ ኡባቱካ ኦሞዲዎን ባናዎንታ፤ ዩሩሳሌሜካ አዪሁዳ ገደናዎንቱ ዎዲ ፖሌታና ጋካናው፣ ኡንቱንቱን ዩዴቴዳዉና ገደናዉኡ።

ኪሪሰቶሳ ላዔሶ ዩሳ

(ማት 24:29-31፤ ማር 13:24-27)

25 «አዎ፣ አጌናኒኔ ያሊንቲያ ቦላ ማላታይ ሃናናዎ፤ አባፔኔ ቤታ ኮሻፔ ዴንዶ ጋሱዋን ቢታ ቦላን ዴዲያ አሳይ ኡባይ ኡንዴታናዎንታ፤ ሂርጋናዎንታ።

21:15 ሉቅ 12:11-12 21:22 ሆስ 9:7 21:25 ኢሳ 13:10፤ ሂዝ 32:7፤
ኢዩ 2:31፤ ሳፅ 6:12፣ 13

26 ሳሉዋ ዋልቃይ ኡባይ ቃዲያ * ዲራው አሳይ ያሻኒኔ አላሚያ ቦላ አዬ ያናዌሻ ያጊዳ ናጉዋን ዳቡራናዋንታ።

27 ሄ ዋዴ አሳ ናዓይ ዋልቃኒኔ ዋልቃማ ቦንቹዋን ሻሪያን ዪያ ዋዴ ቤዓናዋንታ።

28 ሂንቴንቱካ፥ ሃ ዬዉ ፖሌቱሳ ዶሚያ ዋዴ፥ ዋዙ ማቶ ዲራው ሲቲ ጊዴ ኤቂቴ፤ ፑዴ ዶቁ ጊዴ ፃሊቱ» ጌዳ።

ባላሲያ ጌቴቲያ ሚላ ለሚሱዋ

(ማጥ 24:32-35፤ ማር 13:28-31)

29 ካሊዳካ፥ ሃዋ ያጊ ለሚሱዋ ኦዴዳ፥ «ዋዴንላፔኔ ሃራ ሚላ ኡባፔ ፃሊቱ፤

30 ሃይሳይ አጪና ቤዒያ ዋዴ፥ ሄ ዋዴ ቦኒ ማቴዳዋ ሂንቴንቱ ኤሪታ።

31 ሄዋዳንካ ቃሲ ዬዋቱ ፖሌቲያዋ ቤዒያ ዋዴ፥ ያሳ ካዉቴላታ ማቴዳዉና ኤሪቱ።

32 «ታኒ ሂንቴው ቱሙዋ ጋይ፤ ሃዌ ኡባይ ፖሌታና ጋካናው ሃ ዬሌታይ አዴና።

33 ሳሉኔ ሳዓይ አዳና፤ ሺን ታ ቃላይ አዴና።

34 ሲሚ ዛዋይ ባይና ዴዑዋን፥ ኡሻ ዳሩዋኔ ዴዑዋባን ኡንዔቲሺን ሂንቴንቱ ዋዛናይ ለፔናዳኒኔ ሄ ጋላሳይ ጲሪያዳን ቆፔናን ሂንቴና ጋኬናዳን ናጌቲቴ፤

35 ሃዌ ቤታ ኡባን ዴዒያዋንቱ ኡባቱዋ ቦላን ጋካናዋ።

36 ሲሚ ዪያ ኢታባ ኡባፔ ሂንቴንቱ አታናዳኒኔ አሳ ናዓ ሲንላንካ ኤቃናው ዳንዳያና ማላ፥ ኡባ ዋዴ ሚኒ ዋሲቱ» ያጌዳ።

37 ዬሱሲ ጋላሲ ጋላሲ ጌሻ ጎሊያን ታማሪሲዴ፥ ቃማ ቃማ ዴብሪ ዛይቱ ያጌቲያ ዴሪያኮ ኬሲዴ አቁ።

38 አሳይ ኡባይ አ ሲሳናው ጉራን ያ ጌሻ ጎሊያ አኮ ዪና።

22

ኪሪስቶስ ዋዳናው ማቂቴዲና

(ማጥ 26:1-5፤ ማር 14:1-2፤ ዮሀ 11:45-53)

1 ፓሲጋ ጌቴቲያ ማጋጌ ኡኪላ ሚያ ባላይ ማቴዳ።

2 ቁሳቱዋ ካፓቱኔ ሙሴ ሂጊያ ፃፊያዋንቱ ዬሱሳ ዋቲ ዋዳኔንቶ፥ ዋዲያ ኦጊያ ጌማን ኮዪና፤ ሺን አሳው ያዪና።

* 21:26 ሳሉዋ ዋልቃይ ኡባይ ቃዴ፥ ሃዋ ጉሳይ፥ ቤኒ ዋዴ አሳይ፥ ሳሉዋን ዴዒያ ያለጋቲ ኡባይ አያና ዋልቃና ዴዒ ጊዴ ቆፔ። 21:27 ዳን 7:13፤ ሳፅ 1:7 22:1 ኬስ 12:1-27

3 ያላሂካ ታማኔ ላዑ ካሊያዋንቱ ኢቱዋ ጊዳዳ አስቆሮቱ ዪሁዳን ጌሌዳ።

4 እካ ቢዳ፣ ዩሱሳ ዋቲ አሌ ኢማኔንቶ ቄሳቱዋ ካፓቱዋና ኔቫ ጎሊያ ናጊያዋንቱ ካፓቱዋና ኢቲፔ ሃሳዬዳ።

5 ኢንቱንቱካ ናሼቲዳ፣ ሚሻካ ዪሁዳው ኢማናው ወሌቲዲኖ።

6 እካ ኤዮ ጌዳ፤ አሳይ ባይና ሳን ዩሱሳ አሌ ኢማናው ኢንጃቲያ ዋዲያ ኮዬ።

ዩሱሲ አዪሁዳቱዋ ፓሲጋ ማናው ጊጌቲዳ

(ማት 26:17-25፤ ማር 14:12-21፤ ዮሀ 13:21-30)

7 ማጋጌ ኡኪሳ ሚያ ባላ ቦንቺያ ዋዲ ጋኬዳ፤ ሄ ዋዲካ ፓሲጋው ደርሳ ሹካናው ቤሲያ ዋዲያ።

8 ዩሱሲ ጳጳርሳኔ ዮሃንሳ፣ «ፓሲጋ ቁማ ኑኒ ማናዳን ቢዳ ጊጊሲቲ» ጊዳ ከቲዳ።

9 ኢንቱንቱካ ዛዕዳ፣ «ሃቃን ጊጊሳናዳን ኮያይ?» ያጊ ኦቼዲኖ።

10 እካ፣ «ሂንቲንቱ፣ ካታማ ጌሊያ ዋዳ ኦቱዋና ሃላ ቶኬዳ ቢታኒ * ሂንቲንቱና ጋኬታናዋ፤ ኢ ጌሊያ ጎሊያ አ ካሊዳ ጌሊቲ፤

11 ሄ ጎሊያዋካ፣ ሩታማሪሲያዌ ኔና፣ «ታኒ፣ ታና ካሊያዋንቱና ኢቲፔ ፓሲጋ ቁማ ሚያ ኢማላ ከፊሊ ሃቃ ባገና ዴዒ?» ያኔ ጌቲ።

12 ሄ ቢታኒካ ፖቂያ ቦላን ዴዒያ ሂጃቲ ኡቲዳ አኮ ከፊሊያ ሂንቲንታ ቤሳናዋ፤ ሄዋኒካ ሳዓ ጊጊሲቲ» ያጌዳ።

13 ኢንቱንቱ ቢዳ፣ ዩሱሲ ጎዋዳንካ ቢታኒያ ዴሚዳ ፓሲጋ ቁማ ጊጊሴዲኖ።

14 ፓሲጋ ቁማይ ሚቲቲያ ሳቲ ጋኮ ዋዳ፣ ታማኔ ላዑ ከቲቶዋንቱና ኢቲፔ ቁማ ማናው ኡቲዳ።

15 እካ፣ «ታና ሜቲ ጋካናፔ ካሲያን ሂንቲንቱና ሃ ፓሲጋ ቁማ ማናው ዳር አዋታዳ ዴዒይ።

16 አዪሲ ጎፔ፣ ታ ሂንቲው ኡዲያዌ፣ ሃዌ ያሳ ካወቲላን ፖሌታና ጋካናው ታኒ ላዒሉዋ ሃዋፔ ሚኬ» ያጌዳ።

17 ፀዓ አኪዳ፣ ያሳ ጋላቲዳ፣ «ሃዋ ሄይቲ፣ ሂንቲንቱ ጊዲዋን ጊሼቲ ኡሼቲ።

18 አዪሲ ጎፔ፣ ታ ሂንቲንቶ ያጋይ፣ ያሳ ካወቲላይ ያና ጋካናው፣ ሃቼፔ ዶማዴ ዋዪኒያ ኤሳ ኡሼኬ» ያጌዳ።

* 22:10 ሃላ ቶኬዳ ቢታኒ፣ ሄ ዋዳ ሄ ጋዴን አሳ ጎሊን ከቲቲያ አቱማ ቆማይ ሃላ ቶኮፔ፣ ሄ ጎሊ ዴሬ ጊዲያዋ ቤሲ።

19 ቃሲ ማጋጌ ኡኪላ አኪዳ፣ ያሳ ጋላቴዳ፤ ሄ ኡኪላ ማንሴ ኡንቱንቶ አሚዳ፣ «ሃዌ ሂንቱንቶ አሜቲያዌ ታ አሹዋ፤ ሃዋን ታና ቆጋና ማላ ሃዋ ሚቱ» ያጌዳ።

20 ካዉዋ ሞዋፔ ጉዪያን፣ ካሴዋዳን ፀዓ ዴንሴ ኡንቱንቶ አሚዳ፣ ሃዋዳን ያጌዳ፣ «ሃ ፀዓይ፣ ታ ሂንቱንቱ ዲራው ጉሲያ ታ ሱላ ቆፔሴያ ኦራላ ጫቁዋ።

21 ሺን ቤዒቱ፣ ታና አሴ አሚናው ዴዒያ ቢታኒ ጋዪታን ታናና አቲፔ ሚ።

22 አያው ጎፔ፣ ታኒ አሳ ናዓይ ያሳይ ጎዋዳን ባይ፤ ሺን ታና አሴ አሚያ ኦራው አው አዬ» ያጌዳ።

23 ኡንቱንቱ ጊዶፔ ሄዋ አላናው ዴዒያዌ ኦና ጊዳኔንቶ፣ ባሬንቱ ጊዶን ኦሻ ደሚዲና።

ኡባፔ አዲያዌ ኦኔ? ያጊያ ኦሻ

24 ቃሲ ባሬንቱ ጊዶፔ ኦኒ አዲንቶ ያጌቲያ ፓሉማይ ኡንቱንቱ ጊዶን ኬሴዳ።

25 ዬሱሲ ኡንቱንታ ያጌዳ፣ «ሃ አላሚያ ሞዲያዋንቱ ባሬንቱ አሳ ቦላ ጎዳቲና፤ ኡንቱንታ ሞዲያዋንቱ ከካቱዋ ጌቲቲና።

26 ሺን ሂንቱንቱ ሃዋዳን ሃናፒቲ፤ ዬዉዋን ቃሲ ሂንቱንቱፔ ጶቃ ጊዴዳዌ ሂንቱ ኡባፔ ጉዲያዋ፤ ሂንቱንታ ሞዲያዌካ፣ ሂንቱንቶ ቆማዳን ሃና።

27 «ቁማ ማናው ኡቴዳዋፔኔ ቁማ አሳው አሴያዋፔኔ ኦኒ ቦንቹቲ? ቁማ ማናው ኡቴዳዋ ጊዴኔ? ታኒ ቃሲ ሂንቱንቱ ጊዶን ቁማ አሴያ ቆማ ማላ።

28 ቃሲ ታኒ ፓጩቲያ ዋዲያን ሂንቱንቱ ታናና አቲፔ ሚኒ ኤቄዳዋንታ።

29-30 አ ካዉቲላ ኦይዲያን ኡታና ማላ ታ አቡ ታና ሱንሐዋዳን፣ ታኒ ቃሲ ታ ካዉቲላን ታ ጋይታፔ ማናዲኔ ኡሻናዳን፣ ታማኔ ላዑ ኢሰራዔሊያ ያራቱዋ ቦላ ፒርዲዳ፣ ካዉቲላ ኦይዲያን ኡታና ማላ ሂንቱንታ ሱንላዲ» ያጌዳ።

ጳዲሮሲ ካዳናዋ ዬሱሲ ካሴቲዳ ኦዴዳ (ማት 26:31-35፤ ማር 14:27-31፤ ዮሀ 13:36-38)

31 ጎዳይ፣ «ሲሞና፣ ሲሞና፣ ታኒ ኦዲያዋ ሲሳ፤ ፃላሂ ሂንቱንታ አሳይ ዛርጋ ሃልዒያዋዳን፣ ሃልዒናው ያሳ ዋሴዳ።

32 ሺን ታኒ ኔ አማኑ ባዬናዳን ኔ ዲራው ጋናታዲ። ኔኒ ታኮ ሲሚያ ዋዴ ኔ ኢሻቱዋ ሚኒሳ» ያጌዳ።

22:20 ማት 26:26-28፤ ማር 14:22-24፤ 1ቆር 11:23-25 22:26 ማት 23:11፤ ማር 9:35

33 ሲሞኒ ዛሬዳ፡ «ጎዳው፡ ታኒ ኔናና ቃሼታናወኔ ኔናና ኢቲፔ ሃይቃናው ገጋ ኡታዲ» ያጌዳ።

34 ዩሱሲ ቃሲ፡ «ዴደርሳ፡ ታኒ ኔው ያጋይ፤ ሃቹ ቢላሃያን፡ ኩቱ ዋሳናሲ ሄዙ ጌዳ ታና ኔኒ፡ ላ ታኒ ኤሪኮ» ጋዴ ካዳናሳ» ያጌዳ።

35 ዩሱሲ ባሬና ካሊያዋንቶ፡ «ኮሮጂ፡ ቃርጨቲኔ ጫማይ ባንታን ታኒ ሂንቲንታ ከቶ ዎዴ፡ ሂንቲንቶ ኢቲባይ ፓጮዌ ዴዲ?» ያጌዳ።

ኡንቱንቱካ፡ «ኢቲ ባይኔ ኮሲ ፓጪ ቤና» ያጌዲና።

36 ኢካ ዛሬዳ፡ «ሃሲ ቃሲ ኮሮጂ ዴዲያዌ ኣኪ ቦ፤ ቃርጨቲ ዴዲያዌካ ሄዋዲን ኡዶ፤ ባይናዌ ቃይ ባሬ ማዩዋ ዛሊዲዴ ማሻ ሻሞ።

37 ኣያው ጎፔ ታ ሂንቲው ያጋይ፡ ላዌ ማካላንቻቱና ኢቲፔ ፓይዳቲዳ» ያጌቲ ያሳ ማፃፋን ፃፊቲዳዌ፡ ታናን ፖሌቴናን ኣቲና። ኤ፡ ታው ጌቲቲዳዌ ሃሲ ፖሌታናዋ» ያጌዳ።

38 ኣ ካሊያዋንቱ፡ «ጎዳው፡ ሃዋን ላዑ ማሻይ ዴዴ» ያጌና ኢካ፡ «ሄዌ ጌዳናዋ» ያጌዳ።

ዩሱሲ ዳብሬ ዛይቲ ዳሪያን ዎሴዳ

(ማጎ 26:36-40፤ ማር 14:32-42)

39 ዩሱሲ ካታማፔ ኬሲዳ፡ ሃራ ጋላሲ ቢያዋዲንካ ዳብሬ ዛይቲ ቤዳ። ቃሲ ኣ ካሊያዋንቱካ ኣ ጌዲዋ ቤዲና።

40 ሄ ሳዓ ጋኪዳ፡ «ፓጪያን ሂንቲንቲ ጌሌናን ኣታና ማላ፡ ዎሲቱ» ያጌዳ።

41 ሹቻ ኦሊና ጋኪያሳ ኬና ኡንቱንቱፔ ሃኪ ቤዳ። ጉልባቲዳ፡

42 «ታ ኣቦ፡ ኔኒ ኮዪያዋ ጌዶፔ፡ ሃ ሜቱዋ ፀዓ ታፔ ዲጋ፤ ሺን ታ ሸኔ ጌዶፖ፤ ኔ ሸኔ ጌዶፔ ኣቲን» ያጌዴ ዎሴዳ።

43 ሳሉዋፔ ዪዴ ሚኒሲያ ኪታንቻይ ኣው ቤቲዳ።

44 ባሬ ዎዛና ጌዶን ሴሌቲዳ፡ ዳሪ ዎሴዳ። ኢ ጫዎቲያ ጫወካ ሳዓ ቦላን ያኪያ ሱላ ማላቲዳ።

45 ዎሳፔ ዴንዲዳ፡ ባሬና ካሊያዋንቱኮ ጉዬ ቤዳ፡ ኡንቱንቲ ዳርፔ ቃሬቲዳ ዲራው፡ ዳቡሪዳ ጌሚዲሸዋንታ ፃሊዳ፡

46 «ኣያው ጌሚዲሸቲ? ፓጪያን ጌሌናዲን ዴንዲ ዎሲቱ» ያጌዳ።

ዩሱሲ ባሬ ዋርኬቱዋ ኩሺያን ኦይቄቲዳ

(ማጎ 26:47-56፤ ማር 14:43-50፤ ዮሀ 18:3-11)

47 ዩሱፊ ሄዋ ሃሳይ ዳዒሺን፣ ጮራ አሳይ ዩዲኖ። ታማኔ ላዑ ኣ ካሊያዋንቱ፤ ኢቱዋ ጊዳዳ ዪሁዳ ጌቲቲያዌ ሄ አሳ ካሊሊዳ ዩራናው ዩሱሳኮ ሸቄዳ።

48 ዩሱፊ ቃይ፡ «ዪሁዳው፣ ኔኒ ታና አሳ ናዓ ዩራዳ አላ ኢማይ?» ያጌዳ።

49 አ ዩሹዋን ዳዒያ አ ካሊያዋንቱ ሃኔቲያ ዩወዋ ቤዖ ዎዴ አ፡ «ጎዳው፣ ሃ አሳ ኑኒ ማሻን ቃንፃኔ?» ያጌዲኖ።

50 ኢንቱንቱ፤ ኢቱ፣ ቄሳቱዋ ኡባቱዋ ካፑዋ ቆማ ሸጪዳ፣ አ ኡሹቻ ሃይላ ቃንፃ ኦሌዳ።

51 ዩሱፊ ቃይ ዛሪዳ፡ «አጌቱ፣ ባሸቲ» ያጌዳ። ቢታኒያ ሃይላካ ቦቺዳ ፓሌዳ።

52 ዩሱፊካ ባሪኮ ዩዳ ቄሳቱዋ ካፓቶ፣ ጌሻ ጎሊያ ናጊያዋንቶ፣ ሱንላቱዋሲኔ ጋዲያ ጪማቶ፣ «ፓኑዋ ኦይቂያዋዳን ማሻኔ ፃምዓ ኦይቂዳ ዪቱ?»

53 ጌሻ ጎሊያን ታኒ ጋላሳን፣ ጋላሳን ሂንቱንቱና ዳዒያ ዎዴ፣ ታና ኦይቂቤይኪታ፤ ሺን ሃዒ ሃዌ ሂንቱንቱ ዎዴኔ ቋማ ዎልቃ ዎዴ» ያጌዳ።

ጳዕረሲ ዩሱሳ ካዳዳ
(ማጥ 26:57-58፣ 69-72፤ ማር 14:53-54፣ 66-72፤ ዮሀ 18:12-18፣ 25-27)

54 ዩሱሳ ኦይቂ ቃቺዳ፣ ቄሳቱዋ ኡባ ካፑዋ ጎሌ አፊዳ ጌሊሴዲኖ። ጳዕረሲካ ኢንቱንቱ፤ ጉዬ ሃኩዋን ኢንቱንቱ ጌዲዋ ካሌ።

55 ዲርሳ ጊደን ታማ ኤሊዳ፣ ኢቲ፤ ኡቲ ዳዒሺን፣ ጳዕረሲ ኢንቱንቱ ጊደን ዪዳ ኡቲ አጌዳ።

56 ታማይ ፖዒያ ባጋና ጳዕረሲ ኡቲዳ ዳዒሺን፣ ኢቲ አሸካራታ ሎይላ ፃላዳ፡ «ሃዌካ አናና ኢቲ፤ ዳዒ» ያጋዲ።

57 ጳዕረሲ ቃይ፡ «ሃኔ ሚሺራ፤ ታኒ አ ኤሪኬ» ያጊ ካዳዳ።

58 ጉላ ዎዲያ፤ ጉዪያን፣ ሃራ ቢታኒ ጳዕረሳ ቤዒዳ፡ «ኔኒ ኢንቱንቱና ጋሶ ዳዒ» ያጊና፤

ጳዕረሲ ቃሲ፡ «ሃዎ ቢታኔው፣ ታኒ አናና ጋሶ ዳዒኬ» ያጌዳ።

59 ኢቲ ሳቲ ጊዲያዋ ጋሚዒዳ ሃራ ቢታኒ ቆንጪሲዳ፡ «ኢ ጋሊላ ጋዴ አሳ ጊዲያ ዲራው፣ ሃ ቢታኒ አናና ኢቲ፤ ዳዒያዎ ቱማ» ያጌዳ።

60 ጳዕረሲ ቃሲ፡ «ሃ ቢታኔው፣ ኔኒ ጊያዌ አዩንቶ ታኒ ኤሪኬ» ያጌዳ። ሄ ዎዲያን ኢ ቢርካ ሃሳይ ዳዒሺን፣ ኤሌካ ኩቱ ዋሲ አጌዳ።

61 ጎዳይ ጉዬ ሲሚዳ፣ ጳጳሮሳ ጭሎዳ። ጳጳሮሲ ጎዳይ ባሬና፣ «ሃቼ ኩቱ ዋሳና ጋካናው፣ ሄዙ ጌዳ ታና ካዳናሳ» ጌዳ ጎዳ ቃላይ አው ቆፊቲ አጌዳ።

62 ጳጳሮሲ ዲርሳፕ ካሬ ኬሲዳ፣ ሴሌቲዳ ዩኩዳ።

63 ዩሱሳ አይቄዳ አሳይ ቂሊጪኖኔ ሾጪኖ።

64 አ አይፊያ ጎዚ ባቂዳ፣ «ኔና ባቂዳዌ እኔ? ናቢያ ጊዶፕ ኔና ዴቻዋ እኔ አዳ» ያጊዳ አ ኦቼዲኖ።

65 ቃሲ አ ሃራ ጮራ ቦሪያ ቦሬዲኖ።

ዩሱሳ ፐርዳው አፌዲኖ

(ማጥ 26:59-66፤ ማር 14:55-64፤ ዮሀ 18:19-24)

66 ሳባይ ዋንቲና ጋዲያ ጪማ አሳቱ፣ ቄሳቱዋ ካፓቱኔ ሙሴ ሂጊያ ታማሪሲያዋንቱ፣ ዩሱሳ ባሬንቱ ሸቄዳሳ አፊዳ።

67 «ከሪሰቶሲ ኔኔ? እኔ ኑ አዳ» ያጌዲኖ።

ሸን አ፣ «ታኒ ሂንቱንቶ አደፕ ታና አማኒኪታ፤

68 ቃሲ ሂንቱንታ ታኒ ኦቾፕ አዲኪታ፤ ዋይ ቃሹዋፕ ታና ቢሊኪታ።

69 ሸን ሃ ሳቲያፕ ዶማን ታኒ አሳ ናባይ፣ ሃባፕ ዶማዳ፣ ዋልቃማ ያሳ ኡሸቻ ባጋና ኡታና» ያጌዲኖ።

70 ኡንቱንቱ ኡባይ ዩሱሳ፣ «ያቲና ኔኒ ያሳ ናባ?» ያጌዲኖ።

አካ ዛሬዳ፣ «ታኒ ያሳ ናባ ጊዶዋ ሂንቱንቱ ሃሳዬዲታ» ያጌዲኖ።

71 ኡንቱንቱካ፣ «ኑኒ ኑ ሁጳው አ ዶናፕ ሲሴዶ፤ ሃዋፕ ሲንሳው አይ ማርካ ኮሺ?» ያጌዲኖ።

23

ጲላዎሲ ዩሱሳ ኦቼዳ

(ማጥ 27:1፣ 2፣ 11-14፤ ማር 15:1-5፤ ዮሀ 18:28-38)

1 ሄዋን ሸቄዳ ኡባቱካ ኢቲፕ ዴንዲዳ፣ ዩሱሳ ጲላዎሳኮ አፌዲኖ።

2 ኡንቱንቱካ፣ «ሃቢታኒ ኑ አሳ ባሌሊዳ፣ አሳይ ሮሜ ቢታ ካወዋ ቄሳራው ጊራ ኢሜና ማላ ዲጊዳ፣ ቃሲ፣ «ታኒ ካቲያ» ያጊሺን ዴማዶ» ያጊዳ ሞቱዋ ዶማዲኖ።

3 ጲላዎሲካ ዩሱሳ፣ «ሃዋ፣ አዪሁዳቱዋ ካቲ ኔኔ?» ያጊዳ ኦቼዳ።

ዩሱሲ ዛሬዳ አ፣ «ኔኒ ጋ ዴባሳ» ያጌዲኖ።

4 ጲላዎሲ ቄሳቱዋ ካፓቱዋሲኔ አሳሲ አዲዳ፣ «ታኒ ሃ ቢታኒያ ቦላን አይኔ ኢታ ኦሱዋ ዴማ ቤይኬ» ያጌዲኖ።

5 ጊደፔ አቲን ኡንቲንቲ፥ «ሃ ቢታኒ ጋለላፔ ደሚዳ፥ ሃሪይ አቶ ሃዋ ጋካናዉካ፥ ዪሁዳ ጋዲያ ኡባ ባሬ ቲሚርቲያን ቃሉዴ ዴዔ» ያጊዴ ሚኒሲ ኦዴዲኖ።

ዩሱሲ ሄሮዲሳ ሲንላ ሺቄዳ

6 ጲላዖሲካ ሃዋ ሲሲዴ፥ «ኢ ጋለላ ኣሴ?» ያጊዴ ኤራናው ኦቼዳ።

7 ጲላዖሲ ሄሮዲሴ ሞዲያ ጋዲያፔ ዩሱሲ ዩዳዋ ኤሬዳ ዎዴ፥ ሄሮዲሴካ ቃይ ሄዎዲያን ዩራሳላሚን ዴዒያ ዲራው፥ አኮ ዩሱሳ ዩዴዳ።

8 ሄሮዲሴ ዳር ዎዲያፔ ደሚዴ ዩሱሳ ቤዓናው አሞቲ ዴዒያ ዲራው፥ አ ቤዔዳ ዎዴ ዳርፔ ናሼቲዳ። ዩሱሳ ዋሪያ ሲሴዳዋ ዲራው፥ ኢ ኦራላባ አሊሺን ቤዓናው ሂደታን ጋሚዔዳ።

9 ሄሮዲሴ ዩሱሳ ዳርባ ኦቼዳ፤ ሺን ዩሱሲ አው ኣያኔ ዛሪቤና።

10 ቄሳቲዋ ካፓቲኔ ሙሴ ሂጊያ ታሚሪሲያዋንቲ ሄዋን ኤቂዴ፥ ዩሱሳ ሎይሊ ሞቲዴ ዴዒኖ።

11 ሄሮዲሴኔ አ ዎታዳራቲ ዩሱሳ ካዲዴ፥ አ ቦላ ቂሊጩዲኖ። ቦንቼቲዳ ማዩዋ አ ማዩዚዴ፥ ጲላዖሳኮ ዛሪዴ ዩዴዲኖ።

12 ሄሮዲሴኔ ጲላዖሲ ሃዋፔ ካሴና ሞርኪያን ዴዒኖ፤ ሺን ሄ ጋላሲ ሲጌቲዲኖ።

ዩሱሳ ሃይቃና ማላ ሞቲዲኖ

(ማጥ 27:15-26፤ ማር 15:6-15፤ ዮሀ 18:39-19:16)

13 ጲላዖሲ ቄሳቲዋ ካፓቲዎ፥ አዪሲያዋንታኔ ሃራ ጮራ አሳ ኢቲፔ ያሲዴ።

14 ሃዋዲን ያጌዳ፥ « ሃ ቢታኒ አሳ ማካላቲላው ዴንሌሌ፥ ያጊዴ ታኮ አሄዲታ፤ ታካ ሂንቲንቲ ሲንላን ቢዳ ያላዴ፥ ሂንቲንቲ ሺሼዳ ሞቲዋን ኢቲ ባላኔ አ ቦላን ዴማ ቤይኬ።

15 ቃሲ ሄሮዲሴካ አ ቦላን ኣይኔ ዴሚቤና ዲራው፥ ሃ ኑኮ ዛሪ ዩዴዳ፤ ሂንቲንቲ ቤዒያዋዲንካ፥ ሃቢታኒ አ ሃይቆ ጋሊያባ ኣይኔ ኡዲቤና።

16 ሃዋ ዲራው ታኒ አ ሙራዴ ቢላና» ያጌዳ።

17 *

18 አሳይ ኡባይ ኢቲፔ ጊዲዴ፥ «ሃ ቢታኒያ ያ ዲጋ! ባርባና ጊያ ዩሱሳ ኑሲ ቢላ!» ያጊዴ ጫቦቲዲኖ።

* 23:17 ሃ ፓይዳ፥ «ጲላዖሳው ፓሲጋ ባላ ቦንቼዋ ጋላሳን ኢቲ ኡራ ቃሹዋፔ ቢሊያ ደያይ ዴዔ» ያጌ። ሺን፥ ዳውሮሉዋ ጌሻ ማፃፋ ኦራላ ጫቁዋ ጊዲዋን ሃ ፓይዳ ዓፊቲ ቤና ጋሱ፥ ሃራ ጌሻ ማፃፋቲዋ ቢሊላቲዋን ኡባቲዋንካ ዓፊቲ ቤና ዲራሳ።

19 ባርባን ካታማን ዋላሳ ዳንሴዳ፣ አሳ ዋጆዳ ዲራው፣ ቃሼቴዳዎ።

20 ጲላጾሲ ዬሱሳ ቢላናው ኮዪዳ፣ አሳው ላዔሱዋ ጉጂዳ ሃሳዬዳ።

21 ሺን ኡንቱንቱ፣ «ማስቃሊያ ቦላ ሚሲማሪያን ጂሻዳ ካቃ! ካቃ!» ያጊ ዋሴዲኖ።

22 ጲላጾሲካ ሄዜንሱዋ ኡንቱንታ፣ «አያው? ሃቢታኒ ኦሴዳ ኢታ ኦሱ አዬ? ታኒ አ ሃይቆ ጋሴያ ናቁዋ አይኔ አፔ ዳማቤይኬ፤ ሃዋ ዲራው፣ አ ሙራዳ ቢላ ዬዳና» ያጊዳ።

23 ሺን ኡንቱንቱ ባሬንቱ ኮሻ ጶቁ ኦሴዳ፣ ካቁታናዳን ዳሪ ዋሴዲኖ። ኡንቱንቱ ዋሱካ ጲላጾሳ ቆፋ ላሜዳ።

24 ሃዋ ዲራው፣ ጲላጾሲካ ኡንቱንቱ ኦሻይ ሲማናዳን ዬሱሳ ቦላን ፒርዳዳ።

25 አሳ ማካላው ዳንሴዳይኔ ሸምፑዋ ዋጂዳ፣ ቃሼቴዳ ቢታኒያ ቢሌታናዳን ኡንቱንቱ ዋሶ ዲራው፣ ሄ ቢታኒያ ቢሌዳ። ሺን ዬሱሳ ባሬንቱ ሸኒያዳን ኮዮዋ ኦላና ማላ፣ አሴ ኢሜዳ።

ዬሱሲ ማስቃሊያን ካቁቴዳ
(ማት 27:31-44፤ ማር 15:21-32፤ ዮሀ 19:17-27)

26 ዬሱሳ ኦይቂ አፊዳ ዳዒሺን፣ ሲሞና ጌቴቲያ ቄሬና ቢታኒ ሄራፔ ዪዳ ዳዒሺን ዳሚዳ፣ ማስቃሊያ ቶሲዳ ዬሱሳና ባና ማላ ኡዳዲኖ።

27 ዳር ጮራ አሳይኔ ዬኪያ ማጫዋንቱ ጉዬና ካሊኖ።

28 ዬሱሲ ጉዬ ሲሚዳ ኡንቱንቶ፣ «ሂንቴኖ፣ ዬሩሳላሜ ማጫዋንቶ፣ ሂንቴንቱ ሁጳውኔ ሂንቴንቱ ናናው ዬኪቴፔ አቴን፣ ታው ዬኮፒቴ፤

29 «ማንላ ጊዳዳዋንቱኔ ዬሊቤና ኡሉ፣ ቋንሴቤና ቋንላይ፣ አንጃቴዳዋንታ» ጌቴቲያ ዋዲ ያናዋ።

30 ሄ ዋዲያን፣ «ዘዛቶ፣ ኑ ቦላ ዋዲቴ፤ ዙኩላቴዋካ፣ ኑና ቆሲቱ» ያጋኒታ።

31 ሲሚ ቃዬ ሚላን ሃዋዳን ሃኖፔ፣ ሜላ ሚላን ዋናናቁ?» ያጊዳ።

32 ዬሱሳና ኢቴፔ ካቁታና ማላ፣ ኢታ ኦሱዋ ኦሴዳ ሃራ ላዑ አሳቴዋካ አፊዲኖ።

33 ቄራኔው ጌቴቲያን ጋኬዳ ዋዲያን፣ ዬሱሳ ካቁዲኖ። ኢታ ኦሶዋንታካ፣ ኢቴዋ ኡሸቻና፣ ዮኩዋ ሃዲርሳና ካቁዲኖ።

34 ዮሱሲ፡ «ታ ኣቦ፡ ኡንቱንቲ ባሬንቱ ኦሊያዎ ኤሬና ዲራው፡ ኡንቱንቱ ናጋራ ኣቶ ጋ» ያጌዳ።

ኡንቱንቱካ ኣ ማዩዎ ሳማ ዩጌቲዳ ገሺቲ ኣኩዲኖ።

35 ኣሳይ ኤቂ ያሊሺን፡ ጋዲያ ሞዲያዎንቱ፡ «ሃራንታ ኣሺ፤ ያሳን ደሬቲዳ ኪሪሰቶሲ ኣ ገደፔ፡ ኣኔ ባሬ ሁጲያ ኣሺኔ?» ያጌዳ ቂሊጩዲኖ።

36 ቃሲ ዎታዳራቱካ ሺቂዳ ቂሊጩዲኖ፤ ጨሚዳ ዎዪያ ኤሳ ኣው ኣሂ ኢሚዳ።

37 «ሃዎ፡ ኔኒ ኣዩሁዳ ካቲያ ገደፔ፡ ኔ ሁጲያ ኣሻ!» ያጌዲኖ።

38 ሁጲሳናካ፡ «ሃዌ ኣዩሁዳ ካቲያ» ያጌያ ዓፋዎ ዓፊዲኖ።

39 ኢታ ኦሊዳ ካቂቲዳዎንቱፔ ኢቱ፡ ቦሪዲኔ ቶቹዳ፡ «ሃዎ ኔኒ ኪሪሰቶሳ ገዲኪ? ኣኔ ኣ ገደፔ፡ ኔ ሁጲያኔ ኦና ኣሻ» ያጌዳ።

40 ዮኩ ቃይ ኣ፡ «ኔኒ ሃዎ ማላቲያ ፐርዳ ቦላ ዳዓዳካ ያሳው ያዩኪ?»

41 ኔኒ ኪቲቲዳ ባላን ሙራ ኣኪዳ ዳዔቶ፤ ኦሲ ቤሲያ ሙራ ቦላን ዳዔቶ፤ ሺን ሃ ቢታኒ ኢቲ ኢታባኔ ኦሊቤና» ያጌ ዛሬዳ።

42 ኢ ዮሱሳ፡ «ኔኒ ኔ ካዉቲፋ ዎልቃን ዪያ ዎዳ፡ ታና ቆፓ» ያጌዳ።

43 ዮሱሲካ፡ «ታኒ ኔው ቱሙዎ ኦዳይ፡ ሃቹ ታናና ኢቲፔ ጋናቲያን ዳዓናሳ» ያጌዳ።

ዮሱሳ ሃይቁዎ

(ማጥ 27:45-56፤ ማር 15:33-41፤ ዮሀ 19:28-30)

44 ሄ ዎዳ ኡሱቱን ሳቲ ገዲያ ከና፤ ሄዎፔ ኡዱፔ ሳቲያ ጋካናው፡ ቢታ ኡባ ቦላን ቋማ ገዳዳ።

45 ኣዎይካ ባሬ ፖዑዎ ዲጌዳ፤ ጌሻ ጎሊያ ጋሪዱካ ፔዴቲዳ ላዑዎ ከሴዳ።

46 ዮሱሲካ ዳር ቶቂ ጌዳ ቃላን ዎሲዳ፡ «ታ ኣቦ፡ ታኒ ታ ሸምፑዎ ኔ ኩሺያን ኣላ ኢማይ!» ያጌ ሲሞዎፔ ጉዪያን ኢ ሃይቂዳ።

47 ዪቱዎ ካፑ ሃኔዳ ዩወዎ ቤዔዳ ዎዳ፡ «ሃ ቢታኒ ቱማካ ዪሎ ኣሳ» ያጌዳ ያሳ ጋላቲዳ።

48 ሃዎ ቤዓናው ኢቲሳ ሺቂዳ ኣሳይ ኡባይ ሃኔዳ ዩወዎ ቤዒዳ፡ ባሬንቱ ቲራ ባቂዳ ሲሚዲኖ።

49 ዮሱሳ ኤሪያ ኣሳይ ኡባይኔ ጋለላፔ ደሚዳ ኣ ካሌዳ ማጫዎንቱ ሃዎ ያሊዳ፡ ሃኩዎን ኤቂዲኖ።

ዩሱሲ ሞገቱዳ

(ማጥ 27:57-61፤ ማር 15:42-47፤ ዮሀ 19:38-42)

50 አዪሁዳ ሻንጋቱዋ ጊዳዳዋንቱፔ ኢቱ፣ ዮሴፋ ጌቱቲያ ሎዓኔ ዒሎ ቢታኒ ዳዔ።

51 ሃ ቢታኒ ሻንጋቱዋ ማቁዋኔ ኡንቱንቱ ኦሱዋን ኢቲፔቴላ ኦሊቤና። ያሳ ካወቱላ ዩሳ ሂደታን ናጊዳ ዳዔ።

52 ዮሴፎካ ጲላዖሳኮ ቢዳ፣ ዩሱሳ ኣኃ ኣካናው ዋሴዳ።

53 ኣካናዳን ጌቱቶዋፔ ጉዬ፣ ኣኃ ቦላፔ ዋሊዳ፣ ሎዖ ሞጉዋ ማዩዋን ፃዓዳ፣ ሹቻፔ ዋጩቲዳ ሜዴቲዳ፣ ኦኒኔ ካሴ ሞጌቲ ቤና ኦላ ጊደን ዋሴዳ።

54 ጋላሳይካ ሳምባታ ሞካናው ጊጊያ ጋላሳ፤ ሳምባታይካ ጌላና ሃኔ።

55 ጋሊላፔ ደሚዳ ዩሱሳና ኢቲፔ ዩዳ ማጫዋንቱ ካሊዳ፣ ዲፋዋን ኣ ኣኃ ዋቲዳ ዋሴዲኖንቶ ቤዔዲኖ።

56 ኡንቱንቱ ሃዋፔ ሶይ ሲሚዳ፣ ሺቱዋኔ ኦኪያዋ ኣኃው ጊጊሴዲኖ።

ሂጊያ ማራዳን ሳምባታ ጋላሲ ሸምፔዲኖ።

24

ዩሱሲ ሃይቁዋፔ ዳንዳዳ

(ማጥ 28:1-10፤ ማር 16:1-8፤ ዮሀ 20:1-10)

1 ሳሚንታፔ ኮይሮ ጋላሳ፣ ማጫዋንቱ ጊጊሴዳ ሸቱዋ ኦይቂዳ ዲሪ ጉሪዳ ዲፋዋኮ ቤዲኖ።

2 ሹቻይካ ዲፋዋ ደናፔ ጎንደሬቲና ቤዔዲኖ።

3 ኡንቱንቱ ዲፋዋ ጋርሳ ኦላ ጌሎ ዋዳ፣ ጎዳ ዩሱሳ ኣኃ ዳሚቤይኪኖ።

4 ማጫዋንቱ ሲጲዳ ዳዒሺን፣ ዋጪዋጪያ ማዩዋ ማዬዳ ላዑ ኣሳቱ፣ ቆፔናን ኡንቱንቱ ሚዪያን ኤቁዲኖ።

5 ማጫዋንቱካ ያሻፔ ዳንደዋን ሳዓ ዒሊዳ ዳዒሺን፣ ላዑ ኣሳቱ፣ «ዳዑዋን ዳዒያዋ፣ ኣ ኣያው ሃይቆዋንቱ ጊደፔ ኮዩቲ?»

6-7 ኢ ዳንዳዳ፤ ሃዋን ባዋ። ቃይካ ጋሊላን ዳዒያ ዋዲያን፣ ሩሳሳ ናዓይ ናጋራንቻቱዋ ኩሺያን ኣጲ ኢሜታናዋ፤ ማሰቃሊያ ቦላን ካቂታናዋ፣ ሄዜንላ ጋላሲ ሃይቁዋፔ ዳንዳናዋ) ያጌቶዋ ቆፒቲ» ያጌዲኖ።

8 ማጫዋንቱካ ሄ ዋዳ ቃላ ኣኬኬዲኖ።

9 ኡንቱንቱካ ዲፋዋፔ ሲሚዳ ሃ ኡባ ዩወዋ ታማኔ ኢቲ ከቲቶዋንቶኔ ኡንቱንታ ካሊያዋንቶ ኡባቶ ኦዳዲኖ።

10 ሃዋ ዩሱሲ ኪቶዋንቶ ኦዲዳዋንቱ፡ ማግደላፔ ዩዳ ማይራሞ፡ ዮሃና፡ ያዩቆባ ዳዮ ማይራሞኔ ኡንቱንቱና ኢቲፔ ዳዒያ ሃራ ማጫዋንታ።

11 ኡንቱንቶ ማጫዋንቱ ኦዲያ ቃላይ ቃጂያዋ ማላቲና አማኒቤይኪኖ።

12 ሺን ሄ ዎዳ ጳዴሮሲ ዳንዲዳ ዲፋዋኮ ዎዳዳ። ያ ጋኪዳ ሆኪ ያሊያ ዎዳ፡ ጋርሳን ሞጉዋ ማዮ ፃላላይ ዳዒያዋ ቤዔዳ። ሃኖ ዩዉዋንካ ማላሌቲዳ፡ ጎሌ ሲሜዳ።

ኤማሁሳ ኦጊያን ዩሱሲ ላዑ አሳቱዋሲ ቆንጩዳ (ማር 16:12፣ 13)

13 ሄ ጋላሲ ዩሱሳ ካሊያዋንቱፔ ላዑ አሳቱ ዩሩሳላሜፔ ላዑ ሳቲያ ሃኪያ ኤማሁሳ ጌቲቲያ ሄራ ቢዳ፤

14 ኢቱ ኢቱዋና ሃኔዳ ዩዉዋ ኡባ ሃሳይ ዳዒኖ።

15 ኡንቱንቱ ሃሳዩዲኔ ዘሬቲዳ ዳዒሺን፡ ዩሱሲ ባሬ ሁጴው ዩዳ ኡንቱንቱ ሚዩያ ሺቂዳ ኡንቱንቱና ቢዳ ዳዔ።

16 ሺን ኡንቱንቱ ባሬ አይፊያን ያሊዳ አ ጊዲያዋ ሻኪ ኤራናው ዳንዳይቤይኪኖ።

17 ዩሱሲ፡ « ሂንቱንቱ ኦጊያ ቦላን ኢቱ ኢቱዋና ሃሳዩያዋ አዩ? » ያጊ ኦቹዳ። ኡንቱንቱካ ዳጋማን ሌቹሚዳ ኤቄዲኖ።

18 ኡንቱንቱፔ ኢቱ ቂሊዮጳ ጌቲቲያዊ፡ « ሃ ጊዲያዋን ዩሩሳላሜን ሃኖ ዩዉዋ ኤራናዊ ኔ ፃላላይ ሃጋዳው አማሌ? » ያጊ ዘሬዳ።

19 ዩሱሲ፡ « ኢ አዩ? » ያጊና፡ ኡንቱንቱካ፡ « ያሳ ሲንጻኒኔ አሳ ኡባ ሲንጻን ቃላኒኔ ኪታን ሚኖ ናቢያ ጊዳዳ ናዚሬቲያ ዩሱሳባ ሃሳዩቶ።

20 አካ ቂሳቱዋ ካፓቱኔ ኑና ሞዲያዋንቱ ሃይቁዋ ፒርዳው አሊ ኢሜዲኖ፤ ማስቃሊያ ቦላን ዎቆዲኖ።

21 ኑኒ ካሲና፡ « ኢሰራዔሊያ አሳ ዎዛናዋ » ያጊ ሂደቶዌ አ፤ ሺን ሃ ዩዉ ሃኔቲዳ አጶዳፔ ሄዙ ቃማ ጊዳዳ።

22 ኑ ጊዳፔ ኢቲ ኢቲ ማጫዋንቱ ኑና ማላሊሴዲኖ። ኡንቱንቱ ጉራን ሂኒ ዲፋዋ ቤዲኖ።

23 ሺን ዩሱሳ አጎ ኡንቱንቱ ቆዮ ዎዳ ሺሬቲ ሲሜዳ፡ « ኢ ዳንዳዳ፤ ያጊያዋ ኪታንቻቱ ኦዲሺን ቤዔዳ » ያጊ ኦዳዲኖ።

24 ኑ ጊዳፔካ ኢቲ ኢቲ አሳይ ዲፋዋ ቢዳ ኡንቱንቱ ጎዋዳን ሃኒና ቤዔዲኖ፤ ሺን ዩሱሳ አጎ ዳሚቤይኪኖ » ያጊዲኖ።

25 ዩሱሲ ኡንቱንቶ፡ « ሂንቲኖ፡ አኬኪና አሳቶ፡ ሂንቱንቱ ዎዛናን ናባቱ ኦዲዋ ኡባ ኤሌ አማኔናዋንቶ፤

26 ኪሪስቶስ ሃ ሜቱዋ አካናወኔ ባሬ ቦንቹዋኮ ጌላናው ቤሴኔ?» ያጌዳ።

27 ሃዋጥ ሲሚዳ ዩሱስ ሙሴ ማፃፋቱዋጥኔ ናባቱ ፃፊዳ ማፃፋቱዋጥ ደሚዳ። ያሳ ማፃፋቱዋ ኡባን ፃፊቱዳ ባሬባ ኡንቱንቶ ቢሊዳ ኦዳዳ።

28 ኡንቱንቱ ቢዳዲያ ሄራ ማቲዳ ዋዳ። ዩሱስ ሃራሳ ቢያዋ ማላቲዳ።

29 ሄ ዋዳ ኡንቱንቱ አ፣ «ጋላሳይ ቃሚዳ ዳዲያ ዲራው፣ ኦማርሳይ ማቲዳ፤ ኦናና ኢቲፔ አቃ!» ያጌ ሚኒሲ ዋሴዲኖ። ሃዋ ዲራው፣ ኢካ ኡንቱንቱና ኢቲፔ አቃናው ጌሌዳ።

30 ኡንቱንቱ ኢቲፔ ጋዪታን ኡቲዳ ዋዳ፣ ዳቡዋ ዳንሊዳ አንጃዳ፤ ሚንሊዳ ኡንቱንቶ አሚዳ።

31 ኡንቱንቱ አይፊካ አ አኩካና ማላ ደዬቲና፣ ዩሱሳ ጊዲያዋ ኤሬዲኖ። ኢካ ኡንቱንቱ ሲንሳፔ ጌሚዳ።

32 ኡንቱንቱካ ኢቱ ኢቱዋ፣ «ቃዳን ኢቲፔ ኑ ዳዲሺን፣ ኦና ኢ ሃሳዪሲያ ዋዲያኒኔ ያሳ ማፃፋቱዋካ ኑሲ ቆንጩሲዳ ኢ ኦዲያ ዋዲያን፣ ኑ ዋዛና ጊዲን ታማዳን ሴሌ ጊዳኔ?» ጌቲቲዲኖ።

33-34 ሄ ዋዲያንካ ዳንዲዳ ዩራሳላሜ ሰሚዲኖ። ዩሱስ ከቶ ታማኔ ኢታቶኔ ኡንቱንቱና ኢቲፔ ዳዲያዋንቶ፣ «ሳዳይ ቱሙዋካ ዳንዳዳ፣ ሲሞናወካ ቤቲዳ» ያጌዳ ሃዋን ኢቲፔ ሸቂ ኡቲዳዋንታ ዳሚዲኖ።

35 ሄ ላባቲ፣ ቃዳን ሃኔዳዋኔ ዩሱስ ዳቡዋ ሚንሊያ ዋዳ ዋቲ አ ኤሬዲኖንቶ ኡንቱንቶ ኦዳዲኖ።

ዩሱስ ባሬና ካሊያዋንቶ ቤቲዳ
(ማት 28:16-20፤ ማር 16:14-18፤ ዮሀ 20:19-23፤ ኪት

1:6-8)

36 ሃዋ ኡንቱንቱ ሃሳይ ዳዲሺን፣ ዩሱስ ኡንቱንቱ ጊዲን ኤቂዳ፣ «ሳርቲላይ ሂንቲው ጊዲ» ያጌዳ።

37 ኡንቱንቶ ሞይቲሊያ ቤዎዋ ማላቲና ዳጋሚዳ፣ ያሻን ኩሚዲኖ።

38 ኢካ ኡንቱንታ፣ «አያው ዳጋሚቲ? አያ ዲራው ሂንቲንቱ ዋዛናይ ሲቋ?»

39 ታኒ ዩሱሳ ጊዲያዋ ኤራናው፣ አኔ ታ ኩሺያኔ ታ ጌዲያ ቤዳቲ፤ ታናን ሂንቲንቱ ቤዲያዋዳን፣ ሞይቲሊው አሹኔ ሚቁላይ ባዋ። አኔ ታና ሂንቲንቱ ኩሺያን ኦይቂ ቤዳቲ» ያጌዳ።

40 ሃዋ ያጌ ሲሚዳ፣ ባሬ ኩሺያኔ ባሬ ጌዲያ ቤሴዳ።

41 ኡንቱንቱካ ናሼቻፔ ዳንደዋን፣ አማኔናን ማላሌቲ ዳዲሺን ኢ፣ «ሃዋን ሜቲቲያዌ ሂንቲንቶ ዳዲ?» ያጌ ኡንቱንታ ኦቹዳ።

42 አንቱንቱካ፡ ዲዌቲዳ ሞሊያፕ ላፋ ፑሩዋ ኣው ኢሜዲኖ።

43 ኢካ ኣኪዳ አንቱንቱ ሲንሳን ሜዳ።

44 ኢካ፡ «ታኒ ሂንቱንቱና ኢቲፕ ደዓዳ፡ «ሙሴ ማፃፋን፡ ናባቲዋ ማፃፋኒኔ ቃላን ፃፊቶ ማዚሙራቱን ታ ዲራው ፃፊቲዳ ኡባይ ፖሌታናው ቤሴ» ያጋዴ ሂንቱንቶ ኦዳዳ ዬዉ ሃዋ» ያጌዳ።

45 ሄ ዋዲያንካ ያሳ ማፃፋቲዋን ጌቲቶዋ ኣኩካና ማላ፡ አንቱንቱ ዋዛና ዶዬዳ።

46 አንቱንቶ፡ « ከሪሰቶሳ ሜቱ ጋካናዋ፤ ሄዜንሉያ ጋላሲ ሃይቁዋፕ ዳንዳናዋ።

47 ኣ አሱንሳን ናጋራ ፓዌላይኔ ማርታ ደሙሳይ ዬሩሳላሜፕ ደሚዳ አሳው ኡባው ኦዳታናዋ» ያጌቲዳ ፃፊቲዳ።

48 «ሂንቱንቱካ ሃዋ ማርካቲዋ።

49 ታ ሂንቱንቶ፡ ታ ኣቡ ቃላ ጌሌዳ ሂደታ ዬዳና፤ ሄዋ ጋካናዉኔ ሂንቱንቶ ዋልቃይ ሳሉዋፕ ኢሜታና ጋካናው፡ ዬሩሳላሜ ካታማን ናጊሺቲ» ያጌዳ።

ዬሱሲ ሳሉዋ ሲሚዳ ቤዳ
(ማር 16:19፣ 20፤ ኪት 1:9-11)

50 ሃዋፕ ጉዲያን፡ ቢታኒያ ጌቲቲያ ካታማ ጋካናው፡ አንቱንታ ኣፌዳ፤ ባሬ ኩሺያ ሚጨዳ አንቱንታ ኣንጃዳ።

51 አንቱንቲፕ ሻኩቲዳ፡ ሳሉዋ ቤዳ።

52 አንቱንቲ ኣው ሳዪኒዳ፡ ዳር ናሼቻን ዬሩሳላሜ ሲሜዲኖ።

53 ቃሲ ፓጩናን ያሳ ጋላቲዳ፡ ጌሻ ሳሊያን ዴዔዲኖ።

Ooratha Caaquwaa New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 1 Oct 2024 from source
files dated 29 Jan 2022
585b63ca-b8e6-55c8-bfef-10bdc95ad69c